


北湖小集



揚州志北

揚州北湖小志序

元但通籍儀徵而已實揚州郡城北湖人也元家在北湖九龍岡族姊夫焦里堂孝廉家在黃珏橋相隔一湖幼同學往來湖中者屢矣嘉慶丙寅丁卯間奉諱家居亦常至北湖孝廉出北湖小志彙示余余讀而韙之孝廉學識精博著作等身此書數卷足覘史才夫以北湖周回百里中水地古蹟忠孝節義文學武事悉載于是地出靈秀特籍孝廉之筆以傳斯地之事也使各郡縣數十里中皆有一人載筆以志其事則郡縣之志不勞而成矣亟索其彙彙于板以貽鄉人觀覽以待長官采摛焉
阮元序

嘉慶丙寅寧化伊公墨卿來守揚州以府志八十年不修將網羅軼事以表彰之令循贊襄其事循生也晚耳目所及不出閭巷何足以備著述然循世北湖人也北湖自明嘉隆以來偉人奇士相繼而起惜乎故家子弟淪在耕漁先正遺編消亡八九傳說不齊有同影響深有憾於載筆之無人也因理舊聞徵諸文獻次爲一編略具條理用以陳諸太守備採摘也凡敘六記十傳二十一書事八家述二共四十有七篇別爲六卷名之曰北湖小志謹列篇目於左

卷一

敘水上第一

敘水下第二

敘地第三

敘農第四

北湖小志

卷首

敘漁第五

敘舊俗第六

卷二

開元寺記第一

畚芳社記第二

梓潼祠記第三

誦芬莊記第四

錐壩記第五

黃珏橋東嶽廟記第六

傲姑寺記第七

沙香洲記第八

珠湖草堂記第九

六湖記第十

卷三

王銓部傳第一

忠節高僉事傳第二贈 暉 文瀾

忠臣梁飲光傳第三

王螺山傳第四方岐 方魏

陳歐村傳第五

徐慧菴李梅舟傳第六

范石湖傳第七

羅煜張元煢黃溪圖呂尊舟

孫柳庭傳第八

徐坦菴傳第九

元美元端

二吳傳第十

卷四

阮將軍傳第十一

文施畢趙傳第十二

孫書阮竹林

郭謝常周張王傳第十三

王郭謝陳李常傳第十四

吳千爲傳第十五

重光

孝子傳第十六

程翁傳第十七

裔烈娥傳第十八

貞節傳第十九

王夫人郭母淨因道人傳第二十

私傳第二十一

卷五

書人瑞第一

書天時第二

北湖小志

卷首

二

書物異第三

書金石第四

書詩話第五

書軼聞第六

書鬼神第七

書疑義第八

卷六

家述上

家述下



北湖小志


卷首

六



三圖湖北

湖北圖四



寺鎮壓
廟帝關
市橋家宋
巷竹紫
橋家馬
橋家茅
橋家紫
橋里五
橋里五南
橋平太
橋里三南
橋家董
橋板周
橋里三
橋定銀
橋家孔
橋子鬍
橋子鬍
壩家于

灣月涼
灣野今稱
灣牛野
灣溝
渡口湖
渡安永
渡家張大
渡家張小
渡家張小
嘴渡家張小
寺漢羅
壩蓮紅
閣昌文
廟嶽東
阮墳橋家陳
岡龍九
壩家于
壩家于
壩家于

集家郭
渡家張大
巷渡普
壩家徐
渡家張小
嘴渡家張小
壩蓮紅
閣昌文
橋板周
橋里三
廟嶽東
阮墳橋家陳
岡龍九
壩家于
壩家于
壩家于

廟徒司破
巷里三
稍塘大
莊家鄭
冲家錢
橋家徐
寺音觀南
橋家胡
壇仙家王
墳
莊大家陳
橋家靳北
橋家靳南
橋家龔
冲家龔
墓俗稱皇
陵帝湯隋
巷家吉
橋子娘高

五圖湖北




六圖湖北



北湖小志

卷首

八



北湖小志

卷首

九

大儀

此圖本諸
歐陽君參
以曹安寺
僧法海建
隆寺僧道
原所說道
里方位

黃泥窪

田家小橋

段家壩

車家橋

縻家小橋

鳳子嶺


胡老翁菴

高田

俞家岡

丁大家橋
丁家壩

袁家井




北湖小志


卷首

高忠節
公宅





釣魚臺



古開元寺



莊芬誦




北湖小志

卷首








珠湖草堂


沙香洲



北湖小志

卷首

荒湖






北湖小志

北湖小志

卷首

七





九頃頭

黃垓橋市



北湖小志卷一

江都焦循著

敘水上第一

揚州之運河自寶應黃浦入界至瓜洲儀徵達於江河以東曰下河河以西曰上河上河皆湖也其在甘泉境者郡人謂之北湖東東於運隄西受西山諸水北受高郵湖水方三十里而灘隈隴阜錯落其中若爪若角若木之交枝非生長其間往往迷其棹焉自邵伯鎮之北五里由官河達於湖曰鯀魚口由鯀魚口而南湖水過老鸛嘴又西新河口之水入焉又西過許家廠又西嚴家淘之水入焉又西爲薄劉家嘴又西爲楊家渡釣魚臺之水入焉新橋之小水亦入焉又西北過李家嘴又歷孫家

北湖小志

卷一

一

嘴有錐淘又西過陸家嘴開元寺在其南謝家橋之水入焉又西過沈家嘴季家嘴率黃珏橋隄而北至睦家嘴澗陳壩之水由橋下入焉湖水繞鎮而北半里過裔家庄與季家嘴對湖相望里許又東半里至屠家嘴高家橋之小水入焉少東爲東嶽廟又東爲竇家嘴又東爲戴家窪湖水架入又東南爲董家嘴與沈家嘴南北相對其東有大隈亘於湖爲劉家嘴與李家嘴南北相望若門戶東則爲朱家湖湖水過劉家嘴而北彫胡淘之水入焉湖水又東北過火家洪畢家淘之水入焉淘側有紅廟紅廟之東北有地藏菴蓮花寺在其西北又北折其水如帶岸形若月爲湯家泮是地不生菴相傳有術士過而禁之也由湯家泮折而西有郝家樓又西爲蔣家灘又西過馬家嘴又西

繞解家嘴龍灣洶之水入焉又北過崔家嘴又東北過南田家嘴板橋之水入焉又東北爲北田家嘴又東北過土城口汪家洶之水來會又東北梁家巷之水入焉又北爲東庄嘴由東庄而北爲黃子湖由東庄而南爲邵伯湖龍灣洶之口有大小兩張家墩墩北當田家嘴東有灘長三四里作三角形在湖中爲管家尖管家尖之西北當汪家洶有老屋基基上鋪甃甃又稱李家庄河淮未合之先是爲陸地庄宅之形尙可驗矣昔時管家尖種藕夏月花開爲湖中大觀乾隆四十年大旱饑民掘食之盡因改爲稻田然在湖心稍溢則沒耳湖水繞東庄嘴而西過郭庄又西北有水如帶其北灘長五六里爲九頃頭其南有大帝寺今圯又西少南燒香港之水入焉又西過南王墩墩南

北湖小志

卷一

二

有治平寺寺南爲梁家巷有八角井傳爲唐時故蹟不可考少西大洶之水入焉湖水由大洶而西過周家嘴又西小洶之水入焉又西過王家嘴迤而南一灘銳而西出爲菁麥尖又西廟灣之水入焉湖水西過廟灣口至馬家嘴有小水自秦家酒店來入焉又西爲張田家嘴又南有小水界之又南爲韋家嘴又南界以小水其西南有避風菴自避風菴渡而北抵九龍岡公道橋之鎮在焉先是有湖口橋長半里橋久廢故改爲渡湖水繞鎮而東過窑東嘴又東北過陳家花園歐陽墩在其北又東至卜倉倉前有水如帶其東南爲窑灘窑灘與張田家嘴相對其東卽黃子湖波濤壯矣由窑灘而東北過趙家嘴又西北爲陳家洶洶水抵雙塘東洶水又北過唐家嘴三官殿之水入焉

淘水又東過珠湖草堂又東爲倪家嘴有小水在嘴中淘水至倪家嘴會於湖湖水北過倪家嘴金家灣之水入焉又東北過顏家嘴與九頃頭相對爲門戶其西爲赤岸湖其東爲黃子湖傲姑寺在其北湖水由傲姑寺而東有沙家尖長三四里橫亘而東湖水繞沙家尖而西北橋頭之水入焉又北潘家壩之水入焉又東北繞林家嘴有淘界其北又西過華家嘴又西過宰家灘司徒廟在其南又西南過盛家嘴其西有柏家渡又南過王庄庄西有真武廟王德橋之水入焉其西爲胡家渡其南爲西湖嘴嘴之西南有小張家渡又南紅蓮壩之水入焉又西北董家橋之水入焉又北李家橋之水入焉又北至徐家壩蜻蜓橋之水入焉又北爲張家渡渡口有普渡菴其北屬高郵自柏北湖小志

卷一

三

家渡至小張家渡統曰野牛灣又曰野溝灣鰍魚口之東爲河隄隄以西皆湖有相墩在其北水中墩上有近湖草堂邵伯相氏之別業也墩北爲盧家嘴其西有馬家庄又西有樓子庄皆間以小水樓子庄與湯家泮一水相望而兩湖之頸也湖水沿東隄又北過稽家閘又北過荷花塘又西北過腰鋪又西北過露筋祠又北爲三十里鋪入高郵界

敘水下第二

其西北一水自井家庄來東北過范家壩又東北過楊家壩至廖陳家庄北一水自紀家山南來歷葛家酒店北過唐家營西與井家庄水合又一水自北來由張李家巷過田家小橋南折至廖陳家庄三水合流至草關帝廟南過宋家大橋橋之南有

宋家橋鎮鎮有紫竹菴關帝廟橋北有壓鎮寺糜家橋之水自南來過茅家橋又北過馬家橋合四水爲涼月灣迤東南過郭家集至張家渡繞丁家嘴入野牛灣

其西一水自黃泥窪來窪在大儀鎮東南流五里至田家小橋一水自段家壩東北來會又一水自鳳凰嶺東北來會總至楊獸醫壩壩南有關帝廟廟中牡丹數百年高丈許相傳有神又東北流至方家大橋一水自巴家墳來七里至黃家磚橋過寶女墩南至楚家鋪尤家澗之水自南來會又東過茅勝橋橋北有茅勝菴又東北過劉家橋又東北至曹安寺小橋又北至方家小橋橋南有方家集鎮又東北過雙車蓬北徐家溝之水自南來會又北過文氏深柳堂西鷺鷥溝之水來會又北過許家

北湖小志

卷一

四

巷折過建隆寺北方家大橋之水過徐家嘴東北至建隆寺北二水交會爲鵝頸項灣灣以南兩水環抱屈曲如菱花其間爲荒湖荒湖之中有高阜建隆寺在其上立阜以觀兩水如龍蛇蜿蜒而投焉荒湖者湖久淤農以爲田稍溢則仍成爲湖故未易湖之名云爾鵝頸項灣之水北過戒壇寺西長生橋之水入焉又過胡家嘴東入公道橋渡會於黃子湖

其西南一水自方家祠來過朱家大橋橋東南爲方家巷又北過秦家橋秦觀察墓在其東又北至王家屯一水自桑家巷來巷在甘泉山東北里許又東北過天竺菴北又東北過房庄東南來會又北過雨膏橋舊名火燒橋閻公墳在其東南一水西自石灰庄過老壩橋來會又東過誦芬庄南又東北過澗陳壩

一水自江家冲會於南一水自獺貓墳來會於北又東過郭葵心墓北焦氏祖塋南折而北過焦下庄東鯽魚塘之水會焉又北焦上庄之水會焉又北倒稜溝之水會焉又北過黃珏橋東南繞睦家嘴至三义港入於白茆湖

其南一水自龔家冲來冲在郡城北十五里東流至龔家橋北折過南靳家橋一水自陳家大庄過北靳家橋來會二水合流東至周家橋又東至杜家橋賈家墳在其北東北有元通菴又有守貞菴又東過陳家橋橋東南有梅影菴又東北過楊林家橋又北過許家巷西又北至釣魚臺一水自胡家橋東過蔣家橋東又過耿家閘耿中丞墓在其北北有西來菴一水自陳家巷東北過龜月橋會焉兩水合流至釣魚臺與龔家冲水會又

北至姚家橋橋東有北方寺在高阜上一水自湯庄潘庄來東過徐家橋又東過錢家冲冲南有南觀音寺又東過紀家橋又東北過卜家橋房孝子墓在其南又東北過廖王家橋又東北與姚家橋水合又北爲楊家渡一水自鄭家庄東流入大塘稍又東過棺材跳又東北過桃花橋入楊家渡

其東南一水自皇墓墩東半里過高娘子橋一小水自馬郎家巷來會其北一里有吉家菴又東過祝家大廟南又北折爲陳家溝桑營在其南有龍王廟又北至蒲扇墩其南有相公廟又北過葛家大庄東其西南有福田菴又北合△家港分二支西一支過尤家窪南又西北過孔家橋又北至新河口入於湖東一支北過七截橋又北過福壽茶菴東一水東至美棠橋來會

又北至鰍魚口入於湖

黃珏橋北一水自錐壩來與石橋水合流東過周湯橋匯爲朱家汪一水北自安基寺來會東過崔家嘴南又東過戴家窪北又過趙家嘴西爲龍灣洶又北過張家墩與板橋水合又東北過管家尖爲葫蘆洶入於邵伯湖

大洶之水一支自真武廟會於南一支自土城口會於東一支自錢家巷會於東南其間廣濶深浚北過周家嘴東兩嘴相束爲大洶口入於黃子湖

小洶之水自五車頭北來過談家橋又過王家嘴東入於黃子湖

黃珏橋西一水自羅家橋東北流繞堰橋嘴一水南自壩磯頭北湖小志

卷一

六

來入焉又一水自鶴公橋東合二小水屈曲來會又北過薛家嘴西孫家園東爲孫家渡一水自錐壩北轉魚墩來過大竹墩西與城隍廟南小水合又北過廟頭鎮鎮南鎮北兩小水入焉又北過司徒廟西五車頭北合二小水來會至都天廟南入孫家渡又北過劉家嘴東又北過蕎麥尖入於黃子湖水深曲雖赤旱不竭統稱曰廟灣

公道橋之水一自阮千戶墓南過陳家橋至九龍岡入於湖一自康營來過朱公廟又東過孔家橋又東過于家壩又東至胡家嘴入於荒湖

赤岸湖之水一自三官殿北東流過姚家跳入金家灣一自金莊入金家灣一自橋頭東過徐家廠又東北至沙家尖入於湖

一自潘家壩東流過談明橋又東北繞林家嘴入於湖一水自東嶽廟西江倉南屈曲過王德橋合王氏上下兩庄水西又一水南自燕庄來合共入胡家渡一水自三里橋東北至周蠻子橋又北過紅蓮壩一小水自東來合爲小張家渡一水自董家橋東北流至小張家渡入野牛灣

敘地第三

黃珏橋在郡城北三十里橋以南有三里菴去橋三里菴北二里有破司徒廟又一里至橋橋之隄半里昔樹以柳橋之北有市自茶菴至於火星廟約半里形如弧環湖而立焉自火星廟東北八里至湯家泮兩畔舒爪若葉中一綫如脊南爲朱家湖北爲邵伯湖東嶽廟扼其根廟東戴家窪僅廣數武而已自火

北湖小志

卷一

七

星廟北行三里爲廟頭鎮又一里爲新集由新集而西二里爲都天廟廟面西孫家渡之水環焉由新集而東爲崔家嘴爲南北二田家嘴諸嘴支水中若掌然由田家嘴渡湖則爲荷花塘新集北有真武廟由廟而北三里爲周家嘴由廟而東北五里至錢家巷其左爲大淘右爲汪家淘兩淘之間亦數武是爲土城口過此地圓如鏡治平寺在焉由寺而東一角長三里爲東莊嘴由寺而北長六七里爲九頃頭黃珏橋之北盡於此自火星廟北至治平寺總曰北落枝由黃珏橋西北行五里爲鴛鴦塘其地高水溢不及其北二里爲壩磯頭壩頭之東北二里爲薛家嘴與都天廟隔水相望焉由鴛鴦塘而西一里爲羅家橋橋北二里爲堰橋嘴由羅家橋而北六里爲張田家嘴其形

亦孤馬家嘴劉家嘴孫家園排其左韋家嘴避風菴列其右其狀亦如掌焉諸地之脉皆從甘泉山來黃珏橋至公道橋八里渡一里公道橋之東北爲赤岸湖地自公道橋七里至雙塘又八里至橋頭鎮又五里至宰家灘灘以東華家嘴林家嘴沙家尖顏家嘴倪家嘴趙家嘴如獸牙之張噬灘以西爲柏家渡胡家渡小張家渡如斧鉞之層疊其雙塘界兩水之間亦如湯家泮之有戴家窪焉由公道橋而西則西山故其脉自橫山來阮中丞云甘泉山脉自古井寺來古井寺脉自陳家集來陳家集脉自橫山來橫山之脉自治山來公道橋九龍岡之地脉自大儀鎮北來大儀雖爲鎮集而地極高實一山頂也大儀之脉自陳家集東北來陳家集脉自橫山來蓋與黃珏橋之脉同發源

北湖小志

卷一

八

於橫冶山者元家高祖之墓在九龍岡西陳家橋自子視之所謂樂哉瑕邱者也循案湖地爲市八曰黃珏橋鎮曰公道橋鎮曰橋頭鎮曰廟頭鎮曰裔家集曰方家集曰楊獸醫壩曰宋家橋鎮自公道橋至宋家橋十五里自黃珏橋至裔家集五里至方家集又五里至楊獸醫壩又五里

敘農第四

湖濱之田宜稻居民多力農其田自下下以至上上相去二三丈爲等六七最下者爲湖蕩草場種菱種芡草或長龍古三稜至旱之歲亦栽稻次之爲灘田栽早色稻拖犁歸四十子兩種再上爲圩田栽五十子再上爲高圩田栽六十子及望江南又上則爲車田又上爲中車田又上爲高車田俱栽大頭秈再上

則岡田岡田去水遠運水多費人力每任其萊車田者其水可隨車而至也湖水之支港停匯處設車蓬四柱如亭架四阿謂之截口茨以菅植木於中爲心斜四木以繫輪謂之釣輪輪周謂之罔罔上齒謂之撥所以運撥謂之糙齒所以升水者謂之鶴所以受鶴者謂之筒楊柳菰蘆間一童子驅牛運之湖水上噴依溝遂而四達功甚便也其栽種較山農爲早始栽曰開秧門秧畢以麥煎餅勞疆以傭力之人其鄰里戚友互餽以酒食曰洗泥五六月間剪紙爲旗插滿田中擊鼓鳴鐃昇社神行阡陌間謂之青苗會立秋處暑之交各早色稻俱陸續收割八月刈稔九月刈穉糶穀得錢歡飲於市冬月插柳織草爲簾以禦風農戶納課佃客算租釀酒擊鼓紛紛衡論初春取湖泥沃田

北湖小志

卷一

九

二月菜花滿塍柳穉如齒汲泥之舟旁午若織湖蕩間各有泥塘貯泥其中俟少堅分運於畝擔泥之夫如虬蟄螳子邪許相和聲應遠邇山農無是也惟湖居運河之西高堰之東五壩開而漕隄錮水激逆奔浪高於屋自釣魚臺以北荒湖以東一片汪洋直連樊良甍社數百里爲一海向者膏腴之產已付波臣屋隨風去人偕牛殪彼山農者又有以傲之矣

敘漁第五

湖中人多業漁其大者有三一曰風堯用大船蒲帆雙植大罟繫船後風浪大作時鼓於湖心往來如奔馬每度可得魚數百斤二曰泥網亦用大船大罟俟無風時圍而獵焉所得亦多三曰羅結繩爲之鏡其末沈水中張口當急流每獲亦可百餘斤

其次曰籠罩一人以罟繫植木五置水中一人以竹篙搗之魚驚上竄升其罟以受魚得魚亞於罟曰旋網一人立船頭兩手撒網平鋪水面網之周皆鐵脚沈入水底徐收其中繩則鐵脚斂而魚包其中曰大索以索布水面魚之性見索則不前一人立船上以罩沿索取之每得大魚其下曰抹灘兩人持網端裸行水中力牽而行其人云水唯八月最寒能於是月行水中雖冰雪不畏也曰張卡以線牽水面用竹簽銳其兩端屈曲環於線上鍵以菱梗誘以麥魚食麥則口爲簽困漁之巧者莫如此所獲多鮒味最鮮曰張丫子剖竹編如人字形置淺水中黃鱔泥鱮入無他魚或亦得蛇曰父以短竹置四刃矛於末一人左右手各持一沿湖濱或溪澗取之曰花籃編竹如籥狀梅雨時

置圩田中諸魚逆流而上每族入不能出口打避風繫一網於兩船間各用木擊船作聲以迫魚入曰跳白用小船粉堊其板月下行湖中以誘魚曰張瓦用兩瓦合之置柳根或菱草中虎鯊以爲巢清晨舉之每瓦中可得雙曰推板湖淺時一人左手持長竿竿端午以板推水中右手持罩魚隨板躍以罩罩之曰哇船養鷓鴣十餘以繩束其頸放水中得魚不能咽以手哇之然臭惡魚味最下取蟹之法有五一日斷編竹爲棧截水中由南岸以及北岸間三四步曲其勢作門門內多岐覆以篔簹空一隅置竹匣形圓而銳上謂之老人頭高出籩上天光透入蟹阻于籩遇門而入漸狹且黑不可退見天光上就之遂困于匣二日薰索用大索粗如孟瓊薰以穢草斜組於湖蟹惡穢不肯過

索乃沿索行至端有網陷入不得出三日釣以長竹曲其首垂向水置餌於末所得蟹必肥四曰探春二三月蟹居穴沿水濱以手探穴取之必有得五曰拾秋末蟹肥夜吹沫飛空中性喜火見光則就三更以火照之誘其墜而拾焉取鰕之法有二曰拉拖繫罟於竹牽之行謂之鰕拖曰張籬編竹爲之長尺許形如貝立水中標以竿鰕自其縫入此外又有取野鴨章雞雜水鳥之法或以網或以推排以網者繫網於地置餌及媒寒天無食下就餌牽而蒙之推排以小船載土插柳枝如林浮水上人裹牛革臥水中推之俟其集也擊以銃銃所及甚濶可得鴨四五隻或七八隻不等各鎮市設魚肆每晨諸漁以魚集牙僧平其價販者兌之運於郡城及他所其運魚者行如飛自湖至城北湖小志

卷一

遠者六七十里辰巳之時必至謂之中魚挑每蟹時斲戶積蟹於倉或以簿圍之困於野狼戾滿地不少惜日以蟹爲糧家人厭之市僧引販者就其家架大衡稱之載以船多往京口京口人能辨其爲湖蟹也魚之出高寶湖者色黑蟹味羶惟黃子湖之鰕色白而味甘蟹厚而脂足出廟灣者白毛尤佳春月湖中出小魚腹大而頸縮味若河豚其肝亦美食之無毒里人稱斑子魚又有麩條魚里人賤之城中人貴之鰮之小者曰鰮魚至大僅五六寸狗頭羅漢身狹味鮮美用以作羹別具野逸之趣菱之類美者曰垂角青野生者曰葱管子曰鬼父父每七八月菱葉如盤菱花吐白種菱者乘小舟以竹竿於水面往來揮拂所以逐蟲也實旣成采摘入市亦投魚肆牧鴨之人買乳鴨

於蘇常至秋復販於蘇常賣焉以太湖之種畜於黃子諸湖食魚稻肥厚異常謂之湖鴨一小舟率千百舉竹一揮貼然不亂馴物之性固有道邪至於夏月雨中磯頭橋尾有攜簪垂釣以爲樂者是則酒人詞客聊爾寄懷非業魚者類矣

敘舊俗第六

循家歲時之薦用酒琖四枚置諸席之四隅徐以酒盈之幼時問其義於先君子先君子曰舊俗也康熙以前凡鄉人宴客每席止用酒琖一自首席以至末席次第飲之人攜一巾飲畢以巾拭其餘漑遞相授受酬酢交錯皆此一琖而已蓋古禮之遺意猶存於鄉者如此旣而增爲四置四隅兩而一焉視乎用一琖者已不古矣乃近則人設一琖視四隅之設又變祭薦用四

北湖小志

卷一

三

琖於四隅存舊俗也不用一琖者吾生之初薦已用四不敢增亦不敢損也余後聞明經楊先生蔚書言亦然楊先生又云昔時農家不飲酒有醉於市者其家人衆咻之農給之曰酒非美物天罰我使飲非得已也明日以醋和穢泔水貽其家人皆攢眉蹙額曰酒誠非美物也遂以爲誠族父焦時若云向時里人履皆婦女自爲不用紵無買於市者偶一人素往來郡城歸者紵履入市居人羣誚之面赤急易布履而出冬月衣裘者惟一二作宦之家然止一裘非慶賀之事弗衣也余幼年見鄉人歲時飲宴酒皆家釀饌不過魚肉菘韭而已無用海味者盛席用四小杵盛果蔬四中杵盛乾肉醃魚之類四大杵盛鮮魚湖鴨之類謂之四喜不知有八簋十六碟之飾也婚喪之事務求其

實嫁娶多製布衣棺木必取堅緻無繇文無費物每歲祀土神
則有社祀厲神則有社人醵百錢備酒殺雞歡飲以爲好其有
農事則鄉鄰互助爲力除完糧外不多入城農夫漁戶聞巡檢
司卽生畏心爭鬪詬誶尋卽自解曰不可令官聞也二十年來
蓋亦反乎是矣

北湖小志卷二

江都焦循著

開元寺記第一

開元寺在白茆湖之南去黃珏橋三里相傳起於唐開元時按唐會要天授元年十月二十九日兩京及天下諸州各置大雲寺一所開元二十六年六月一日並改爲開元寺唐詩人劉長卿盧綸羅隱遊揚州開元寺皆有詩未知卽此寺否也康熙初高郵孫虞橋吏部葬其夫人形家言寺基吉遂遷寺於西偏而以古寺之基爲墓旣而寺毀於水寺之僧募而修之吾族曾祖衡水公及郭進士嗣齡孫舍人濩孫爲之立石記事舍人卽虞橋吏部之孫也虞橋官京師風節甚著旣歸里以治河忤河帥

北湖小志

卷二

一

適奸民以事誣告遂被逮卒於揚州獄中事詳虞山錢陸燦所撰墓志銘葬師曰寺基於法中刑殺宜寺不宜墓故旣墓而禍作信佛者曰地故吉驅佛以便己神弗福也故降以禍至今里人猶神寺之感應以爲貴至吏部且素賢一奪寺地而禍不旋踵况下此者乎寺瀕湖屢毀於水屢修起之而修寺者田穀多豐獲於是寺益盛於前嗚呼其然也哉余聞李相國春芳句陳塘墓王尙書軌雷塘墓皆奪寺廟爲之而禍不降吏部營此墳後世孫曾科第不絕又烏得謂地不吉哉孫步堂曰穴在佛座下方掘時得一鐘上鐫潘六二字孫夫人行六母家潘氏然則改寺爲墓固有前定云

畬芳社記第二

社在廟頭鎮司徒廟南康熙間湖中多隱君子詩酒盤桓一時之盛也於是徐畢范施四姓共立社曰畚芳隱四姓之偏旁也社中植花樹起樓閣亭榭每聚會皆在其中四方詩人或聞風而至焉四姓子孫多能詩習祖父之風槩嗣而續之者尙數十年范有女嫁於謝爲余母謝孺人嫂善鼓琴多記軼事言社中有老槐離地五六尺作三岐蜿蜒而上如龍蛇又余族姑爲范珉仲婦以一石印遺余印上畚芳社三字社中物也又一印兩面刻一刻嘯傲烟霞一刻元酉閣閣亦社中屋四姓旣中落社乃圮余幼時所見已藜莠雜生無復片瓦而其形勢尙可見已而爲演劇場已而墾爲稻田其左右畢氏范氏之宅亦無存者所存惟隔水司徒廟而已施氏之裔有名詮者字在寬以詩名

北湖小志

卷二

二

其後不知所存而莊宅在五車頭爲彭姓農所有余每過其地爲太息久之

梓潼祠記第三

公道橋鎮西有梓潼祠阮世衡創造先是鎮中呂氏建議而不果世衡慨然起而承之暮年工竣陳霆發作碑記記曰湖濱阮氏家敦古處兄弟不異火而居其子弟絕去輕薄佻巧之習而世衡尤讀書識道理又曰湖濱田肥美畝穫稻數鍾菱蒲菱芡魚鼈鰕蟹之屬數十里爲藪民居沃土得毋貪冒汨於利有操豚蹄而禱是祠者乎是則可羞也世衡首以張仲參宿之說導之使知興於忠孝不得已告以魁斗文昌之說民猶或懼功之不立無以爲進爵地而驕蹇不法淫亂敗度之風庶幾可息豈

非神之願哉余謂此說尙未盡然士之子恒爲士農之子恒爲農工商之子恒爲工商各安其業各守其常斯風俗之淳也佃望其獲漁祝其多販夫販婦期其有餘財何可羞之有文昌進爵士禱可耳豈例之農夫哉吾聞世衡父樞敬生三子玉衡世衡詮衡有僕李姓者名元經營商賈利十倍悉舉而歸之主家主分給不受久之遂爲僧諸阮以爲義立此祠居之所以報也詮衡素豪俠李每泣諫旣而蓄鶉與市兒角勝負注千金弟兄憂之莫能救止詮衡一日晨出僧長跪廳事不起驚問故曰小人發願放生主以鶉施我則起否則跪至死矣詮衡默然謝咎竟以鶉與之嗚呼有僕若此誠足以興起忠孝而化驕蹇侈汰之習惜陳君碑記不及此也世衡生應武以武進士官德州衛

守備應武生承勳字賡堯太學生循婦翁也故得聞立祠之詳

誦芬庄記第四

誦芬庄在黃珏橋西南三里莊西爲大名道楊公懋緒墓莊其丙舍也懋緒字令鴻號簡齋敏壯公捷長子以蔭授戶部員外郎進工部郎中歷浙江分巡溫處僉事陝西涼莊僉事陞潼商叅議遷大名叅議所至有善政噶爾旦之役制府薦理糧務出塞有功凱旋卒於大名官署初敏壯公自以爲武人子孫宜知書每延師以千金聘入學之日疊案作高臺兩力士持師坐臺上壯敏率諸子孫盛衣冠羅拜於下故後世無不能文章通經術懋緒無子以弟之子鑄嗣鑄官至古北口總兵以撻旗人五哥致縊死罷歸生三子景震景達景素達陝西波羅協副將素

直隸總督震字繼伯號武功晚年又號餘齋幼隨父鎮南陽柳林縱觀山川形勝古今遺蹟著爲詩歌雍正六年以蔭補刑部主事十年

世宗憲皇帝御門諸臣奏事未當

上意震越次奏

世宗大奇之卽授浙江衢州府知府調嘉興被吏議落職守軍臺震生四子長元曾次炯次勳次炳方震下獄家產籍沒炯奉母遲恭人莊居未幾丁母喪時震在臺需用又有分賂官帑銀不可緩炯旣葬母乃以刀筆佐人至於伴人獄中得束修資以供父勳爲馬客馳逐塞垣三出張家口走沙漠間得贏餘馳送臺上嘗驅馬傷股困甚不少挫炯居莊聚書千卷沿溪植柳數

北湖小志

卷二

四

百株間以桃李莊左舊有北觀音寺寺多老樹古松相映遂成勝地甲戌震放歸旣縱遊浙閩湘楚間遂退隱莊中釀名酒庭前雜植花樹花月良辰與鄉人飲飲必盡歡暇時讀書不輟有詩云長風巨浪尋常事雨笠烟蓑自在身時年七十餘矣後終於郡城炯字在田官直隸安平縣典史遷福建興糧通判卒於官勳字次筠號退菴錢面髯連鬚而疎身不過五尺與人言喑啞逼人莊居時鄉人以是非就質慷慨斷之無不折服或遠遊歸則謁者滿門雖田夫野老僧人道士老校退卒無不與之親以屢出塞雪氣刺目目爲之翳以蔭發江南督標署太湖副將目疾告歸亦卒於郡城炯無子勳以子大壯爲兄後大壯字葆貞號竹廬蔭爲輕車都尉授徽州東山營叅將署安慶撫標中

軍以疾歸莊爲其幼年棲托之所因廣拓之環以長廊通以曲
榭增植梅花芍藥補種松千株青翠交蔭水月蘊涵竹廬每半
年居此讀書窮弧三角天元一算術鉤深索隱倦則飲酒賦詩
相羊於溪聲山影間後人傳之亦里中佳話也

錐壩記第五

邵伯湖之西有龍灣洶其水屈曲萬狀或寬或狹輪囷天矯約
三里許近岸處有壩壩之西有塔塔銳如錐里人以其狀名之
且以名壩錐高七尺作六觚面南嵌以磚磚上鐫志偈志云劉
門韓氏生三子三女夫早逝孀居守節四十餘年持齋奉佛年
八十有七萬歷丙申仲春四日子時自身三昧真火焚化歸空
偈云靈光一點亮堂堂四大分張不覆藏衆戒參空全體見十

北湖小志

卷二

五

方七戒盡倘佯撰者書者無姓名其詳不可考泰州宮偉鏐記
僧行修火化事言火自兩耳出如孔鸞尾又述安豐場一僧向
人討棺示期火化王心齋就而拜之然則火化之事誠有之矣
余謂木之老者若楊柳銀杏柞櫟往往火自中出焚燒至盡木
爲火母其焚也固然人有秉木氣多者又茹素無血肉之味以
滋之土燥而水枯發爲內火是亦一道也桑維翰之縊噓其氣
再三每一噓皆有火出其光赫然又相傳有久病者偶欠酸自
口出鬚髭盡焚此豈奉佛使然邪且人之病淋者或溺石病腫
者多化水石水可生火亦可生也究爲病而已矣里人誦志偈
怪其語近誕余思其理如是錄而存之傳其節不傳其火化也

黃珏橋東嶽廟記第六

湖中東嶽廟有三一在赤岸湖一在公道橋一在黃珏橋東一里在黃珏橋者與高忠節公莊宅爲隣廟有鐘康熙三年忠節子瞻鑄西壁有碑忠節兄子晄立其文云湖之西偏有廟祀東嶽其地宇湫隘不知何昉晄於順治辛丑春延老僧古顏上人各海運者焚修其中僧一日入定仿佛見神衣綠袍自座降語曰地有厄將及矣汝可謀之高君急遷吾宇又數日鼓不袍自鳴僧驚異以告晄晄買裔姓田二畝遷焉是年周橋翟壩決舊廟址遂沒水中癸卯夏晄從兄昕鑄鐵鑪一置田四畝越十餘年晄又同兄瞻及昕重修兩廡塑地獄變相廟貌旣盛神愈靈威鄉民所祀報賽歷百數十年不替已而高氏中落廟之修葺鄉人公釀金爲之嘉慶初有縣隸聶兆和詭稱道士攜妻子據北湖小志

卷二

六

於廟以誦經惑人田農男女奔走若狂而聶實不敬神以神殿爲蓄豬牧牛之所糞汙滿地香火頓稀丙寅除夕鐘鼓自鳴猶不懲丁卯二月又以誦經引致男女坊甲稟縣縣陳於府太守伊公秉綬杖聶逐之先是水溢四年廟壁傾毀神像殘落里人惡聶不樂與修至是聶逐民大悅值余病寒誤服藥僵臥不知人弟律徵及友人沈長年門人謝文英蠲戒禱於廟若有所感余遂甦乃與弟鳩工修之阮中丞元爲作碑記敘其事嗚呼神真靈感已哉

傲姑寺記第七

寺以傲姑名甚奇里人云露筋祠祀其姑傲姑寺祀其嫂昔姑嫂避亂湖干夜苦蚊嫂投旁舍宿姑不肯遂死於蚊論者貞姑

而醜嫂然嫂之貞實與姑等有爲嫂白其枉者建寺以傲姑名是說也不可以爲典要雖然吾有感焉姑潔身遠嫌其名顯嫂不爲矯情以沽譽其聲惡旁舍豈必強暴露處豈不可汗夫姑之行魯國男子之行也嫂之行顏叔子柳下惠之行也各行其志矣何傲爲寺在赤岸湖東偏湖水橫澗沙嘴錯綜夜黑風起舟子不知所適每苦於溺昔人於寺側樹高竿懸紅燈以指舟之迷寺僧設湯粥以濟舟人之寒餓故寺之立所關甚鉅而不可廢或曰姑音近湖爲傲湖之譌謂有寺以避風濤則湖失其險或曰傲姑者始建寺之人然皆不可考也嗚呼露筋者驛名也或作露涇或作鹿筋或作路金或謂蚊嘍鹿或謂蚊嚙醉人今隈岸草間有宿者不聞其殺於蚊且古今同此蚊蚊嚙人何北湖小志

卷二

七

至血滴筋露則姑之事且不可知而嫂之事又何深辨乎惟水溢寺圯燈竿久廢舟中之迷莫有指者吾願里之君子重修以濟可也

沙香洲記第八

沙香洲者旣上人名其所棲息之地也在黃珏橋北二里環於水中掇如舟形故以洲名俗謂之大竹墩其北半里又有小竹墩昔皆范氏業明季江都學生姜生齊棄儒而逃於禪不欲居城市又不欲與僧居故與范石城交石城以此地處之結屋墩上架梁於水名其屋曰如是菴名其墩曰沙香洲生齊字雪蒼一字雪腸旣雜染名上悟號旣時人稱曰旣公亦曰旣上人好苦吟詩多奇氣有旣上人詩集一卷相傳有野雲和尚者結菴

竹墩上僧有異術嘗以紙梏鼠頸人問之曰鼠嚙吾經典及帽故懲之時湖中諸文士看荷於黃子湖偶天雨著葛衫盡緇則野雲運墨水所致也已而不知所之十數年後湖中人應省試者渡江遇風浪於蘆中見之速至其菴舍信宿而別約歸棹復訪之及歸遂迷其處並菴舍不可見其說頗荒誕似小說家言意者野雲卽雪蒼人見其高奇不諧於俗遂傳會爲是說邪雪蒼有檄鼠文設食窻奧間宣而告之仿韓子鱷魚之祭斯又梏鼠之說所由來與乃坦菴且諱明有贈野雲道人詞一闕云脩然四海任雲浮五月尙披裘中山學醉華山學睡幾日蓬頭兩眉閒似緱山鶴又解替人愁咸陽古道一腔漁鼓只唱歸休則當時自有野雲矣將雪蒼居大竹墩而野雲居小竹墩與范荃北湖小志

卷二

弔雪蒼詩有一片野雲隨聚散之句以野雲貺雪蒼其偶然與時又有胡老爺者亦有奇術爲人治病以手撫之則愈湖中某宅有老木垂百年胡撫一岐榦曰此樹可惜吾止能救此耳明日雷擊樹悉碎胡所撫榦獨存湖中范某者向胡乞曰君有神術奈何不令我有子胡頷之已而生女范又語之胡曰吾某日送一子一女君受女而卻子無咎我也范憶是日夢有持兩筐來者却其一其神異多類此後化於鳳子嶺草菴中肉軀尙存今里人稱胡老爺菴是固彰彰可證者而野雲亦其類也兩竹墩今無復有屋亦莫知其爲沙香洲小竹墩水味甘香品水者謂在第五泉之上惜乎其晦而不彰也可勝慨哉

珠湖草堂記第九

珠湖草堂在公道橋東北八里許倪家嘴之西爲阮招勇將軍釣遊之地將軍子光祿公建亭於草堂之後曰三十六陂亭環莊大渠曰漁渠亭西高邱曰黃鳥隅隅下小池曰龜蓮沼田外水草交處曰菱麋小舟曰射鴨船其門上有樓曰湖光山色樓將軍孫中丞公所題也一時名人多爲八詠焉湖中罕見山色草堂之樓前臨湖水空濶無所蔽甘泉山色最近每當晴霽隔江京口諸山及西南橫冶金牛諸山皆脹然可見東望露筋祠岸風帆漁棹往來不絕余每乘小艇出廟灣泛於黃子赤岸之間宿草堂中登樓而歌相羊不肯去草堂舊有一石碑高及人肩寬二尺許厚不盈尺首有穿兩面皆剝落無一字似非近代物也

六湖記第十

甘泉之湖在官河上岸者六曰邵伯湖曰黃子湖曰赤岸湖曰朱家湖曰白茆湖曰新城湖今里人以在南者爲朱家湖在北者爲黃子湖在南北兩湖之間者曰邵伯湖以黃子湖中高阜爲赤岸湖問白茆新城之名莫有能舉者矣舊志謂赤岸湖在黃子湖西然則近官河而在九頃頭以東者爲黃子湖其九頃頭以西爲赤岸湖統名之爲黃子湖耳高阜也而湖云乎哉舊志云黃珏橋在黃子湖南白茆湖北然則白茆湖在黃珏橋南矣黃珏橋至鰍魚口十五里紅廟半之今呼紅廟以東爲朱家湖然則紅廟以西爲白茆湖矣今按其地自北而南有劉家嘴橫亘水中其南有李家嘴自西南指於東北其東有老鶴嘴自

東南指於西北三嘴相湊界爲三湖由劉家嘴而西爲白茆湖由李家嘴而南爲新城湖故舊志云邵伯湖西接白茆南連新城也晉書言謝安出鎮廣陵之步邱築壘曰新城又築康於城北後人追思之名爲邵伯埭以新城名湖必其地當新城以邵伯名湖必其地當邵伯埭邵伯湖在邵伯鎮北十餘里而邵伯鎮恰當新城湖然則邵伯鎮晉之新城古之步邱也邵伯湖側古邵伯埭所在也明陸弼江都志云浮城岡在城北二十八里豐樂鄉新城湖中高二丈周四十餘丈舊有新城基余詢之里人無浮城岡有蕪城墩俗名蒲扇墩在東西灣離邵伯鎮六七里余特泛舟至其地岡上有廟曰文峰禪院登而望之去湖甚遠弼之所指恐非謂此其所謂新城基在湖中者果何地與舊北湖小志

卷二

圖邵伯湖之南有董家湖規其所在蓋卽白茆新城朱家三湖今劉家嘴以西有董家嘴其所當之湖卽白茆湖之東然則所稱董家湖者將謂是耶而志書又謂白茆湖有斗門橋官河水涸引湖水以濟運是又通朱家湖爲白茆矣今定之白茆湖在黃珏橋之東南其東爲朱家湖朱家湖之南爲新城湖朱家湖之北越湯家泮爲邵伯湖邵伯湖繞東庄嘴而北東抵露筋祠爲黃子湖黃子湖之西至公道橋渡口爲赤岸湖是爲甘泉上河六湖朱家湖或謂之珠璣湖黃珏橋舊志作黃角橋或曰於湖中掘出雙玉故以珏名是傳會焉云爾

北湖小志卷三

江都焦循著

王銓部傳第一

湖中文學盛於王銓部納諫納諫字聖俞號觀濤其先江西人父思恤字念齋官某學訓導納諫生明嘉靖間承文氣卑弱之後奮然有爲以六經爲本而濬以心思時陶望齡董其昌並以文振動一時納諫曰董非陶匹乃學陶久而與之爲一神且越焉萬厯癸卯陶主試應天命題康誥曰克明德一章張榜者以文名一時自以爲必得解元預題燈曰癸卯科解元八月十五夜走文德橋聞有誦文者張聽之頓足立毀其燈曰吾不及此揖而叩之則納諫也納諫以康誥周書太甲商書堯典虞書由

北湖小志

卷三

一

周而商由商而虞篇內以遯言立義卓然得未曾有榜發納諫果得元時同考官山陰王思任得卷上之於陶陶方構思作程文不就見此卷大詫以爲一字一句皆已所欲出而代言之曰此天下士也宜取以振文運敦士習遂得元了未成進士授行人出使榮藩辭樂郤餽榮世子敬禮之以疾假歸家居三載吏部司官缺人爭營之某尙書曰吾知有下帷著書不干進者王君可任也起爲吏部主事五閱月歷四司復以疾歸而月而逝所著書有會心言三卷其書鉤論理致納諫自謂倣子雲法言如云言傳耳則溢書傳本則譌莫神於不忒而怪奇爲下百工有異巧而觀者舞悅造物尤異巧而觀者相忘悅之以其淺忘之以其深聽開竅於耳視開竅於目聰明之體不容不達是以

決離隱密而見其章光亦猶花欲放蓋自破草欲生土自穿擲
瓦於地四五分裂是漫也非道也梅之花五出雪之花六出終
古如斯是道也非漫也繇氣爲蟲精氣爲人二語出淮南子繇氣爲葉精
氣爲花花必五出葉則無算人有禮義物則揉雜鑽核之李不
生鰕卵之雛不成均之乎殘其天者也天道如車轂往則自返
人情如奔駒逸則不還鑽木得火敲石得火未鑽未敲火復何
有或謂火無自體非也芒刺入體甚者成創創久氣復必出其
刺蓋非吾體者自拒而不納也兒多慧老多忘兒多樂老多悲
知器不知化譬以石之堅疑水之流禽之制在氣竹雞鳴聲能
使白蟻化爲水非以齒牙瓜角侵及之也氣足奪之也道勝不
祥於此可悟其理水體不頓進亦不頓涸火體則不然燼可修

熾熾可倏燼陰有方而陽不測也擊楫而生波戛於水也搖髮
而得風戛於氣也人七尺身居丈室不存其一隅在天下能爲
有無精者載之形本貞靜附氣而動氣本屢遷附形而凝氣雖
無知敏於百慮余食魚見魚之脊肉縝理而堅其腹肉疏理而
柔腹脊相接有一線痕判若刀畫不相涉入因歎氣化分際如
此截然如樹之結果自蒂以下是樹分際自蒂以上是果分際
故或樹槁而果不知或果落而樹不知白刃如林入而不傷其
身者在生分際不與死會也失火四隣爲燼而巋然以其室獨
存者在吉分際不與凶會也老莊貴無吾道貴初何言乎貴初
也曰訂譌書者返其初本天道主始令終則俟之人雪白必汗
花馨必萎紛披狼籍不復悵惜者靈奇能發不能固也觀一樹

生意莫如初茁之芽觀一莖生意莫如初茁之花飫不如嘗成
不如將染髮不可以延歲強笑不可以怡神度物者以丈尺度
天者以矩表矩表者通乎丈尺之所窮也易以象教爲言教有
窮耳虛以通乎實之窮律有短長而氣與之應象有奇偶而道
與之存律中度然後氣應禮中節然後神格神如火光鬼如火
燼不穆穆不足以見天地之大也不漠漠不足以寄天道之神
也騶虞與虎狼並生而不妨天地之仁渾淪殺雜者乃所以爲
靈奇博大也龍奮以春蛸鳴以秋材之微鉅至爲不侔然各當
其時則伸不當其時則詘天道大矣有詘伸無是非人情恡執
故貪生怖死造化以日新爲德迭用生死大定者不小遷命之
制也秋霜殺物不別芝艾天子人半不與人全予以智慮足以

就利避害而又予以不可避就予以精英足以殫見洽聞而又
予以不可聞見天之福常人也逸之福非常人也勞之鬻之逸
不如目之勞也眉無功而上於目心有智而下於首皆各得其
分天不名一巧故算寒暑者有憑占雨暘者不驗水隨地而制
平聖隨物而制正枝去樹則葉萎命系於彼也果去樹則種存
性足於此也嗜腥腐者味之譌好貨色者性之譌寒氣清肅譌
而爲慘慄暑氣融冶譌而爲鬱蒸故夫洩冶之危言譌而爲狐
暍之哭國而皆忠之譌豫讓之報仇譌而爲荆軻之刳刺而皆
義之譌扶牀而立烏知其非痿也扶杖而行烏知其非跛也治
痿痺者灼之而知痛則喜以其生脉之猶存也人未有自致者
也必也親喪乎此灼之知痛之類也處女之烈最決孺子之慕

最情山叟之愚最愿惡無心謂之過善無跡謂之文野人之畱
客也捉其裾而強之酒士大夫則揖讓而已非士大夫愛客顧
不若野人也亦微著之謂也物欲浸微則浸滅以微爲不足以
著爲有餘道心愈微則愈精以著爲不足以微爲有餘故用微
則物欲日去道心日存至德不妨受垢至明不妨受欺狷潔德
之下也確精明之傷也魚脫於網不脫於淵兔逃於罝不逃於
林小智恡惜大道無外以智鬪智則智日熾以無智容有智則
智日亡至孝間無可表至治史無可書才之所盡亦道之所止
視能見不能隔垣見也故君子不務能其所不能而務能其所
能唯不能其所能是誠不能自無適有謂之新自有適有謂之
塵瀟灑日夕勝活千齡好名尙勝自得之訛人神躁則欲離其

形交趨炎則欲棄其故成法揜智師心破學臆而得之鑿鑿如
也其味淺學而得之融融如也其味長江東於峽其流峻士束
於窮其學密與智者言可以悟與愚者言可以習衣旣垢不復
護其染也器旣敗不復防其摧也故君子慎初人盡爲鳳孰爲
之雞醫消否過半則止更投平緩之劑聽其自消恐併傷元氣
也故凡攻伐克治者得半者也法太巧則衆不能行旨太深則
庸不能喻湖大風多事大變多人明我暗以暗距明其志猶淺
我明人暗以暗激明其志更深欲人我相安也雖明勿執權應
乎天非徇乎人聽於無情不聽於有情吏宜其民猶園宜其馬
又著周易翼注三卷四書翼注六卷初日齋集七卷評選之書
有左國腆古文啟秀蘇文小品若干卷

焦循曰循聞諸先君子云銓部少貧授徒某氏館人餽以粽且讀且嚙誤染粽於硯朱墨盈唇吻間不知也又在京師與諸同年生謁座師周某堂上列壽屏文甚佳默誦良久衆人哂以迂數年後周於廣座中偶及此屏銓部誦之不遺一字銓部自序云余幼師廷用張先生先生嗜先秦漢魏家言余竊得其崖略已而應童子試輒蹶或謂之先生曰否否是遠到術也余事先生久窶而得卒業困而得須時微先生之力不及此嗚呼學者談科目輒稱銓部而篤志好學乃如此也里之君子亦法銓部焉可矣

忠節高僉事傳第二 禮 碑 文 闕

高忠節公名邦佐字以道號裏白本山西襄陵人祖鏗臨清州北湖小志

卷三

五

吏目父溱沂州府同知先世中監淮南故公以襄陵籍居江都宅在黃珏橋東北里許公以兵備參政分巡廣寧明天啟元年死於難初撫臣王化貞與經臣熊廷弼議不合化貞用孫得功計與

王師戰於平陽橋得功敗降於我謀縛化貞宣言

大軍已薄城化貞駭極棄廣寧遁廣寧之人亦從而遁公禁止之不可急馳間陽乞師於廷弼不得請時二僕高永高厚干總盧科從說公曰公有母朝廷已俞公歸養卽去誰咎公者且公之位孰與王熊若且走矣公曰不可一日未去官一日爲廣寧守將何之夜秉燭作家書授兩僕以印綬自縊死永乃謂厚曰主人死地下無從者我死爾以屍歸且得傳主人死狀厚與爭

死永不可曰爾無負我言死不死一也亦縊死盧科曰廣寧破
吾家十二口皆死我以公在未卽死也乃與厚詣廷弼乞殮公
不許曰爾主不欲生入關肯死入關乎焚其署而遁厚年十九
乞馬不可得乃步行由廣寧入京師由京師至於揚艱難盡瘁
皮骨僅存得以書達公母科狀魁梧多力厚所以得達者科之
力也明廷聞公狀賜祭葬贈太僕卿謚忠節世蔭一子錦衣百
戶公萬厯甲午舉人乙未進士初任山東壽光縣知縣擢戶部
主事轉員外郎出守永平進副使備兵天津擢陝西參政丁嫡
母憂服除備兵薊州所至政績皆卓然有聲載在明史及公之
子瞻所爲行狀公兄弟六人公居末生六子長曜縣學生次瞻
以蔭爲錦衣衛指揮僉事在職每論大事多平反數與中貴人

忤中貴人將故人人瞻持不可因罷歸方中貴人怒不可測或
危之瞻之子文瀾方十齡揚揚言曰吾家故不怖死猶有鬼神
豈獨遺於公禍乎瞻旣歸湖以文章課子弟不復問朝事乙酉
王師破揚州城中人有死者事定瞻入城弔死問傷市間暴骨
多賴以殮先是與鄭職方元勳交善高傑之亂職方死之家日
替瞻聘其女爲文瀾婦瞻字孔昭康熙間卒於弟暉徽州署中
文瀾字溯從號澹園初名堅例當廕襲部臣以聞思宗覽狀泣
然曰此松山死難高僉事孫邪詔改今名瞻嘗與言忠節事謂
是時廷弼固守右屯俾化貞入關共收餘燼尙足以支公且可
以無死文瀾曰

王師天授非廷弼所能拒公終必死也瞻大奇之相與泣下

本朝補揚州府學生厭制舉文不欲僕僕就督學試援例爲太學生年八十與湖干老友乘舟爲烟水之遊時人慕之噫弟曦天啟乙未進士陝西寶雞縣知縣曦弟昕縣學生昕弟暉順治戊戌進士蘇州府知府凡西人中鹽者於揚州設商籍或歸試故高氏自忠節以下有籍平陽有籍揚州也暉字蒼巖與城中桑豸仲渭干交每月一至城相與論文爲歌詩酣飲和之始仕爲雲南曲靖縣推官時滇省初定士困於役公痛哭請於當事甦其困且緩其征輸士有破衣冠者解已衣冠贈之士民多感泣著滇遊草一卷遷徽州府同知決疑獄擒獲盜魁大吏稱其能旣而知蘇州建育嬰堂請減浮糧吳中饑爲食於路以餉餒者時軍興羽檄紛馳委建戍防兵舍千間暉首倡捐俸得不厲

民造戰艦暉採木洞庭身陷泥淖不憚勞苦用是成病吳中醫習爲輕淡不知峻補臨沒時呼吾骨甚寒須大劑而醫終不聽也哀哉公幼以孝弟稱母病刲股以療居喪盡禮曦令寶雞縣劇盤錯公間關走數千里代爲理治暉卒於徽署棺槨之美哭泣之哀力竭腐心無有遺憾送葬百里乃還沒之日敝篋止圖書數十卷歛以薄棺君子曰暉事親孝事兄弟居官忠以廉不愧爲忠節子也暉子文泚入揚州商籍官萊州府知府泚子士琮府學生琮弟士珣珣子相州官廣惠府知府昕子文雲雲子爲棟棟子焯焯子基世讀書爲諸生

焦循曰嗚呼基之子錄近居余莊嘗從余弟季蕃遊讀書余家問以忠節事不能知也其於忠節第六世孫耳循幼年隨家君

省墓泛舟湖中過高家橋家君每指高氏莊宅說忠節事高氏
余戚也亦嘗往來其宅間今三十年宅屋爲水嚙半圯其存者
且易姓焉是可慨夫

忠臣梁飲光傳第三

梁于涘字飲光號谷菴江都人族居北湖之梁家巷明時湖中
巨姓惟孫梁最顯兩族多讀書人于涘少以詩名與鄭元勳李
大生姚永言鄭爲虹梁應圻閻汝哲徐性之強惟良姜承宗顧
爾邁高五聚爲竹西續社中崇禎庚午科舉人癸未與元勳爲
虹王玉藻同登進士第後爲虹死於仙霞關之難元勳說高傑
以救郡人爲奸民所戕玉藻棄印綬佯狂不仕說者以東陵栗
里比之于涘盡節萬安尤爲忠烈一榜中得忠義四人皆籍江

北湖小志

卷三

八

都可謂盛矣明史云叛將白之裔入萬安江西巡撫曠昭被執
知縣梁于涘死之殉節錄云白之裔入萬安于涘正衣冠投水
死舊江都志云馬士英忌于涘能除爲萬安令未數月兵猝至
城下公死守力盡乃秉燭北面拜自經家人救之不死遂見執
時家屬居郭外勒寫書招之否則屠其鄉于涘曰國破家亡妻
孥何恤忍殃及於民邪卽招至投江不死絕粒三日不死繫南
昌獄主帥使勸慰之于涘指鬚眉示曰此豈靦顏避禍者哉遂
不言死獄中其僕殉死者五人梁善杜忠龔明張聰聰妻徐氏
甘泉志云投江時爲邏者所獲囚南昌獄中布袍談笑賦一詩
自經死詩曰但知生富貴誰識死功名到頭成箇是方見古人
情所著有谷菴集若干卷孫嘉稷字五粲嘗從姜青藜將軍客

滇南縱覽蒼山洱海之盛著瀟陵山人萬里遊草

焦循曰謝九成湖居譜敘云我祖父慕川公與梁飲光先生爲中表兄弟先生嘗勸我祖睦本族修祖墓今中街一宅卽券買梁公之業九成兄九臯爲循嫡母謝孺人之祖父梁公之宅循外祖天霽居之與吳重光宅連牆合宇疑重光宅亦梁氏業今吳宅售於樊而循外祖之宅傳子及於孫曾未徙也谷菴集求之不得而詩之刻於鄭氏影園集中者尙多郭自瞻縣學形勢說云梁飲光先生同徐石鐘於學宮前起巽樓開南窗收江南山水秀氣今巽樓故在過其地者鮮知爲先生之遺也讀五槩辭墓詩有所謂蜿蜒甘泉山爲我祖父墓則先生葬處於此仿佛得之惜乎松楸蔓草之間終莫可蹤跡云

北湖小志

卷三

九

王螺山傳第四

方岐 方魏

循幼年至表叔王容若家見其所藏螺山公像不冠帶而科頭容若曰公自浙歸隱於農遺命不冠而殮故畫像如之也詢以在浙之事本末容若不能言乾隆乙卯循在浙徧閱浙西諸志書僅慈谿縣志稍及公之名氏事蹟仍不詳嘉慶辛酉始得見全太史祖望鮐培集寫本詳載螺山公事略題曰明兵科給事中前知慈谿縣江都王公其畧曰王公諱玉藻字螺山南直隸揚州府江都縣人司勳郎納諫之子崇禎癸未進士釋褐知浙之慈谿縣事子良和平民不擾而事集未期年北都亡故少詹項煜以從逆亡命來慈之馮公元颺與公皆出其門馮氏匿之夾田橋之別業慈之義民不容撲而渰之橋下公不問明人重

聞誼或以公爲過公曰吾不能爲向雒之待鍾會哉夫君臣之與師友果孰重聞者聳然乙酉夏大江以南盡附浙中百城守令或棄官去否則降而公與沈公宸荃起兵晉御史仍知縣事公募義勇請赴江上自効乃解縣事以兵科都給事往軍前事邁往壯氣勃勃而江上諸帥惡之先不予以餉公曰是將刺刃於我也乃力請還朝其在垣中雅持正議又不爲諸臣所喜乃力求罷莊太常元辰留之丙戌夏浙東再破公黃冠行遯於剡溪不肯歸久而資糧俱盡慈民及浙東之義士時時周之妻收遺棄子拾墮樵不以爲苦窮阨至老不衰每臨流讀所作詩激厲慷慨仰天起舞辛卯以後始歸故鄉卒以窮死又云前此寧之父老嘗爲之祀今亦廢矣問之揚人無知公者問之寧人

北湖小志

卷三

十

亦無知公者嗚呼公歸而隱隱而死人無知之者不亦宜哉生二子長方岐次方魏

方岐字武徵號蒙谷承父志不求仕與李宗孔汪懋麟吳綺訂閒閒社三君既貴乃與鄭聽菴汪枕濤彭退菴季松崖湯茗仙宗響山徐崧山宗嬾臞梁素菴爲竹西十逸徐元美記其事范荃作傳而贊之著蒙齋文集十六卷詩八卷祛塵錄哀談若干卷方岐沒同里史炤作文以祭之云吁嗟乎予身之將老值此執友之云亡不得與數晨夕考德修業以相羊而樂桑麻不得質疑問難上下今古以指示夫疵瑕是以腸一日而九迴居則忽忽如或過差憶昔我友敦其若樸曠其若谷吐爲文章灼灼其華攬六代唐宋之精英闢曲徑而收百家胡爲乎惟飲邗水

以樂饑未嘗建旗鼓而驅屯雲之車予故惆悵而齟齬俛首而
憂啞

方魏字大名號薊城螺山在浙方魏與兄方岐從之鼎革後隨
父歸湖遂不出時祖父之門生故人半在仕途以書招之堅拒
不答閉戶著書四十年不入郡城不授徒不遊不酒食往來渾
渾穆穆以全其天精研易理著周易廣義十卷纂周易解一卷
廣義厄於火纂解分太極兩儀四象圖書卦義爻義凡六篇其
說太極云太者大之義卽大哉乾元極者至之義卽至哉坤元
又云卵中包含黃白內黃爲陽外白爲陰草木之實核以藏仁
人物之胞胎血以裹氣是時陽在內生機業已亨毒陰在外意
象猶然杳冥太極之象也周子太極圖中分黑白而又黑交於

北湖小志

卷三

十一

白白交於黑此則太極已剖非復陰含陽之象太極以陽爲主
故其體圓其數一凡爻近陽者利遠陽者窮向陽者榮背陽者
辱承陽輔陽者吉乘陽蹈陽者凶善書法有朱釋十七帖一部
里人重其人得其所書至今珍之玉藻墓在城西雙墩方岐附
方魏墓在誦芬庄右數十步嘉慶十年有私毀其塋域者循告
諸縣君陳公觀國得改正明年秦太史恩復楊都尉大壯阮中
丞元重葺其墓立碑石曰大清處士大名王君之墓

焦循曰郡縣志以螺山傳入文苑而稱其高栗里之節作絕命
詩以逝又不詳其詩與事之本末及閱范荃竹隱居隨筆載螺
山絕筆詩云半生辛苦泣孤臣贖得乾乾淨淨身四大旣崩神
識散這篇草稿付誰人嗚呼其志可悲矣公字質夫螺山其號

也

陳歐村傳第五 卓廷相 元度

陳昇字邦顯號歐村本浙江餘姚人祖德避元亂居揚州北湖豐樂鄉之周家樓周太保光奇其貌以女善緣女焉德生禮禮生源源生昇昇善事其父兄父入城市昇執鞭徒步從曰不敢與尊者聯騎也積勤家日裕施田爲義冢以瘞札瘥骸者明嘉靖間歲饑加以師旅郡縣憂之昇命其子傾所蓄輸官以舒時急有司以爲義鄰戚之無依者居以廬飯以粟賻贈無所吝故有僧道橋橋圯昇以百金倡鄉人且躬督其成易名曰河口橋今稱公道橋是也又徧修雷塘諸橋自是民無病涉者性恬澹以經術課諸孫爲里中排難解紛有弗相能者昇平心處之

北湖小志

卷三

三

各心服去有司以鄉飲徵辭弗就年七十七卒于嘉靖八年五月五日生二子琪瑤瑤歲貢生處州府同知孫銑歸安縣知縣紹思郡學生紹伊邑增廣生紹夔紹益歲貢生虹縣教諭曾孫世雋內閣中書世傑武舉湖州府總運匡世郡學生時濟魯王府教授時汲郡學生夢鶴郡學生夢日郡學生夢雷禮部儒士維世國子監生卓嘉誼並順治丙戌舉人嘉誼官冀州知州卓別見後

焦循曰余泛舟黃子湖每過所謂歐陽墩者相傳爲陳氏老墳而未悉其何如人閱明崔桐東洲續集載歐村陳君墓志其銘曰有墩歐陽千載所藏乃知陳氏老墳卽歐村葬處也本東洲所志備錄于篇

卓字懋修順治丁亥進士由刑部郎遷楚藩參議四川提學僉事時蜀新定諸生文業荒廢卓出所攜經籍令傳寫轉相教授由是文風日振按試保寧府值劇賊劉文秀猝至卓乘城分守拒却之敘功擢陝西臨鞏道副使復官商分茶之法辨部民受逆徇僞劄者民咸德之再擢湖廣上荆南道參政告歸卒祀鄉賢事見府志惜不詳也

紹益子輔世字德修號况仙順治丁酉舉人辛丑進士觀政刑部生子廷相字浩海一字百師邑增廣生康熙甲子

聖祖南巡廷相獻賦河干

召試御舟中賦詩揮筆立就一時朝貴傾慕以爲異才性倜儻不羈每科頭跣足吟嘯自得見者以爲狂娶于高爲忠節公女北湖小志

卷三

三

孫與范石湖焦雲章倡和于湖西別業廷相家黃子湖亦有別墅饒水竹之盛爲高人名士所往來著有湖干詩文合集若干卷墓在桑園生四子元煥元位元度元治

元度字武岡號野堂康熙壬午舉人丙戌進士授直隸赤城令赤縣爲宣府九邊之地土瘠民勞西事方興軍需旁午宣郡每歲喂養橐駝五千餘隻赤應分喂五百有奇歲需草十數萬束向例每束官價三釐元度獨倍價給之口北監司荆門江公把臂謂曰人皆沿例君獨倍之民則蘇矣子母乃困乎元度對曰與使一縣民困毋寧使吏一家困也州縣喂養橐駝例于次年之春運於陝凡木鞍草屨荆筐等具需牛二百餘頭前官悉取諸民有牛之家無不立破百姓先期損價賣牛期免于難元度

曰剝民之力以爲功義之所不敢出也坐視民顛而不爲之救心之所不忍安也於是先期傳示曰來春棗駝赴陝之役不需民間一牛不費民間一錢其車輛運送之資余當解俸以備民其各安業無恐清俸不足濟以衣被首飾囊爲一空而百姓賴免於是廉能之聲播於上下鄰邑有疑案須覆鞫者上官輒檄元度會勘治赤十年無三月罰俸之遣雍正四年八月

上命部院大臣稽查各府縣倉糧同時解任者四十二員元度赴部引見

上問曰爾有虧空否元度奏曰臣無虧空復問有借糶否元度奏曰臣無借糶

上喜卽命內地補用六年七月任河南郊縣令八年十月內擢

北湖小志

卷三

十四

刑部湖廣清吏司主事家宰靜海勵公少司寇平江吳公謂元度能將以御史薦元度以年踰七旬老宜知止乃乞歸年八十三卒于家著有野堂集金臺還璞集生二子長起唐河南陝汝道次起夏候選知縣起唐生鵬搏之綸應瑄鳳翥起夏生應詔應鼎開運宏運之綸乾隆庚午舉人應瑄雲南元謀縣知縣應詔山東東阿縣知縣鵬搏生二子曜煦

焦循曰余旣爲歐村立傳歐村裔孫瓚字邕爲以京江張相國玉書所撰德公墓碑及野堂行狀寄余余通考之歐村以下凡九世瞭若列眉而科甲仕籍爲湖中最非歐村之德之遠哉崔東洲敘歐村孫八人銑紹虞紹思紹先紹伊紹齊鎔紹譽曾孫五人時濟時汲時潤五十孝孫今從元度鄉會試硃卷履歷蓋

名有更易其異同之故不可考也附存于此以俟知者

徐慧菴李梅舟傳第六

徐宗麟字慧菴一字蕙菴中明天啟丁卯科武舉人崇禎庚辰成進士官杭州遊擊擢十六關副將甲申後遂隱跨驢攜酒于西湖之上旣歸隱於湖與湖中高士訂吟社沈酣于詩酒閒放而終有辭徵詩云天縱深林老櫟樗驚看雲壑駐安車餐松只合潛鶯谷扈蔗何緣降鶴書好爵豈移泉石性幽情偏適薜蘿居餘生得遂巢由志小艇烟蓑獨釣魚

李潛昭字梅舟宋丞相庭芝十四世孫明府學生鼎革棄諸生隱居黃子湖之野牛灣築斗室以草木自娛足跡不入城市同學顯貴未嘗通一札素有潔癖善音律長于刻印著半萬樓史

北湖小志

卷三

五

要論歷代世系紀泡菴樂府印譜共若干卷

焦循曰舊相傳有湖中三高士曰阮玉鉉曰葉彌廣曰强惟良余過七里瀧謁子陵祠堂見玉鉉所書天子故人扁於衆中最矯矯獨出而郡城諸石碑碣往往爲其手書彌廣字博之明侍郎相族孫家沒於兵獨身隱於湖惟良字真長嘗於影園集中見其所爲詩今湖中多强姓務農牧鴨不知於惟良何如求三子之居莫可得也坦菴夔吟有難後懷慧菴詞一闕注順治丙戌而范荃詩集中康熙甲寅有徐慧菴先生見過留飲詩蓋相去三十年其歸之歲月則不可考矣梅舟本末見海門李氏譜惜說之不詳而所著書又不可見然誦慧菴詩婉而決遠而不激誠高士之風與誠高士之風與

范石湖傳第七

羅煜

張元琪

黃澹園

呂善舟

范荃本名恒美字德一號石湖其卒也自書墓石曰今之石湖石湖生於明季卒於

國朝康熙乙酉年七十三博學多文不應有司試同人勸石湖仕石湖以書答云閉門靜坐啜茗聽鸚與二三童子周旋外或沈酣史籍上下今古或商榷風雅考訂譌僞興之所至筆墨淋漓五字刻成千古立就真不如天高地厚樂境無窮安往而不得其爲我者何暇僕僕向海陵道上作旅人邪自撰盟鷗野老傳云野老湖上布衣也幼讀書苦疾痰藥裹書籤旅進旅退五歲卽握秃筆作筆窠字甫就外傳能解四聲課以偶句應答如響八九歲輒搦筆作詩句父師嚴禁弗許然竈牆厠壁塗著皆

北湖小志

卷三

六

滿十七歲先大人見背弟兄析居惘惘胥胥竟不能名一錢間貨租米得假銀以爲精鏐什襲藏之久識其僞擲同瓦礫其不善生計類如此胞妹遣嫁備物備禮其於親族往來不計報稱惟務豐腆間有以急難告者不辨真僞傾囊助之衣物器用悉與人共之數千金不十年折入子錢之手年三十去爲童子師環堵蕭然嘯歌自適奉老母僅供菽水有偕隱之志所配爲名家子椎髻大布相得甚歡人謂有梁孟風人固不知野老野老亦不求人知也惟坦菴霞汀爲忘年交友赤城瑤房澹園諸子年齒後先稱莫逆迨諸君散亡老母殂逝其貧益甚五十始滿妻妾繼沒村居岑寂松岑招致家塾盤桓六七載書囊轉徙又及十年其所交遊皆亡機之侶雖日處囂塵中而淡泊自甘不

欲以口腹累人佳時良日觀花聽鳥多從侶菴遊居烏衣巷口
左右多素心人頗稱良友其所從遊多士林時彥惠顧殷勤咸
有依依之意惟引年周旋慰勞稍長如一日此又野老所倚爲
終始者也野老性嗜酒量不勝蕉葉老來雖空杯在手胸次若
春雲盎然微事搗詞達旦不倦一遇機深伎求之人及名位薰
灼者疾走避去故不諧於俗兩兒子亦不令讀書負販懋遷粗
給朝夕吟弄之興老而彌篤率意自娛不較工拙亦不欲流傳
自適而已慕宋范文穆公詩詞卽號其號曰盟鷗亦文穆軒名
也年已七十矣故曰野老云贊曰一畝之官能不我容十笏之
室能不我卽惟不容斯無營惟不卽斯自得戴高履厚不跼不
踣履道坦坦無反無側雖不敢謂

北湖小志

卷三

七

聖世之逸民亦庶幾乎徐孺子之自食其力著讀史小識二卷
竹隱居隨筆二卷文集四卷詩集五卷梅花詩一卷論語詩一
卷其詩餘有春雨詞一卷秋陰一卷秋花雜詠一卷柳塘寤語
一卷今之石湖詞一卷劉隨州詩評一卷范氏家乘作宦津梁
若干卷門人郭嗣齡題其畫像云先生生北湖之濱教授生徒
由鄉里而郡國四方之士爭以出其門爲榮先生行履聖賢之
中庸學蘊經史之精粹發爲詩文莫非中音旁及詞賦儷句皆
流溢於自然門下士得其緒餘有聲譽序者甚衆而攫取科第
者今甫四人如嗣輩碌碌莫能大顯先生之學卽於制舉一體
稍窺門戶而他端又多能者終不能測其一二也先生旣卒揚
之稍知文義者念先生無不神往每於鉅麗之製則必同聲嘆

曰惜先生已逝無能勝此者他家皆承襲陳因耳於先生自署
其和曰詩人先生詎僅詩人已哉娶王氏生一子頡妾生一子
頹霞汀姓羅氏名煜字然倩其先歿人隱居北湖與坦菴石湖
以詞相角著霞汀詩餘一卷其論詩云世之耳食者輒謂大歷
以後卑弱委爾不足取法而顧以盛唐爲正鵠不知盛唐之詩
人自爲家調亦屢變少陵夔邱以後青蓮夜郎以還一人之詩
亦備四氣焉得而指之曰某某中晚某某初盛卽欲字櫛句比
分年晝月又安知所謂初盛者不劣於中晚所謂中晚者不優
於初盛邪中晚之詩法制悉備音節益諧其間特出之士真足
鼓吹休明揚扈風雅余欲今之學者於此致意焉則金和玉節
可協聲歌酌雅稟經可襄文教寧爲真中晚不爲僞初盛也有

北湖小志

卷三

六

唐詩中晚詩鈔行世赤城瑤房兄弟也姓張氏瑤房名元珙論
文以六經爲旨歸以先秦兩漢爲繩墨參之莊騷以鬯其旨涉
之韓柳以肆其趣期以歲月沈酣歌笑然後眼高氣厲胸羅恢
拓所著瑤房詩一卷後遷居橋墅澹園姓黃氏名字不詳身後
遺一子隨母他適沒於水又有喬江樵呂尊舟談子正陳浩海
尊舟好禪學談先世多武功詰券猶存其詳不可聞石湖弟子
知名者謝九成郭嗣齡郭德嘉郭繩其喬慎言喬慎行馬溶
陳涵叔紀元鉞高翊徐裔藩謝余銓嗣齡以文章教其子弟
揚州之士翕然從之故揚之文開於郭氏郭氏之學則受之於
荃荃不仕而以其學開揚土之先百數十年文學甲於他郡荃
實啟之荃不以文名遂無復有知荃者也

焦循曰余幼年受業表兄秋帆范君范君嘗謂其族中有石湖者隱君子也不汲汲於名故其遺書多不傳而子孫亦無人矣後於里中徧訪問之僅得詩三四首文二三篇而已而所傳軼事亦無徵信丹徒王豫謂余云子向所稱范石湖者吾見其遺書存於城南陳氏乃訪之陳君素村慨然畀余皆石湖手跡也素村曰石湖之壻蘇節臣藏之以授其子謙蘇氏微藏於蘇之戚簡氏家簡氏吾戚也其後又微故此稿歸於吾嗚呼人患不足傳耳苟有其不可朽雖自晦之而終必彰如金埋泥中精氣之露可計也康熙邑志載范荃名寥寥數語續修邑志者竟刪去之故今郡邑書無石湖名石湖之傳亦微矣哉然當時科第顯奕仕宦巍赫片楮寸墨十不存一而石湖之書歷百餘年之北湖小志

卷三

九

久轉徙數家完善猶如此余歎石湖之精氣不可沒而尤流連忻慕於素村之爲人素村又藏其遺像白鬚方面布巾繭袍坐竹牀牀上集書卷一几置花尊插秋花數枝一童子奉杖右一童子進杯茗左詩集中稱張際五畫云

孫柳庭傳第八

孫蘭字滋九一名禦寇自號曰柳庭晚年又號聽翁明季爲諸生屢困於場屋乃棄去於書無所不窺尤精九章六書之學順治初西洋人湯若望以太常少卿爲欽天監監正蘭從之授厯法遂盡通泰西推步之術退而言曰西儒以七克爲教似近乎孔門所謂克已復禮者也然接其人其言厯數制器尙象者甚精而所謂天堂地獄則異教也大抵西方之人皆好潔皆焚香

皆拜天神飲食起居皆有唄咒此風氣使然耳王心湛云柳庭通幾何原本之說而著書八卷曰理氣象數辨疑糾謬蓋其學有師承星官麻翁不能與校得失又以中國土地在大園中才八十一分之一不推極之則狃於習聞習見而無以盡其變於是作格理推事外方考證四論以窮極夫天地之所以始終山川之所以流峙人所以生國所以建古今所以遞沿革人物所以治亂成古今凡三十二篇爲四卷洞乎其有源淵乎其不可測也又推三光之變謂象懸於天無與人事而彗孛盈縮出見皆有常度水旱地震亦有常經同時蓆帽山人史炤作論以破之曰日月之蝕自有常度雖禹湯文武有不能免故有伐鼓於朝退而自責之文不聞紀彗孛於其時也昔者周成王開金縢

之冊而致反風子產修弭災之政而消再火至於拱桑死星退舍堯水而奏平成之績湯旱而有桑林之應皆遇災恐懼修明政令責諸已而應自天如滋九言則火不能止風不能反桑不可死水旱必終爲患熒惑必守其凌犯之度而山崩地裂不免於堯舜之朝也孔子曰君子終日言不遺已憂終日行不遺已患惟智者能之夫恐懼所以除患也敬謹所以越難也滋九是言非獨遺已之憂患將遺於天下後世也漢文帝日食詔曰令至悉思朕之過失及思見知之所不及白以告朕而求賢良直言極諫之士光武時南陽地動下詔恤死者之家免其田租未始不以不明無德天降之災自引咎也夫堯舜禹湯其躬盛德而救災害固非後世可幾成王孝文明德亦未易及而子產以

小國之卿能挽之於天苟以爲無關於人事而莫之挽者皆有愧於子產者也余求孫氏遺書僅見輿地隅說四卷卽王氏所言之三十二篇又見有柳庭人紀四十卷則論史之書也所爲天文常度之說則不可見豈因史氏之言而去之不傳邪其說孟子圭田云或以圭訓潔非也九章方田有圭田求廣縱法有直田截圭田法有圭田截小截大法凡零星不成井之田一以圭法量之圭者合二句股之形井田之外有圭田明繫零星不井者也作山河大地圖說一以赤道爲心一以北京天頂爲心明地圓之旨謂東西無定南北亦無定北極南極之下皆寒而無熱同爲冰海幽都中國地界寒熱和平之交故出聖人賢人五印度西洋諸地亦然天地之內動極而如靜者北極也進退

而循環者日光也動靜不定游移而遠近者人跡也由天之度準地之里以天之三百六十知地之九萬里圍三徑一知地之厚三萬里折半知地心之一萬五千里人目高卑在地之面以面準心知目高於地心一萬五千里以地之二百五十里準天之一度知北極在天移一度人移在地二百五十里日南一度知地寒氣進二百五十里日北一度知地熱氣進二百五十里遞進遞退至熱極寒極知地面寒熱進退之里以餘寒餘熱相較知地面中和之里以兩極皆寒知地面寒極偏勝之里以日出日入知地面東西遠近之里以天文水法交成而總不出於算禹治洪水乃句股所由生郭守敬精算數測量地平分殺河勢開惠通通惠二河至今賴之其解禹排淮泗注江云淮水發

源胎簪至桐柏流百里而伏溢爲二潭又見流千里會泗至清江浦入海揚州地勢散漫不能約束淮流禹則開清江一渠堰其下流入揚之處一自清江浦入海其餘波之流散不盡者又導之由廬州巢湖胭脂河以入江又導之由盱眙天長六合以入江所謂排淮泗者也後清江浦口久而益濶淮泗盡由之入海而入江之口遂淤今故河蹟猶存也或曰高堰之築始於陳登是則不然使禹開清江浦若不築堰以導淮入之則下流散漫何以入海蓋高堰創自神禹修補或登耳自有清江之河而淮泗清晏數千年無患故周宣王伐淮北之夷曰率彼淮浦王師之所幽王鼓鐘淮水之上曰淮有三洲然則淮浦可以駐師未聞有水患也惟黃河入淮而淮始病以今計之惟黃淮分流

北湖小志

卷三

三

則害去而利全其策有二一放淮入江由古入江之口以洩淮勢廬州盱眙皆有古河水道之蹟各開濬設閘水大則開以洩水水小則閉以濟運而刷沙盡堵滾壩不使涓滴入高寶湖壞堤以壞民田一改運道不經清水潭邵伯驛竟闕河由瓜埠口而入以逆於淮考古河蹟自瓜埠以入六合至洪澤口以入淮有曾家岡張家岡王家壩胡家壩並東陽城觀音集曹家衝冶鋪橋亦不甚遠不過三百餘里由此行運東路可不用也康熙三十年河臣王條陳其議因恐淮水外洩不能刷沙運道阻塞議格不行然清口窄隘淮水橫流閉高梁澗施家溝周橋閘使水一意東下而高堰遂決不得已又開周橋以洩之而高郵江都之隄乃大決此滾水壩所由議開也然開滾水壩高郵以南

可以略甦水患高寶以北則如故卽建立海口亦無救大患由水勢盈科而進其行極緩下河圩隄阻滯水草盤結水勢不能建甐比水退已受其害矣所謂小舒目前之困而不能究極根原者也于是河臣靳輔請于滾壩造隄約水直入海口乃滾壩之下直洩水奔尚不容其橫溢况又約束之乎且兩隄抵海口而隄中之田一時不能洩水萬一客水橫發之際兼值天雨霖淫則圩中之田何計而出此策之必不能行者也惟所議夾隄高堰上口旣設滾壩使流入諸湖更由東堤滾入下河不能禁上下兩河之不沒今設夾隄使高堰之水滾入夾堤更開滾草河使入於海此則分淮導黃之術也惜其從中望誤垂行而止至於半途而廢也潘季馴主併淮以刷沙楊一魁主分黃以導

北湖小志

卷三

三

淮二公之計以余揆之北方諸水皆入於河河復帥之南入於淮又更益之以渦河之水區區一淮詎克與爭分黃則其勢少弱淮方得出口然後閉周庄閘塞運河口其計始得行不然淮不敵黃則潰決南下黃尾其後亦必至決盱泗入湖而入江雲梯關擁塞如平地此固未然之慮然其勢必至於此也故治河之法分黃爲先導淮在後舊漕船過淮行黃河一百八十里入董口河流汎水險惡故於康熙二十五年開濟運中河截流而渡黃水亦分支入海不阻遏淮流而淮得刷沙以入海誠上策也但草壩口未經造閘而移徙過東不得承淮水清流而引濁水入運河頻年黃水入口由高寶過邵伯竟入江矣運河高墊四五尺兩岸偏仄此運事之可慮者也善書法於篆隸之體講

貫尤精密謂古人一波一磔皆有至義非苟然者著字學若干卷課子以耕而不令學暇則手一編哦於清溪綠樹間時挈舟入城與二三知己劇談百日而後返素工詩善畫一入城則求者無虛日所畫梅竹松菊蘭水仙有古人法度詩多唐音不入宋派爲人題冊子及讌飲分賦援筆立就而詩題往往不署人姓字曰是何足入吾集年九十耳目聰察膚理融澤步於衢群少年捷足不及之問何能曰吾以正心爲宗主八脉爲功候非世俗所謂引導術者壽終於家子開疆孫震索

焦循曰柳庭稱王心湛文似昌黎乞爲身後作傳心湛乃序其生平大略今載缶林文集中余得據爲藍本以考見柳庭之爲人缶林之力也孫家渡及治平寺西皆有孫家花園故址未知北湖小志

卷三

五

孰爲柳庭其裔孫允泰漁於湖得一磚以遺余上鐫篆書開字徑七八寸題里人孫蘭書筆力遒健未詳所用云

徐坦菴傳第九

元美

元端

徐石麒字又陵自號坦菴其先爲浙之鄞人明初遷揚州父心繹字純之號金莪從新安陳履祥授王心齋之學二年以父疾告歸居喪哀毀里閭爲之罷鼓樂宴飲者累月履祥弔而喜焉就苦塊間論檀弓二篇而去履祥字九龍心繹學旣成九龍問曰子何所得對曰有之不怠不欺而已旣歸每日書此四字於時憲書凡書三十餘本不倦石麒承父學精研名理隱居不應試好著書其自序有談經笥八卷在茲錄四十卷詞府集絲六十卷寶儉小言六卷敘書說二卷禽愧錄五卷天籟譜二卷倦

飛集四卷藹吟四卷瓢聲四卷黍香集三卷壺天續筆二十卷
文字戲十卷宮閨粧飾五卷指水遺編六卷詩餘定譜十卷轉
注辨二卷訂正詞韻六卷談騷寤語四卷女鑑三卷吉凶影響
錄八卷見於范石湖集中者有松芝集余所見者枕函待問編
五卷爲析理講學之書多精實語趨庭訓述四卷述其父心釋
之言亦語錄之流也訂正詞韻四卷謂平聲可通者上去入皆
可通惟入聲通法人多不知蓋平聲三十韻入聲止十七韻每
不知所從故錯亂耳乃支微魚虞佳灰蕭肴豪歌麻尤十三韻
原無入聲蒸韻無上聲字故上聲止二十九蒸亦無去聲去韻
三十者秦卦分也十三元韻歷考宋人皆以前半元原等字入
先韻似有確見庚青真文自是兩韻中州中原皆不通押侵覃

北湖小志

卷三

五

鹽咸閉口音不得與真寒先通梅回杯醕等字不與齊微同用
人知之悔每對退亦不可與尾味同用人輒不察由作詩者習
用平韻上去不常用不免以土音混入耳蝸亭雜訂十卷爲考
訂之書壺天暇筆十卷壺天續筆二十卷壺天肆筆十卷皆摘
錄子史中語而辨其名實之同異古今青白眼三卷則刺取諸
史說部中評隲人品之稱彙而列之雖纂錄類書實古人所未
有也花傭月令一卷記載種花樹果蔬之書皆所試驗農家者
流也三憶草四卷白石篇一卷皆詩坦菴瑣錄四卷雜錄箴銘
語錄之類客齋餘話五卷推言陰陽名物之理以抉隱而辨惑
癸吟四卷且誦一卷皆詩餘尤精度曲入白仁甫關漢卿之室
郭士璟謂其感憤之懷寄之詩賦滑稽之致寄之南北劇吾友

凌廷堪工詞曲能造於微最稱石麒麟謂其合於元人本色其散曲有忝香集三卷雜劇有大轉輪拈花笑買花錢九奇逢珊瑚鞭辟寒釵胭脂虎范蠡浮西施諸種又有彩鸞集設爲男女贈答而絡以詩餘傳奇之變格也其詩餘又有唾餘癖佳二集未見邇言一卷間引於枕函待問編中亦明道訓俗之書也當時邑中著述之富未有能過之者府縣志僅載其趨庭訓述及天人升降圖贊圖贊乃坦菴瑣錄中之一篇也坦菴瑣錄載其家戶銘有享書堂有廳有祠堂有書房有客齋有子孫學塾有園園中有濯纓亭有帶湖樓有書室有靜室有外軒有花廳有小樓有蔭槐堂有涼軒有小軒有小齋有暖室其濯纓亭銘云前有蓮後有竹庶不獨爲君子誦其詩讀其書於今可見古人高

北湖小志

卷三

三

屋銘云短垣不礙看山眼曲徑徧宜問竹心外戶銘云留塊白雲遮屋角借灣流水隔車塵草堂銘云倚石句清疎竹外看雲人靜落花中坦菴銘云道味閒方足書懷老更殷外軒銘云鳥語移詩律茶聲靜客談小樓銘云湖山空眼界風雨著吟懷暖室銘云從酒覓佳睡對書留好顏小齋銘云音律老方解詩篇窮後工涼軒銘云無心經史外有夢水雲間門銘云閉戶不知松樹老隔溪唯見落花多又用夢游仙調作湖居好十首袁子令慕其所爲曲訪之湖中演所爲珊瑚鞭以質之錢塘李漁來則默坐終日不一論詞曲王阮亭司理揚州招致境中名士高人吳嘉紀雷士俊呂潛皆爲所網羅而石麒麟獨不往見與兒子元美女元端家庭倡和以供笑樂性傲不與市人見撰客齋餘

話則就正於孫蘭古文集則乞范奎爲之序始與羅然倩劉子
祉陳聖茹吳蘭次宗鶴問交劉陳兵死與然倩把酒詔舊悽然
淚生歌唐多令以解之作浣溪沙呈蘭次云杖履逍遙懶出山
怕他風雨做驕寒半生經畫爲投閒按候自澆花九九迎春先
埽徑三三此時應不在人間又作賀新涼云恐是愁來路借緜
山白雲一塊補聯秋樹六折山橋三面水遠却桃花幾步穩著
得閒鷗無數烟火不留林外照但蒼霞白石都堪煮歸去也豈
無故門前只有浮槎渡問年來山中甲子未曾重數車馬欲通
芳草信徧訪終南舊主敢正被猿驚鶴誤不著胡麻流水遠更
一竿乖向無名處誰信道有人住可想見其風概也子三元聲
元祐元吉皆知名

北湖小志

卷三

三

元美字懿公號松岑石麒兄宗健子也生五歲不能言一日忽
謂母曰蒲州八十三張姓翁兒前身也母驚訪諸蒲人誠有是
翁舉家以爲奇從叔父石麒隱於湖濱石麒居水南元美居水
北同以詞名有徐氏一家詞之刻旣娶王氏生二子偶就村市
星士問休咎星士推干支列宿搖目睨曰死命也默算良久瞠
而呼曰子不死必及妻子未三旬妻及二子相繼沒元美憤甚
遂爲出山計應童子試不售是時學使者例得於正考外大收
拔二三人入泮然怒諸生鬪故嚴其令令曰立就五菟者入不
及數且答諸童駭愕散其半元美以五菟拔第一順治丁酉舉
於鄉主試事者爲怨家構成獄

章皇帝震怒臨軒逮諸舉子試草茅士未嘗見

天子皆戰慄無人色又以詩賦古文非所習有不成一字者元美揮翰疾書若宿構

欽定名數前於榜明年再試名益前授淮安府學教授初至見學宮頽狀愀然曰使神聖不蔽風雨尙何以集士葺之期年而廟新士益樂趨教府道監司皆賢之以儒官時與兵餉漕河諸大政淮水漲築隄夫役不能足議召諸生充之元美請曰諸生家止有蒼頭老奴或窶則役其子弟宜別之使在國門近地餉食易有司患部署已定元美曰此易也遣一健兒持檄檄軍民前一里則國門空矣如議諸生得不困於役擢國子監丞丞掌文書最爲要職元美以經史板多蠹爛首倡修刻以丁母艱歸元美少孤母王苦節垂四十餘年母旣沒遂不仕性和易不露

北湖小志

卷三

三

圭角力不勝酒顧喜召客與談至夜分不休郡縣有公事會紳士議其不便於民者必力爭有司亦徐以其言爲允年七十三卒葬西山瘦李村所著有艾言諧聲集葉菴詩餘湖上吟

元端字延香石麒麟女也十三能詩性慧通音律石麒麟每度曲對女歌之有不合元端爲之正拍爲印記自署染花粧閣著詩餘繡閒集一卷王阮亭池北偶談云廣陵徐氏女子工填詞有人李易安之室者如珠簾輕揭憔悴憐黃葉忽憶小亭人乍別正是重陽時節當初一段清秋平分兩地離愁試向西風寄問知他還似儂不起來傭向粧臺倚亂綰凌雲髻歸期曾說柳青時鎮日慊慊只是惱春遲小園昨夜西風劣笑落漫天雪侍兒佯笑捲簾紗却道玉梅已放滿枝花獨坐數歸期花影重重日影

低無計徘徊思好句支頤除却春愁沒箇題閒倚畫樓西芳草
青青失舊隄猶記當時人去處依依紅杏花邊卓酒旗看西風
吹起滿庭碎葉閉珠戶獨坐還怯窗外芭蕉點點做盡淒切禁
不住芳心欲折殘燈挑盡隱隱半明半滅羅衾祇借香溫熱今
夜裡這愁腸勝似離別寬褪了裙兒幾摺皆繡閒集中語

焦循曰坦菴蓋隱於詞曲者也元美稱其叔沈謐寡言門無雜
賓四壁圖書終日閒坐余見其所著書推原經史探論道德豈
屯田夢窻之流哉元美沒陳霆發銘其墓石文見何有軒集故
出處之跡得而詳也范荃贈女甥徐延香詞有吾家宗老紅絲
曾綴之語知爲范家婦而婿之名字莫能考見坦菴孫輩有徐
棄疾徐芑兩人皆善詞芑號黍菴棄疾字學稼號矯園有閒情

北湖小志

卷三

五

偶寄一卷

二吳傳第十

吳綺字蘭次守湖州罷歸康熙庚午居湖有歸湖詩五首一時
名士和之時目盲自號曰聽翁號其湖中居曰岸桴又曰快堂
王武徵方岐作吳湖州後傳云乙丑移居種字林以目眚杜門
潛心宗鏡之旨又營數椽於黃子湖瓜田豆畦明農親稼花晨
月夜與高人朗士扁舟溯流菰蒲蔽虧鳧鴨凌亂一詠一歌皆
足千古然余訪其所爲岸桴者不可得或曰在市北今爲冶者
居或曰濱湖在黃珏橋市北六七里云

吳寅字秩三一字賓廬其履歷不可詳或曰曾在

南書房亦未審何官也寅過湖聞讀書聲問何地曰黃珏橋喜

曰此仁里可居也遂移家於湖亦作歸湖詩五首人和之者如綺之前事然著夢硯居詩集四卷壬午集韻詩一卷揚州舊蹟詩一卷江都費錫璜爲之序云先生彭山逸人廣陵才士紅舫烏榜家鄰黃子之湖翠苻碧蘆住近蒼鷹之宅少微羣從並麗文章太伯後昆咸工詞賦公叔嗜學每中食而忘餐孟浩爲詩常行吟而入甕搜諸子之精奧如叩洪鐘究九經之本源似探星宿揮洋洋之尺幅筆不能停擣灑灑之千言文未加點窮年賣賦寓昭明文選之樓鎮日過從同馬糞王家之巷愛女有蘭摧之痛堪憐病婦云亡乘龍非玉潤之才遂致家園盡破每臨文而興歎遂握管以摛詞寶祐城邊種花藥者成市茱萸灣北畜雁鶩者爲家痛大業之荒淫螢流故苑傷爭春之非舊草滿

北湖小志

卷三

三

荒園前此飲霞先生曾羅廣陵懷古之作聽翁太守亦多江都寄跡之篇得君百首相參真可三分並峙天驚石破峽中叫子夜之猿蕩日搖空月下嘶高秋之馬長卿湘中雜詠同此芳妍季廸姑蘇諸詩媿前瑰麗矣

焦循曰茵次歸湖詩不載林蕙堂集附見顧圖河雄雉齋集中夢硯居詩余有其七律一卷所載歸湖詩僅四首而謝鶴墅和詩有存者其原韻尙可考也備錄之吳綺詩云老愛幽棲出郭行無多水涉與山程人留別館非無意天與滄州若有情黃鳥莫辭經日轉白鷗閒訂舊時盟青鞋布襪從今始欲共閒雲過此生黃花種得向東籬較取淵明我覺遲苦有虛名緣識字未忘結習尙貪詩戴公挈榼花深日王子停船雪滿時不是傷懷

遠親舊從來猿鶴是相知水雲深處未嫌孤欲寫鴟夷泛宅圖

一曲柳塘栽菡萏數間茅屋隱菰蒲且教女子歌秋水不向君

王乞鑑湖一葉輕舟驢兩耳風光真稱白髭鬚牢落平生懶是

真春來七十二閒身雞魚未敢忘前事牛馬何堪逐後塵乞得

寒梅能作伴借將修竹可為鄰莫嗟冷寂非吾意眼底從來怕

熱人絕似牽船傍岸居檣籬竹屋計全疎閨中莫慮探空篋梁

上何曾愛破書一劍誰言迎陸賈千金幾見壽相如從教簑笠

無人識獨向黃陂號老漁顧圖河集放翁詩次韻云喜挂高帆

浩蕩行舟行錢飄然雲水不論程贈過人尚嫌塵境妨幽致春

肯使秋豪有妄情室道邨酒可賒常痛飲縱遊歸野人有舊得尋

盟訪野扁舟來往無窮樂曉冬夜夜湖中看月生東兩扇荆扉數

北湖小志 卷三 三

掩籬浴罷閒步並溪穿塢每歸遲閒客撐小艇招垂釣新製道

工僧趁分題就賦詩小豪竹哀絲真昨夢秋晚菘早韭恰當時

蔬紅塵朝暮何時了出謁此老醉眠初不知道室偶來徒倚草

亭孤江亭到處皆成一畫圖秋日疊疊沙痕留浦岸舟中蕭蕭

秋意滿菰蒲小閣意行舍北三义路舍北跬步門前萬頃湖北

窻聊舉一杯生耳熱夜醉中猶攬故人鬚夢與劉韶五百年前

賀季真秋日天將閒處著閒身閒居初吾曹自欲期千載夜讀

遺外物元和等一塵遺興錦雉白魚供野餉東村黃雞綠酒聚比

鄰日醉中即是逃名地閒遊本避浮名不避人題菴頻拈枯筆賦

幽居幽居歸老林間計未疎曝書偶見尚憶青山陪衆雋書不

論黃紙有除書彌牟鎮驛壯心耿耿人誰識郊行胎髮茸茸漆不

如夏初湖

閱盡輩流身獨健

立春後十二日
命駕至郊外

敢辭老境落樵漁

幽懷秦之俊和云不須惆悵重行行曾覓桃源幾問程世上浮名

多變態眼前舊雨最關情村春近得東西舍沙鳥新邀泉石盟
莫謂投閒堪穩臥其如不出負蒼生卜鄰幸得近東籬步履頻
過不厭遲瓦注金尊傾舊釀紙窻斑管賦新詩青山結伴從吾
好白首同歸復此時仕隱由來稱落落高懷未許俗人知閒吹
鐵笛海雲孤豈必南溟是壯圖秋水波時聞木葉夕陽斜處泛
菰蒲寒泉勿羈仙翁并夜月平分甓社湖我欲從公數問字幾
回漚酒遣長鬚拂石眠雲傍水濱年華歷盡賸閒身三條裁製
山中服十斛先消陌上塵茵苔齊闌香到枕薜蘿挂壁綠爲鄰
蒲團靜息如枯木豈有肥癯作戰人丈室橫琴賦索居交加竹

北湖小志

卷三

三

樹儘蕭疎擘窠屢蘸金壺墨煮石頻繙玉洞書脫略似君誰得
似羈愁如我復安如應知此地烟波濶不是磻溪亦可漁范荃
和云擲却塵纓自在行簡書寧復畏王程天池一息鯤鵬翼水
國還深魚鳥情松菊更教今有主菰蒲原自未寒盟秦川不用
漁人引渺渺烟波入望生萬頃湖光面檣籬春風一棹日遲遲
故人更有蘇門嘯謂孫滋九好客來吟谷口詩看竹不妨乘暇日種
桃猶自憶前時溪翁園叟逢迎好不用埋名也自知湖山蹤跡
未云孤欲剪輕綃繪作圖春雨一犁耕苜蓿秋風滿棹采菱蒲
雞豚集散黃橋市蝦菜船回赤岸湖我愧半生虛度此漫敲詩
句苦撚鬚先生近卜幽棲地賤子空餘垂老身常數通家叨未
契敢言詞賦步芳塵不妨韋布存知己雅有漁樵結比鄰歸去

當爲余仲說依然逢掖隊中人

蘭次與家伯仲同賦采芹

莫向湖干賦索居

曠觀身世稱蕭疎傳家賸有長門賦報國何須封禪書三徑風光應楚楚六時心地自如如子陵尙父終多事牢把長竿伴老漁江闔和云爲嫌囂雜愛孤行不憚崎嶇隔幾程杭林有無姑莫問市朝遠近可關情朱幡在昔留佳話白社從今得主盟琴鶴蕭蕭舟楫減還鄉仍是舊書生草堂竹閣權爲籬買得魚磯未是遲畢歲還消多少屐他年添却若干詩檢書每到更闌後擁被應忘日上時屬付兒童長閉戶姓名慢把外人知晚尋粟里豈云孤園圃溝塍總畫圖網內有魚堪作鱸案頭無筆卽編蒲開軒箇箇貪三徑放艇村村是五湖歸到藥闌支步幃不教風雨損花鬚菰蘆桑柘漸相親贏得清閒未老身剝啄外來門

北湖小志

卷三

三

有客咄嗟立辦坐無塵花村酒債終難免野寺詩僧許結鄰共羨先生真有意從容洗眼看勞人幾時伏臘守村居話到人間癩更疎不怕前賢求故錦獨疑造物妬藏書近連陽羨差相似遠恐終南遜不如廊廟未曾忘舊德肯令容易老樵漁王誥和詩僅存第三首云岸上牽船興不孤青山望似米家圖半犁春雨驅黃犢一夜東風長綠蒲筇杖扶花尋野寺竹弓射鴨蕩晴湖何妨老去情懷勝雅有風光稱白鬢王文範和云早駕籃輿北郭行青鞋布襪趁山程數株垂柳藏高隱一路啼鶯戀別情狂客自應耽野興吾徒誰與主詩盟依依雲樹愁無那欲放今宵白髮生叢菊新栽而短籬陶潛歸去豈云遲東臯曠遠常舒嘯流水清冷好賦詩霽月無雲傾酒夜青山微雨放舟時幅巾

到處無人識惟共閒鷗兩自知結得茆茨興不孤分明一幅浣
花圖閒憑驢背看紅樹醉傍漁舟泛綠蒲放眼偏能小天地忘
情惟許狎江湖田翁溪叟頻來往浮白狂呼笑捋鬢吳興薄宦
從前事今日幽棲老此身茶譜酒經常自注竹籬茅舍不侵塵
時招野鶴因爲侶偶伴孤松便作鄰莫謂晚年甘放達此生原
是謫仙人湖干我亦築幽居叢竹脩脩古木疎此地岸桴堪坐
詠吾家石屋有藏書雲容水態各居勝明月清風縱所如從此
願借棲隱去一溪春水樂耕漁時有劉半山者用其韻作感懷
詩以悼亡其詩不傳桑豸亦作感懷詩以和半山而不用其韻
亦佳話也吳寅詩云翛然俯仰此乾坤一室勞勞費討論地徧
埽除搜鼠婦籬加編葺護雞孫未聞東郭招還築却被劉伶笑

北湖小志

卷三

三

入禪市井臣來遷草莽太平田社沐秋恩宅里南濱黃子湖幽
偏果是野人居三重茅恰三間屋一寸陰堪一卷書馬鬣旣封
瞻隴畔牛衣昔臥泣窻虛蒼茫無著長貧者自顧何容料理疎
悠揚風動隔簾窺隱約青山媚遠姿蠻榼餉來幾兩屐胡牀改
罷數篇詩量晴課雨巡簷角放鳴觀魚到水涯不分喧卑箏笛
耳飽聽樵唱獨歸遲連阡井字接門闌眼界如今始放寬九折
不逢蟠板蝮百層初見拂香鸞烟生浦極朝殊暮松矗高空暑
亦寒環舍水光無際碧漫將心跡付漁竿謝九成和云蔚藍天
影漾平湖信有高人賦卜居門外問奇三徑履室中佐酒一牀
書銀蟾皓魄留真賞蒼狗浮雲幻太虛逆旅由來誰是主不妨
高臥與時疎誰道風塵興已闌襟懷磊落且教寬故山千里望

雲樹濱水一枝棲鳳鸞芝草環階原異俗狡狴活火不知寒勸
君莫縱垂綸手應有珊瑚拂釣竿霄漢何容一管窺偏於跡象
見仙姿隨風珠玉貽餘唾著筆雲霞成好詩磨劍石隨天下士
種花田接水之涯相逢三載多睽隔把臂論文莫恨遲丹崖千
仞矗天半積翠虬松鶴在巢物以占幽能辟險人應處淡念投
膠經年刺滅難知己五柳風高不泛交最愛琳琅輝四壁問誰
容易入堂坳居然斗室小乾坤來往陰晴總莫論國士無雙追
季子世家第一見公孫吾廬自愛惟容膝廣廈何人不處禪硯
兆四三曾入夢後來重器拜君恩謝天霽和云甘泉爽氣接晴
湖有客翛然此息居白板翠圍新竹樹烏衣錦照舊圖書不堪
蠻觸愁雙眼且聽滄桑幻六虛穩占一枝聊歇足何妨樵牧共

北湖小志

卷三

三

慵疎辟地誅茆放藥闌數椽不礙往來寬孤懷自分隨鷗鷺麗
藻人驚吐鳳鸞幷三重花影靜戶臨九曲夜光寒等閒無箇
能稽束高臥常時日幾竿落拓從人捩影窺肯將古榦作柔姿
松窻月挂閒聞嘯玉局棋敲慣賭詩歷歷風光欣有主蕭蕭野
興迴無涯瓜籬豆架隨田父偃息經年任拙遲應笑書生多咄
咄惟尋深處結深巢黃鐘棄毀鳴罌缶鳳喙銷沈遜蟹膠閉熱
敢辭軒冕客輸心更訂水雲交遽廬大塊原如許都付珊瑚枕
一凹昂藏七尺老乾坤屈指茫茫誰與論茅屋又看留杜甫滄
川可復止公孫不嫌僻冷湖爲沼便任疎狂室作禪耿耿舊懷
緣底事曾經簪筆侍延恩

北湖小志卷四

江都焦循著

阮將軍傳第十一

將軍名玉堂字履庭號琢菴其先由江西遷淮安始祖巖當明神宗時徙揚州生國祥國祥生文廣官榆林衛千戶文廣生秉謙秉謙四子樞敬樞良樞忠樞恭樞良生時衡將軍爲時衡子幼侗儻有志概長身健背行止偉岸與立者雖中人頂僅及胸能挽強馳射矢無虛發尤善讀書爲古文詞詩歌援筆立就中康熙辛卯科武舉人乙未成進士殿試三甲分鑲藍旗教習嘗從

聖祖幸熱河以善射授藍翎侍衛雍正癸未授三等侍衛賞戴北湖小志

卷四

一

花翎尋出爲都司管湖北撫標中軍遊擊左右營時撫標中軍改用參將大將軍岳鍾琪以將軍能保留之署參將印務改署九谿營遊擊乾隆五年五月湖南城步綏寧兩縣山內苗民數萬人盤踞山谷接辰州數百里肆出劫掠道路不通殺傷官兵鎮筵鎮總兵劉萬策討之將軍領九谿澧州洞庭常德四協營兵從萬策駐三界溪三界爲賊門戶賊悉精銳屯山口勢甚勦將軍度地勢偵探賊情六月六日進薄賊寨身倡士卒力戰賊大潰乘勝奮殺奪獲糧草器械無數賊退保各寨勢遂分六月四日攻八樹寨克之追殺數里焚其巢七月攻長安鹽井口客塞飛毛坪龍家溪竹林諸寨諸寨地險隘林菁深密將軍率衆步行冒矢石敗其伏兵鼓銳而進一日五寨皆下當是時

上慮兵權未一命貴州總督張廣泗蒞湖南總制全軍知將軍謀勇深倚重之令督各營兵進勦南山大箐賊積木石斷山路兵不能入將軍佯攻其大道陰從間道夜率健卒五百人攀藤越嶺而入墜傷膝流血滿足脛縛以布進益力轉出賊後徹木石賊覺來拒鳥槍繩火紛如亂螢將軍令衆負險偃伏藤牌護前賊至槍齊發我兵寂不動賊易之久乃鳴一大礮鼓兵直下如建瓴賊潰散正道兵無木石阻亦大進夾勦之殺獲甚多搜獲龍褲刀櫜刀標槍等器械前被害巡檢司印一顆餘賊八百戶退據南嶺糧盡不支間出數十人近營跪哭乞降將軍爲之請總制曰賊性多詐汝能任其咎耶將軍以死任之明日率賊衆近大營跪乞降總制曰發三礮不叛去降乃誠乃發礮斃數

北湖小志

卷四

二

十人衆股慄莫敢轉側始受降是時各山賊寨並破老幼退保入橫坡橫坡者險地也正路不能攻破將軍率兵由左路登奮前奪殺突入賊寨槍礮所及賊精銳俱盡生擒男婦子女累三千餘人賊寨盡平總制將盡誅所擒以盡其種將軍諫不可請曰壯夫能執兵抗師者殺之其婦女及男子十六歲以下者宜免爭不已乃許苗人環跪哭聲震山谷以功推陞河南衛輝營參將以操兵嚴巡撫効之罷歸遂居城十六年

南巡接駕奉

旨以都司錄用明年補放廣東羅定協都司二十一年陞欽州營游擊卒於官初江蘇巡撫張清恪公主武試爲將軍舉主公與總督相訐奏解職居揚州館舍將軍虞其有不測佩刀挾矢

護左右同寢食數月不少離其報知已如此九谿有北山周數十里兵民所仰給豪姓者明季指揮之裔訟言山爲其家舊地將奪之將軍力爲申辨冒洞庭之波舟幾覆卒得請於制府兵民大悅謀立祠祀之不許後去任祠立迄今祀未已也所著有珠湖草堂詩集三卷琢菴詞一卷箭譜一卷陣法二卷乾隆元年授階招勇將軍生三子承德承義承信承德生兆麟高郵外委千總承信有隱德嘗拾遺金俟其人還之又以金贖士人女俾不失所時人稱之生子元今官浙江巡撫承義子亨

焦循曰將軍沒家日凋落有僕楊祿高苗人也襁褓中將軍收育之至是令他適哭不肯去無已賣菜於市曰吾感將軍恩何忍事他主也尋復歸余聞某遊擊者勇力過人與將軍合兵攻北湖小志

卷四

勦且交善然好殺以斬人爲快其後以刃自刺死子孫無興者吾觀將軍事有以信天道之可憑也

文施畢趙傳第十二

文命時名二訓以字行居荒湖東種柳千樹名其居爲深柳堂一時高士多從之遊命時善畫蘭時謂之文蘭張庚畫徵錄謂其瘦筆乾墨運以中鋒秀勁拔俗花蔬疎眼別具神韻展玩時令人有世外之思洵士人之高致也傳其法於子九臯及婿焦

潤九臯字秋翎

施原自號曰牧民又號驢兒好驢蓄驢數十頭放於湖濱以自怡樂善畫亦以畫驢傳世以爲施驢者也

畢銳字頴君晚號山樵康熙甲辰科武進士貴州平壩衛守備

嘗以軍事駐養龍坑坑中多藏書穎君故好形家言得異本數種歸而習之遂能精辨龍穴指點多奇中當時地師莫能測也時藩帥驕恣有異志值平壩禾秀兩岐上官將以爲瑞責不獻穎君不可謬對曰平壩舊有此種非瑞也是年罷歸優游烟水間寄情於畫所作山水人物得者寶之年九十終於家趙嗣夔字南平雍正己酉科武舉人指頭畫徑丈山水性簡傲不與富貴人往來晚年力田自給自號曰鋤夫竟窮死至於無棺殮時有孫畫者蘭之族孫畫工筆人物或惜其未超乎法也又有阮竹林以畫蟹名

焦循曰康熙間湖中能詩畫者不一人大都情致高逸不逐逐於塵俗屠沽博奕之氣賴是以稀也文命時施原性資高妙寄北湖小志 卷四 四 托遙深豈真役志於當門移神於長耳哉惜乎載筆無人歷年久遠聞其風不復能訪其事而令其徒以畫名也穎君出身戎馬筆韻淵恬南平濡墨大呼不以干世卽以畫論亦豈山人名士之流乎查士標嘗寓孚佑菴所書偶落人間四字尙存居未久故不錄

郭謝常周張王傳第十三

杏隱先生姓郭氏名天奎字葵心故居城乙酉

大兵破揚州母以驚死父縋城死兄之子七齡被執去兄憂鬱病甚先生不忍避去於燹火鋒刃積屍亂骨中冒死營其兩親之殯殮甫畢慨曰兄之子不返兄死矣已而曰

王師豈掠人者毅然往師間求之雪涕嗚咽丐食而前聞者爲

之悲哀徧歷營伍幾罹危險卒得攜兄子歸以慰兄先生世醫父仰橋賣藥於南門街先生受其技至是居湖以醫濟人湖中人德之畫杏千樹坐先生其下比先生爲董奉而祝其長生也先生因以杏隱名

謝承貴字慕川子大才字燕山父子並以俠著名元末之亂揚無遺黎明太祖徙民以實此土於是謝氏自江右來始居桃花橋八傳至慕川當明季多故湖中之士皆閉戶呶唔不知時事慕川獨挾貲走四方與燕趙秦晉間豪傑遊冀規天下大計得一當以靖流賊嘗以千金貨臨洮令至其邑見其所爲知不克終遂棄貲他適旣久於外數年無家信燕山隻身走數千里尋得之力勸歸隱乃歸爲農夫力耕之餘卽以濟衆至下河買田

北湖小志

卷四

五

千畝攜家童百指牛隻耕具父子躬親課之粟大積以貸貧者見鄉曲有不順不義者叱而杖之莫敢侮亡友之家其家式微或遠處春時自攜紙錢哭奠於地有大徭役衆畏縮不前則毅然以身任胥役奸人斂手而退鄉里小兒桀驁者有所爲不敢令慕川父子聞也高傑之亂潰兵肆掠有被創者數十人竄於湖濱僵臥不能去慕川令燕山昇之村寺中滌其血汙裹之以藥哺以糜粥周旋月餘俾得全活以去生平凡三致富皆散盡慕川年九十五以終燕山年八十二以終

常用中字衡一黃珏橋人父聖敏喜浮屠說不如葷飲酒用中亦不如葷飲酒人日子幼年乃佞佛耶不答族老日子之父蔬食者有所爲也子何所爲而亦蔬食用中徐私語曰人子不得

以甘脆養其親可自食甘脆乎遂茹素終其身娶婦邵氏五年生二子桓楨而邵卒父以其盛年也令續娶以育兩子用中從容對曰恐未有性情如邵氏者轉爲兩子憂竟不復娶兄弟四人伯季早卒以楨爲伯後恤季婦延師教其孤事仲兄極恭年四十九卒病中旦夕惟呼仲兄不已他無所及郭嗣齡稱其孝親敬兄不嗜利無食色好不競勝不沽名譽吳寅爲作傳

周維藩字屏之一字藩卿孝友醇篤深于佛典歲時伏臘集高年數老諷經勸善壽踰八十鄉黨咸稱長者康熙戊子太常卿左公必蕃守揚州以扁表其門

張柯居廟頭本籍關中人善騎射重交遊有俠概爲武學生時邑令有墨聲邑民多賢同知朱公有曲直率就朱公訟令大恚

北湖小志

卷四

六

諧於制府制府故好令遂罷朱邑之民大不平日洶洶於街市聚數百人昇城隍神至令署傾水於堂曰洗堂令故健且特制府南面坐閉門縛人於是人各鳥獸散有諸生藍一采湯西京楊掖駕汝小泉等十餘人被執令訊之問誰爲首者莫敢答時柯以他事入城聞是事往瞰之見令驕狀不可忍闖然相向日張柯首事者令持筆曰何物苛者柯張目掀鬚叱曰執柯以伐柯之柯非爾之苛也爾有罪奈何訊人令不能詰繫柯等於獄而上其事制府制府怒令益肆屬獄卒置柯死卒以牛革拳柯腕痛徹心膈夜三鼓有呼於獄外者以金賂卒一奴掣刀出畫拳腕得緩其人謂諸卒曰獄猶未定宜善視諸君賈十二爲督學掾令請褫柯等衿賈痛哭訴諸人枉狀力爭得免已而令遷

去新令項公來張得釋明年應省試中武舉是爲康熙五十七年乙酉科越數年柯在京師遊郊外遇一人衣冠甚偉相視而笑曰曩者君故武斷然君義士也柯熟視憶卽來獄中者揖謝問以姓名不告而去

王仲駮字星駕居赤岸湖乾隆七年水溢愚民盜決隄有司擒治之或挾怨竄入仲駮父名逮甚急仲駮曰父老矣兒請代死慷慨就繫大吏廉得其枉曰爾貌不類犯法者駮匍匐泣涕請曰水溢六年矣隄決則死緩隄不決則死速隄決家一人死隄不決合家且死天將雨蟻知移垤而况人乎大吏曰然則爾隄隄也仲駮曰囚實不決隄然辯寃一人生達民隱則諸囚或生囚不忍一人獨生而坐視諸囚之死也大吏惻然依仲駮供疏北湖小志

卷四

七

請於

朝有

恩旨概不問

焦循曰謝燕山郭葵心王星駕挾雄桀之才舒父兄之難復能行其餘力濟衆及人孝弟爲仁之本不信然與張柯慷慨任愆隸胥短氣雖有歉于醇儒實無慙于義類也用中之行不出戶庭至性所鍾情欲忘焉是尤口譚詩禮者之所難與

王郭謝陳李常傳第十四

龐繩直 杜銘

王祖修字俊士方魏子康熙乙未歲貢生與郭嗣齡同時教授里中里中士分而從郭祖王守溪王宗陶石蕢不相下然皆以理勝者

郭嗣齡字引年一字述堂康熙乙未進士松江府學教授罷官歸華亭張榮述其槩云於乎述堂司鐸雲間將及六載誰復有知述堂者乎知之者祇有二三君子及門諸生而已述堂未第以前文名滿天下四方之負笈者固多既第以後一時之從遊者益衆俱不過專攻舉子業爲弋取科名之計若以行論知己良難卽如從前家食時半生淪落能重述堂之高風欽述堂之道範者舍李厚菴仇滄柱胡京蒙而外寥寥何不少概見也後至雲間稱莫逆者亦止予與王範之兩人已耳述堂之事兩尊人也雖就館於外甘旨畢備異味必供冬裘夏葛經時預辦婉容愉色出自孺慕之誠流露於外其孝於親者若此又能體親之心推愛宗族團聚孤嫠生養死葬更能不私已有廣親之愛

周旋姻亞濟困扶危寡婦孤兒賴以完全各節者纍纍若若無倦容無德色歲以爲常在官日不輕然諾不苟取予一塵不染胥吏苦之故其告致也有若或勸之又有若或擠之者予雖百計留之而述堂之去志決不可挽回矣述堂一生嚴氣正性動循禮法事親孝交友誠居官廉處家儉耻奔競立名節暗室勿欺衾影無愧真堪俎豆官牆與陸稼書先生後先輝映誠如史靜菴所云行將以引年重科目不屑以科目重引年也名言哉初述堂師事范石湖盡受其時文法以王文恪爲祖輔以思泉震川堅以自課卽以授徒適胡京蒙督學江南力正文體述堂之徒取拔殆盡已而張樸園督學延鄒南殷夢五佐閱文夢五於時文少許可得述堂卷大詫異言於樸園首拔之于是述堂

之名振於四方同時何焯焦袁熹方象如皆引爲同志其弟彭齡猶子浚沅長源壻謝明庚相繼登科甲天下論舉子業者推江都郭氏一門著有古文偶存集玉山詩集印山堂諸制藝稿雍正癸卯浙江鄉試聘述堂入簾爲同考官時文體尙駢往往膚泛不切述堂得金澳卷力薦之主司苦其文荒寒淡寂置第二人述堂大哭以爲非元不足以挽回風氣其以文自任如此高邨王心湛與論文始相牴牾繼而首肯以書報述堂云僕向謂守溪簡質後生學之恐少變化近得文湛持楊維斗二刻又得安溪前選總文三百三十餘篇凝神靜讀然後知不但前者之失言卽僕數十年來所奉爲先輩者皆非真先輩也守溪之法惟鶴灘荆川盡得之而猶遺其蕭疎淡遠一派宏正之間嘉

北湖小志

卷四

九

靖之初不失步趨亦間有錯綜變化之法而於守溪之妙實未之盡也降而隆萬蕩然矣舉一切洗剝傳注推廣大全之法而盡棄之舉一切質實詮理字櫛句比之法而盡棄之舉一切靈奇幻妙似對不對不對而對之法又盡棄之第標驅兼數墨有朋數文而以爲守溪守溪云乎哉時師又振振焉取必讀本子中之隆萬文而以號於人曰真先輩先輩云乎哉然守溪之不易知不但今日前輩中亦多鹵莽文楊之評強半皮相而不得其腠理楊子常蓋深知之而總序之外不見一語近惟安溪公實稱隻眼第評隲淡簡理奧旨遠後生卒難理會僕不憚老眼之眇細加評說得文一百五十餘首備目呈覽以從求誨並祈長兄指授生徒之目錄一紙見擲精加參訂則三百年祕密而

藏者和盤托出矣

謝九成字鉉玉初名鼎後改今名號鶴墅燕山子也幼時出就外傳與農賈之子雜處而九成獨錚錚鏡中適湖中諸名流聚而來觀村劇歇足師館見九成問所業曰解對句矣諸君出尋常五字句應聲答之甚捷一老乃觸所見出句難之曰雲裏紙鳶鳴赤日亦卽指所見應聲曰簷前鏡馬戰西風諸君大驚又一老嘻而摩其頂曰紙鳶對鏡馬鳴對戰已奇確何由而解赤對西乎九成肅容答曰五色安得不以五方對自是諸君歎奇絕遂號神童時時有過而試之者無不稱意以去且相與爲詩爲詞爲散雜韻語時諸老分美人十二題仿劉龍州沁園春詞九成闖其二甚捷而工是時歲科並試入學額數至簡邑千餘

北湖小志

卷四

十

士矜盼三年惟十五人而十五人之厭人望者拔十未必得五故其父兄以應試難令投筆業賈九成不敢却夜起猛力誦讀日中第株守賈所不獨賈無所利而貌益迂滯父兄知其不克賈也還令讀書乃與郭嗣齡同師事范荃荃授以經史古文之學應學使試時學使不按揚郡者五年至此方臨試九成以村僻少年首拔一幟人方疑之乃出居於城與城中時彥登堂角技都人士多頰首遜服遂歸湖益自迅厲潛修力學不競名祿思傳學於來者於是四方願學之士就謁湖濱齋舍至不能容家絃戶誦聲相接也歲科試拾青衿如芥四五十年中文風甲於四郊自是始其宗人謝震居邵伯鎮慕九成之教延於家塾邵鎮之士翕然從之所著有鶴墅詩鈔二卷樂府學步吟二卷

湖上謝氏譜一卷以諸生終兄子旭字東寅旭弟天壽字覲南號愛園並能詩高風古道里人望而生敬湖中論文學者必推三謝東寅有遺問偶集一卷覲南有來青閣詩集一卷

陳儼字敬輿一字以莊乾隆庚申歲貢生幼習負販爲布客一青衿與交易敬輿稱以先生其人怒批其頰叱曰爾著木裙目不知書何物奈何先生我敬輿大不平將報之人曰不可爾生意人敢與讀書人狡乎敬輿憤曰讀書固尊若是與曰然曰吾不爲生意人矣請改而讀書遂師事謝鉉玉盡得其學鉉玉愛之妻以女嘗手寫七經誦之精於說理郭述堂以講學自負敬輿至必歛容以待謂人曰此生理致神駿妙悟勝人其論時文宜本先正理法尤宜合題位以肖神吻時盛傳王廣心緝蠻黃

北湖小志

卷四

十一

烏文敬輿擲諸地曰摩曼之音亂人心智且於大學引喻之旨果何與乎館於公道橋阮氏以歸胡之格授其門人阮鶴隨或咻其不利於試也時學使有提試之檄取七人試極嚴稍疎者莫敢往敬輿率鶴隨就江陰試得售而歸于是衆人乃大驚服旣而館於黃巖商也一布袍未嘗自作甘泉令劉公履乾重其人爲序拆字新編刻以教後學至今里中習時文者無不以敬輿爲圭臬也年九十卒於家所著醒齋詩時文偶存草范公堤利病議子顯祖孫德瑛能世其學以教於鄉里德瑛卒遺書存吳太學宗贊家

李裕滋字問山號釀園宋忠臣李庭芝之裔居高家橋與高淡園爲鄰和易善誨人學者親之著有釀園詩集子來鶴志鼎皆

縣學生來鶴字孚中歲試得高等於次當補廩膳生無缺衆釀金爲之謀孚中拒不受不可及也

常鴻儀字象若用中子也家有別業在鴛鴦塘用中延李裕滋爲之師以吳炳陳儼爲之友共讀書其中剴切以成其學儼旣老鴻儀授徒里中里中讀書之士半出其門若范華春楊長發周玉桂裔兆奎皆其選也精於易數除夕自卜知死期明年果卒同時有龐先生者名繩直字良木嗜酒高吟不伍塵俗後生學者多從之遊後不知所終或曰沈于水其後有杜銘字容西居桃花橋以文苑教授生徒著有潭北庄詩鈔

焦循曰湖中時文之體獨能存先正風格其有牛鬼蛇神敗壞法度以求速化者一童子能笑之當是時士之貧者授徒以供北湖小志

卷四

三

衣食其相集也非會文卽談菘賦詩以市井角逐爲可耻偶涉佐訟居間則衆共遠之此風俗所由醇也自王郭以來師友講習之功不亦遠哉

吳千爲傳第十五 重光

余幼年十三四時見吳宅迎

誥命焚黃墓間賀者觀者如蚍蜉蟻子里中老人曰吳千爲故善人此其報也時千爲子重光官代州知州其親戚族姓友朋附之者無不赫赫從事於衣裘僕馬之盛吾里中變椎魯爲聲華自是始也未幾代州罷友朋散族漸凋落二子相繼死里中宅賣於他姓湖之濱幾無吳之迹矣里中人或歛噓太息曰吳千爲故善人何如是報也歷年旣遠里中後生莫知千爲爲何

如人千爲婿李君我士藏有千爲叔涵所撰千爲傳我士爲余門人李本善族兄本善父道南又與重光爲同年生求得傳以示余其敘家世最詳而於千爲之善未能言也余聞之里人云千爲產不過中人而好施予每歲暮權其里中之貧者緩急多寡析白金作數等各裹以紙納懷中昏夜按門而投有知其所爲者就而謝之則答以不知也歲以爲常其親族賴以舉火者無論焉千爲名椿年一字秋崖其先歙溪南人業鹺於揚遂入江都籍祖于鳴遷居黃珏橋生三子長訥安次岷原次涵訥安生椿年椿年甫弱冠卽佐理家政而委曲備至以求當其親心兩親沒哀毀不愆於禮與兩叔同居處生齒日繁一以至誠接之馭以公慎從無疾言厲色岷原病竭力調治藥餌之費不少

北湖小志

卷四

三

惜及卒哀痛極篤涵曰余年來老憊不堪子又幼小而維持調護幸得優游歲月者侄之力也卒之日內外大小無不痛哭流涕蓋其慈祥愷惻之意始於骨肉廣以及人凡施藥施棺貸錢貸粟皆緣孝弟睦婣推而致之者也生三子長重光乾隆己卯科舉人次耿光縣學生次世光太學生重光字宣三一字岱泉號愛廬壬辰夏棟發山西始任太原縣知縣調陽曲署絳州丁酉引

見奏對稱

旨陞代州知州署朔平府知府事以崞縣民孟姓殺人事被吏議効力軍臺其幼子慶仁跋涉出關迎父歸時以孝稱耿光子慶祺語余曰岱泉公善治邑斷獄人稱神明太原去省四十里

民多充上官胥緣公治之崇善黜惡無所顧忌民皆攝服有煤
窰一顯官屬前令封禁業主不得開公勘訊斷如法有從兄弟
爭水道不相能居間說合之人毆其兄死其人畏罪賄其弟頂
認咎公察其狀有疑反覆究得實太原有劇盜久未獲公引市
井無賴子常犯法在籍者察其材可任寬其既往開以自新衆
感奮遍歷深山窮谷得之是日黃沙滿空大索無遺擒其渠魁
通省諸劫掠案悉結在陽曲禁官錢止官當舊有七十二約支
應馬草僅存其半皆凋敝瘠薄之村蓋其餘巧爲脫而倍增以
累是也公盡復舊制時大興朱文正公爲布政使司謂公曰君
此舉可謂仁明慈惠之政也河津縣豪衿妬奸殺人縣令故寬
之公甫蒞絳州提訊得實明治其罪丙申川師凱旋過翠巖檄

北湖小志

卷四

西

公署夏縣授以指令富戶助夫馬公不可自捐廉以應不累民
前令案牘塵積民多上控公理一月皆息在代州復斗山書院
按程課士甲乙皆出已手代之人文甲於晉由公之教育云
焦循曰岱泉承陳敬輿李問山後一變而爲臺閣冠冕之文遂
自以之取鄉薦一時從遊者應府縣試多列解首可謂盛矣然
先正典型淪於肌髓一加藻績文采遂彰若第尚其文漸亡其
質披錦繡於土木靈氣俱盡何以文爲王郭之學學者或厭枯
淡而遠之吾謂文勝者濟之以忠規矩者方圓之至也肉雖多
不使勝食氣可矣

孝子傳第十六

房永興農家子也居崔家嘴目不知書而至性過人始母病孝

子刲股肉進之良已已而父病股肉不復可割乃破脅出肝以療父父又得愈未嘗使父母聞也創甚倦臥於牀母以其不力田也而責之強起擔麥隴上脅創裂枕藁而踣血淋漓漬於秉乃共知孝子割肝事扶歸臥數日創合不死又數年以病卒里人陳儼作五言詩記其事甘泉令龔公鑑立石表墓墓在黃莊橋東南七里陳家衝田戶屋側

郭癡者郭庄人母死臥棺下三年不沐不櫛不茹葷飲酒不與婦人言人以癡目之故名郭癡其名不可詳郭庄在孚佑菴之北裔瑞符云

眭四亦農家子乾隆二十六年大水踏其屋其父棺故未葬四不肯去泣涕伏棺上浮沉波中胸肉盡脫骨露血涔涔然

北湖小志

卷四

五

焦循曰余於里中求所稱孝子者僅得三人而三人者皆田家不識字之人嗚呼豈誠然哉永興之墓有碑石人猶有知之者郭癡眭四之孝出諸天性其誰知之丙寅夏水大溢棺之漂於湖者不下數百或浪擊散或倒置灘澳間皆莫知其所從來久之亦無有來尋覓者農叟因道眭四事以爲其父骨之存賴有此見余乃得聞其略不然四亦隱矣唯其隱吾益信其孝之誠然而如眭四者豈無人而莫有能傳之者耳而謂稱孝子者僅三人豈誠然哉

程翁傳第十七

程翁名維章其先泰州人世爲小兒醫尤精種痘之術與先君子交最深結廬湖中居相近每與相對默坐終日不發一語室

中若無人也翁通儒書善歌時吹笛作甘涼之聲令聽者泣自翁居湖湖中人不知有痘之害山西某令不遠三千里以驟車迎翁去見其子曰聞翁之技然不敢試也能預以狀語我乎翁撫兒良久曰當得二十九粒見某某部已而果然翁之跡唯往來邵伯鎮主孝廉張容堂家乾隆乙巳先君子棄世翁乃去爲海上遊迄今不知所終余嘗閱顛顛經其下篇言治丹之法極詳疑古人於痘槩謂之丹耳錢乙始詳治法陳文中繼之而治法相反汪機本魏桂巖作理辨以參論錢陳兩家之得失此術乃以漸而精然未有如種法之善者也相傳宋王旦得諸蜀中老媪者不可考然非聖神之妙不能爲此余幼時出痘卽翁所種後見翁治諸弟妹始以痴入鼻七日項下痛壅起如瘰癧翁北湖小志

卷四

六

曰萃於此矣於是創著而壅失凡痘家所忌此則視爲常譬之荆楚虎狼之國也晉文公伐曹衛而致之於城濮故大挫之而莫予毒爲此術者誠通乎微合於聖人治未病之義而愚者必不肯爲此以待其毒之自發必挾寒暑乘疫癘兼鬼物其勢旣熾然後議攻議補幸而勝之吾氣已奪何如消之於未萌而逐之於所及防也

裔烈娥傳第十八

楊升菴作孝烈婦唐貴梅傳歸熙甫書張貞女事皆不憚刺刺言之夫貴梅以府官毛旺受贓不獲雪而傳於升菴之女張貞女以張副使邱評事得賄將寢其事以熙甫之爭得白裔烈娥死事與張唐前後若合符節恭逢

盛世有賢太守爲之理而請旌於

朝一時紳士建祠祀之以視貴梅之遇毛旺張貞女之遇張副使邱評事幸不幸何啻霄壤向嘗彙輯府詳志傳詩文爲二卷亦云備矣然傳聞之詳略異同恐後之人惑之也復爲書其事吾鄉黃珏橋之裔姓爲望族瀕湖而居曰裔庄無他族娥家獨貧父病將死亟覓壻爲媒誤許西門孫大成時娥年二十一終喪年二十四康熙辛丑冬十月適孫媒云孫銀鋪實則磨豆乳爲業姑魏有女二人長適陳爾德次適凌九齡爾德迎父柩江西九齡父以婦不安於室控縣存案於是二女居母家有縣吏楊綏萬及孫成武與其母子通魏漸呼娥出娥扃戶自守明年正月呼益迫乃告夫約俱死碎鏡及梳具示不復爲人十三日

北湖小志

卷四

七

夜夫婦甫縊鄰覺救之不得死二月歸寧哭訴於母並告兄振遠但言有外人往來言之不明中夜持母袂泣臨去檢母篋中青白線各一縷曰兒必不玷辱祖宗是爲三月二十二日四月初三日成武綏萬相繼來宿十日不去十七日夜魏迫呼娥出娥不應魏惡詈之不應諸淫醉裸而譟窻下娥乃用青白線合上下裏衣縫紉至足更以青白線縊而死線斷墜地魏覺不救惟以婦縊駭客去盡有其裝物以病死聞其母娥之舅祖郭進士嗣齡曰母老憊兄皆鄉愚惟鄰人悲其慘嘉其烈平日以母家遠每遇非禮相遇必泣拜鄰謂將來務作證以白吾潔江都黃湄曰娥死鄰人鄉人塗之人皆奔走歎息號泣拜屍下或語侵魏魏反唇焉衆激而譁俄積數千百人懇諸府知府曲阜孔

公親鞠之獄成創諸淫如令設具親祭於柩前葬平山之右岡樹坊曰清白銘心撫軍吳公聞之給扁曰捐軀明志初娥死大成自刎不殊魏匿箱籠什物寄金麗生家鳴坊報縣言娥積銀四錢將買布爲大成索去買豆以致自縊江都令不能察會衆鳴於府府飭儀徵縣令李昭治檢驗知娥事情實乃駁縣振遠供出凌姓休婦弔閱縣卷如所供孫家僱工名二子者亦供男女曖昧本末坊差又獲孫成武於金麗生家魏氏等不能諱獄乃具余聞諸振遠曰楊綏萬縣吏也故縣庇之府終以裸諫爲綏萬諱僅科以杖不罪其強逼也哀哉然太守讞語云人非甚不得已孰肯輕棄其生黃湄爲碣文云烈婦之縊諸淫逼之諸淫之逼姑嗾之夫非嗾之逼之亦何不得已之有儀徵方覲表

其墓云諸淫伺大成他往裸諫窻下而府詳則云是日大成與裔氏同處成武等自無窘辱之事因姦威逼之條自難向孫成武等比擬嗚呼大成在室其母雖淫能呼其婦出乎孔公賢太守也而庇一縣吏吾爲之惜矣乾隆丁未間有伶人朱三者縱其妻淫呼子婦迫汗之婦不肯以剪刀殺諸雪中有所爲之說者又賂其父母家官乃不理吾友汪光熾作文以討之余亦撰樂府詞歌永其事惜不能如升菴熙甫之文足以傳婦雪婦用是思孔公之賢又何可多得也歲壬戌余在錢塘館阮撫軍署中見秀水章原姑死烈詳文先是原姑父坤元業屠姑與母居樓年十九縣隸張五者屬唐土方張勝林強委禽父不肯而許北門楊姓五乃率其徒沈文英周高謀於門誣女嘗私與之盟姑

聞大泣是夜縊死辛酉九月二十日事也議者引鄉曲愚民隨口斥辱之例欲寬五之罪撫軍不許曰始而謀娶旣而誣辱於門雖無字跡當用死律五卒議絞而姑請

旌或曰五縣隸也諱爲衣工欲寬者得毋以隸故邪余嘗錄其案於道聽錄中振遠與余爲中表親其年九十餘賣魚市中乾隆乙未夏六月縣隸陳猴者誣振遠抗魚稅繫其子辱之致其子投水死縣令王某亦以隸故不欲明其事給棺錢笞責而已振遠夫婦遂傷痛相繼死去娥死時五十三年

貞節傳第十九

陳嘉誼妻金氏本郭家橋人明萬厯巳酉遷於黃珏橋市時嘉誼年二十金年十九生一子喬數月而嘉誼卒金處始遷之地北湖小志

距母族遠日奉老姑內外無期功親陳氏之脉不絕如縷金氏上事姑得其歡心生養死葬不愆於則下撫孤子旣遂其生復誨以義守節五十八年子一人孫四人曾孫七人元孫十八人其族遂盛

國朝乾隆二年追述請

旌立祠於鎮西街吳寅題其額云節賢堂

厲恭人者阮千戶子秉謙婦也千戶罷官後秉謙沒值明季兩鎮構兵城中不可居恭人請於千戶宜避去乃懷金五十兩挈四子奉翁出北門遇亂兵以刀傷鼻流血得免止於北湖公道橋教子皆克家勤儉所積用治田宅遂致富其第三子樞忠中康熙庚戌武進士仕爲滁州衛守備恭人得

誥贈爲恭人君子曰事翁以禮孝也撫子有成慈也守貞數十
年節也知變避兵得保其宗智也今北湖阮氏稱盛族實原於
恭人恭人墓在子戶墓之北樞忠副室辛氏年二十六守節至
七十九歲卒乾隆癸卯科武舉人大武妻史氏年二十五守節
至七十歲卒武學生誥武妻朱氏年二十六守節至七十四歲
卒縣學生畫堂妻歐陽氏年二十五守節至七十三歲卒太學
生升堂妻耿氏年二十七守節至七十四歲卒恭人後以節著
者五人縣學生阮金堂副室張氏兩次刲股肉救夫一在乾隆
戊戌一在乾隆己亥生二子長承春次鴻食貧教子茹苦終身
鄉黨以爲賢母也

焦循曰昔何生婦周割股愈何生病歸熙父爲文以弔之詞云

北湖小志

卷四

二十

惟孝子之獨行兮世或議其爲奇苟毀身以全親兮又何乖於
民彝斯前世之所傳兮在人子固有之至于今而創見兮婦爲
夫而自刲夫與父其一道兮夫孰謂其非宜余錄張孺人割股
救夫事附厲恭人後已死而守之未死而救之其義一也

廟頭賈仞千妻張氏鷺鷥溝張庄人生於康熙癸巳年乾隆庚
申仞千卒時張年二十八守節三十年乾隆丙申年卒

常典女弟嫁城中孔某爲婦逾年高傑兵亂被掠常氏知不免
豫藏利刃袖中至是大呼自刲死見康熙江都縣志惜載筆者
不能詳述其事也

監生謝銑妻王氏年二十六而銑沒銑之祖天資失怙早孤奉
孀母依外家梁氏至是銑又卒王氏不欲依人織絰以給柴米

俾老姑温飽娛樂不悲喪子守節六十年當明神宗時舉於有司王氏生二子承富承貴承貴生五子大德大才士賓士賢士廕大才生五子九卿九棘九章九臯九成九臯生五子竹旭銓銓天壽旭生三子延年永年迎年延年早卒妻賈氏廟頭庠生賈汝梅女年二十三遺孤月桂甫周歲永年迎年亦相繼沒翁姑老年悲痛賴賈善慰藉之撫月桂成立善生理家業康盛凡守節四十七年乾隆甲申請於有司得

旌表月桂生二子長灼長炳皆早卒灼妻歐陽氏同鎮歐陽永年女炳妻錢氏錢家衝錢九如女歐陽年三十八錢年二十七年皆無子兩婦相輔持家和睦無間言撫族子竣爲灼後已而翁卒歐陽亦卒錢教授讀書今已弱冠錢守節亦三十年矣竣從

北湖小志

卷四

三

余遊述其家事以語余謝氏自王至錢八世而有三節婦

楊烈女黃珏橋人許字程氏子未嫁夫沒喪過其門烈女號痛不食父母勸之女曰已許程爲程婦寧論嫁不嫁乎遂自縊事見康熙江都縣志惜夫及父並不書其名詢諸里人無有能言之者甚矣序事之文不可不詳也

赤岸 湖農民貢成儀妻仇氏十五而嫁十九而孀生二子方襁褓翁姑憐其少諷之改適仇氏曰翁姑得子遲故娶媳早幸而有子媳去子誰與撫且媳卽子也子死而媳存翁又何憂願矢死力田以育兩孤君子聞其事而高之甘泉志云

農民王京華妻黃氏亦赤岸湖人夫死撫幼子力田自守豪民王姓者矚其少聳華京族人強嫁之不先令黃氏聞鄰嫗悉其

謀密以告黃氏大號哭抱子繞棺竟夜慟不絕聲強暴至則已
縊於棺側死矣湖中岸土潘人龍憤豪之橫而黃之冤鬻田授
黃氏兄弟爲伸理資令愬於官豪挾以危言黃氏兄弟懼竟寢
其事雍正江都志云

周鼎妻謝氏黃珏橋人謝象乾女年二十五而鼎沒時康熙二
十四年也謝忍死奉舅姑撫二子又中御良並成立又中卒妻
潘痛不欲生謝婉慰之共撫遺孤琨琨生玉桂玉桂生岷岱皆
世業儒謝年八十八卒於乾隆十三年守節六十二年事見常
象若祭周節婦文文中言江都陸公朝璣載入縣志今志中無
此文其續修者刪去耶特錄之

常第授妻賈氏黃珏橋人年二十一歸常第授第授故庭弱多

北湖小志

卷四

三

疾賈調護維謹踰四年第授且死念其無出有所欲言而莫吐
節婦慟失聲捐心以示卽不食常旣沒諸姒勸之賈曰吾非必
欲以死殉者舅姑老吾夫不及事吾又無所出顧唯食不下咽
耳乃強進粥以自活舅姑憐其少而孀也曰吾有他子婦一切
服勞不汝煩節婦應之而勞苦如常立第授兄子星儀爲後愛
之不啻所生每提其手哭告於夫之靈曰夫有子矣自爲發婦
凡歲時伏臘卽昏姻至戚不得復見其面年六十四而卒守節
三十九年里人陳儼作常節婦賈孀人傳亦云名列郡志而志
亦無之

奚貞女父名治臣業醫居黃珏橋市南貞女性端正不苟言笑
幼受聘許氏子學海學海幼失父母依外家病瘵女痛許孤貧

義不可親往爲調攝乞父時爲之診視躬治藥餌使家人饋遺許病劇遷僧舍欲邀女一見謂治臣曰死生夫復何言余所以依依者痛死無以爲繼而生無以爲歸也女聞卽強赴許遂卒時康熙五十六年五月五日也貞女甫十七臨棺成服葬許於許氏祖塋從此茹素去華飾有爲女重議婚者女卽絕食求死誓曰生不同室死而同穴是吾志也父母喻其志不復議嫁守貞十九年病死復甦謂父母曰許子死兒卽欲從以父母素愛兒兒不忍重傷父母心今死晚矣同穴之誓毋我違遂瞑年三十六時雍正十三年九月初五日也墓在黃珏橋西壩磯頭道旁葬之日里中文士數十人投以詩歌甘泉令龔公鑑表其墓曰玉潔冰堅今呼爲奚家老女兒墳

北湖小志

卷四

三

焦循曰余兒時每聞先母謝太孺人談奚貞女事未知著錄久而不知其夫名氏徧問人無知者佃客吳六識貞女墳固語余言十年前木坊尙存今圯矣然問其詳終莫能道也戊辰春里人張連偶於余族弟德致家見余族祖敬齋先生所撰奚貞女傳草稿急語余余求得讀之錄如右嗚呼忠孝節義之氣鬼神必左右之不令磨沒而心之精誠亦驗於是嗚呼可畏也夫潘氏赤岸湖宰士璉妻也始適士璉見其貧亟典簪珥以供翁始而勸璉習舉子業未四月璉病中死法與潘訣曰若將何爲潘曰妾之死生一視君君死妾焉得獨生今絕粒已幾日矣璉曰非也子死無益於我不如撫侄以後我則子不以我之死而死我且因子之存而存潘頷之璉卒潘一如所言家益貧日僅

具一餐而令翁姑得飽食嗣子不饑寒皆女工紡績爲之也乾隆乙卯三院具題奉

旨旌門今宰家灘之南有宰節婦坊

沙林士妻常氏年二十三而孀貧苦幾不自存教其孤永福讀書入學有聲于庠序已而永福卒常年九十守節凡六十餘年又宋鴻妻葛氏亦二十三而孀卒年八十二皆公道橋人公道橋營卒金長齡妻許氏僱爲郡城富家爨婢得值以佐夫食連年水溢米昂貴許所得不足以濟嘉慶十一年八月長齡以餓死許聞信大哭不食曰吾飽食而令夫死於餓也尙何以爲人是夜自縊死

焦循曰余旣詳述裔烈娥本末又得貞節若干人錄於篇年未

北湖小志

卷四

十四

三十而夫死守節三十年例得上於有司然非士大夫有力之家鮮有傳者匹夫匹婦生長村僻其血性所發本無所爲而爲而子孫宗族卽有知表而彰之者又且阻於勢夫霑體塗足之夫誰克登櫺星之門而詳述其事乎其湮沒而不彰可勝感哉余家奴陶裕娶於杜十年而裕死里俗夫死妻自度不能守者則葬時不詣墓裕葬杜不往哭之亦不甚哀衆人方疑之時裕父榮及幼子福以余家中落忽颺去惟杜存先太孺人憐之恐其將他適人也呼令依母家杜垂涕泣抱其孤叩頭再拜去旣依母遂與母共起居母死則依其寡姊面巖若鐵心冷若冰數十年未嘗苟笑撫其子爲之娶婦今有孫矣竟不嫁先是夫之弟瘵死翁老死杜氏皆葬之翁之父母及妻厝淺土至是並深

葬歲時寒食以羹飯紙錢拜其冢余家有事則至任僕婦之役
至今不衰余每戒余婦令善視之然杜氏固不知何者謂之節
也裕死時杜年二十七今年五十八是亦仇氏之流附述於此
以待採風者核焉

王夫人郭母傳第二十

劉向撰烈女傳分目七曰母儀曰賢明曰仁智曰貞順曰節義
曰辯通曰孽嬖范蔚宗本之所載桓少君李法姊王霸妻之事
皆不必熒鑿苦節之流也余謂女之德有三於父宜孝於夫宜
順於子宜慈貞節其變也惟變之是稱設有廉潔仁義之行教
家裕後實足以爲里郈式而雞鳴昧且偕老以終轉以其庸行
也而忽之乎且吾見温飽之族適寒素之家或至羅綺自矜恃

北湖小志

卷四

三

兄弟以偏夫黨每依父母之日多而親舅姑之日寡風俗之一
敝也至於嫁爲後母息有前兒嫌隙百生乖陵暗長或者婦有
長舌上車而問驂入室而徙曰伯叔娣弟之間分張離異男雖
不德婦實啟之大之破家毀室小之喪名播惡尤令人仰天椎
心而痛恨者也聞王夫人郭母之風庶乎其興起邪

王螺山夫人李氏明遼東巡撫李植女也生於華胄而自處若
荆布幼知書明大義明末螺山在浙右躬履行間夫人脫簪珥
以佐軍興謂螺山曰以身許國無以家爲念也螺山旣放廢歸
隱於湖湖中故有埭田一頃夫婦躬耕親負錢鏹刈禾於野與
田夫田婦相比伍母家富盛邇在郡城夫人木牀著席衣糲食
粗未嘗一顧嘗題其柱云羊求誼洽蓬茅潤梁孟心諧杵臼香

君子多其知義安貧能成夫志也

郭進士嗣齡母錢孺人父名嘉禮字儀五高隱不仕生一子三女孺人其孟也性婉靜而喜習勞稍長卽佐其父母綜家政里鄙中稱賢且能明季兄及仲妹被掠嘉禮死乃奉母及少妹僦居北湖時杏隱先生新喪配王遺一子一女於是續娶於錢時孺人年十七杏隱年三十八前婦子士震年亞於孺人孺人殫心操作慮密惠周寓慈愛於嚴肅中因各得其性情家庭雍睦無間言越十二年而生嗣齡嗣齡生弱而多疾孺人雜參於乳哺剝魚剔雀以飼少長病吐血孺人百計求適兒意每雞鳴時親調糕餌至於再至於三旣就外傅竭誠致恭於師師之家有緩急力爲之謀師感其意委心教導兒有妄動孺人輒懲戒之

北湖小志

卷四

三

不姑息已而嗣齡成進士知名於四方母教使之然也杏隱不善生事得賢婦而意益慊高吟坐獻樹杞啜茗暇與孺人鼓琴倡和偕隱湖中者五十年年八十八而卒孺人與叔姆李情好如姊妹李卒每思則泣爲士震娶於戴生子永祚無何戴卒士震旋亦卒孺人皆親處藥餌經理後事撫永祚及長爲娶於何生本曾又爲之撫而教之本曾入學爲諸生爲娶於陳生酉元爲少妹擇配於贊皇劉孝廉國裕生二女而卒又爲其長女擇配於謝明經世臣世臣客京師女又暴卒孺人自湖中入城撫其幼子朋庚俟世臣歸親付之以嗣齡女爲朋庚婦儀封張清恪公嘗稱孺人曰厚於伯氏終三代焉厚於女弟終三代焉如孺人者可謂賢婦人矣初嗣齡成進士

功令留京師教習三年拔允先用嗣齡以母病告歸歸而貧甚授徒得修脯資以供養餽時嗣齡年六十孺人年八十七里中戚友繪耆年戲綵圖歌詩題贈者盈篋又一年孺人卒

阮中丞張淨因傳曰淨因道人者父張堅甘泉公道橋北湖儒者母徐氏北湖坦庵先生曾孫女道人幼讀書習詩禮知孝義兼工繪事年二十五歸于黃事舅姑以孝聞戚黨咸呼之曰趙五娘用琵琶記故事也其孝可知家貧或以畫易米長官慕道人名求見其詩者閉門謝曰本不識字也丁卯卒年六十有七所著有綠秋書屋詩集五卷諱稱因論曰程子引詩誠不以富亦祇以異以證雖餓而民稱也有以哉道人之賢孝且藝且貧異矣非然者吾烏得而稱之

北湖小志

卷四

七

私傳第二十一

余六歲從表兄范先生學先生名徵麟字彬文號秋帆祖居廟頭賈滿范廟頭之望族也先生多識前言往行好爲詩日可得數十首與同里沈鳴謙泰州王聯爲莫逆交倡和獨多先生家赤貧授徒外不名一錢爲人謀不避嫌怨不恤勞苦時或笑以爲迂先生不顧也任天而動不雕不琢先生沒湖中人未見有性情真篤如先生者也好遊山水嘗自負囊篋步行上牛首夜臥於鹿暑蒸疾作不以爲悔有所感觸輒爲題目署紙上置便袋中歸時徐徐吟詠之有秋帆詩稿十餘帙又所記載舊事軼聞及遊記余嘗求之而不可得今先生子金又沒遺書盡失矣嗚呼是非循之罪與

余年十三學於舅氏謝君舅氏名聯芳字蕙田樸以遯寡言笑古道君子也嘗曰讀書以能背誦精熟能解爲勝當時易其言久久繹之誠爲功實而爲用遠也

王居重字容若又字尊瞻螺山先生之元孫與先君子爲中表兄弟居余家五十年田租財貨出入其手未嘗私一錢與人言兩兩如不能出諸口而遇非禮非義毅然不可犯片楮寸鐵收而藏之往往得所用涉獵史鑑好舉忠孝節烈事向村媪童孺道之年七十三卒於余家葬諸庄北原上

阮承春字載陽余婦族父也儀徵學生世居公道橋讀書好博覽性厚重共推長者嘗輯子史類書中凡顏子之言及行事編爲顏子內外篇

北湖小志

卷四

三

周玉桂字丹如屏之元孫琨子余族父軒之壻也閉戶寫書自守如處子所輯有循吏傳四書考證大學中庸文滙

門人謝文英字景張年二十六而天死惜哉生謹愿沈靜似鈍拙而有穎思余爲術筭之學門人中鮮有好者生獨信從每私問其要余授以九章三角弧矢之術不一月能推步而心知其義有志於經學屢問余余以爲宜先習舉子業授以時文生之爲時文也好雅潔幽淡而不染浮豔之習見余爲古文私竊效之頗解序事法善書初習宋元余以波磔之義語之遂知上及晉唐余病生侍疾夜不臥者十餘日禱於神請損已之壽以益余余門人數十人未有篤信善學如生者也以兄子病夜行乞醫以勞受寒而死嗚呼生不死十年後湖中以文學名四方者

匪生其誰也惜哉

焦循曰傳不可以私也傳而私者何明其爲余之所私也余所私而實有其可傳則私而不私矣然余不敢自以爲不私也故私之語云剛毅木訥近仁又云巧言令色鮮矣仁由斯而衡或亦諒余之不私也夫

北湖小志卷五

江都焦循著

書人瑞第一

乾隆丙午夏六月有乘肩輿於市者一老人負囊從之囊中皆錢童子數十人繞其輿不能前輿中人怒責負囊老人老人唯唯已而入市肆飲盡肉半觔曰吾不耐輿矣步行去負囊老人隨之不及汗浹背輿中人姚姓仁和名是日值百歲誕日謁沿湖諸神廟肩之者其兩孫負囊老人其子也年八十矣仁和髮尚黑望之若六十許人精力健於子西山林樞言爲之治酒肉以待賓客有賦詩爲之壽者明年余省婦翁渡湖與仁和適同舟問其所嚮曰將入城策蹇乎曰步行觀其貌樸而厚類有道

北湖小志

卷五

一

者然而農也先是里人將舉於有司又饜商某欲張其事仁和叩頭謝曰我農人生平未敢自放故活至今日一旦妄爲非農人所宜且促我歲用是未舉於有司或曰丙午仁和已百有一歲至此百有三歲矣仁和堰橋人

荒湖農人許子德見年九十歲生五子有祿有壽有茂有魁有福有祿見年六十七歲妻嚴氏生二子永林永發永林見年四十歲妻仇氏生二子聚山聚松聚山見年二十一歲妻李氏生子乳名穩子今四歲

書天時第二

中西之星名各有異蓋星本無定名隨所見之象以立名而記其度次耳湖間星名又各有異以參中三星橫斜若犁名曰犁

星諺云犁星落地水成冰謂十二月夜半參宿西流也以昂七星相簇曰七撮星正月七日八日觀其在月之上下在上角豐在下角歉以尾上二星爲水車星平則晴倚則雨軫爲拙婆登帳星合心房鉤鍵東咸及下天輔從官等星爲老兒星畢爲父星貫索爲荷包星天市垣之吳越齊中山九河趙魏等星爲船星北斗爲旗星以心宿爲挑燈草星荷鼓爲挑石頭星栽種收歛以諸星之伏見爲候

正月十三日於社廟前立一長竿絡以竹片懸燈百餘箇視其色以驗年之豐歉至十九日乃已十五日懸大秤人就而衡之以驗骨之輕重增損婦女擇有松柏之地環繞而行謂之鑽松三月三日簪薺菜花以祓目疾四月一日插阜茨樹枝立夏日

北湖小志

卷五

二

食豌豆芒種節爲交梅有草結小實似楊梅狀青色大如豆謂之渴睡果是日佩之立秋日食瓜八月十五日以麥作餅供月十月朔日食慈巴煮糯米和豆屑爲之十二月二十四日送竈以破瓦載飯焚於門外焚枯草作燄圃不生蟲且以占年也除夕貯水於甕稱其輕重記之明年每月初一日十一日二十一日復等其輕重輕則雨少重則雨多

嘉慶甲子四月朔天氣嚴寒草葉戴霜甚濃黑色著白衣上如染緇惟黃珏橋數里有之

黃珏橋東南里許舊時有蔣姓立貞節石坊立之夕雷起震坊粉碎遂莫敢復立此乾隆初年事嘉慶七年七月有男女十數人於管家尖刈稻適陰雲四起黑不見人田畔有廬衆以將雨

也共趨入少頃雷起廬中擊殺一家夫婦幼子三人其婦脅下一孔貫顛幼子方食乳其男子死又一處中有人間之有前夫子爲雷掣入水田中不死雷起時不甚震旣霽衆散方見屍橫於地也

書物異第三

廟頭鎮四面皆水有大竹墩又溪水環之舟而後達康熙二十二年有虎蹲竹中人繞溪外觀之莫知所從來也居一日而不見亦莫知其所從去也

乾隆乙未四月飛蝗如雪竹林木葉皆盡甚至損人衣褻傷人肌膚相負渡水穹然若梁有老婦持刀詈之竟爲嚙死蝗之盛莫過此矣然是時小麥已熟皆齧落其穗狼戾滿田而不食於北湖小志

是里中貧人攜筐擔籠拾而貯之日可得穗一石鰥寡孤獨廢疾者有養焉田主無租而窮民得食有祝蝗爲仁而拜之者亦一奇也

卷五

三

乾隆甲午秋有臭蟲自南來形如小蠶累千萬盈几席牀帳間穢氣可厭春秋所謂蜚也不傷稻而去

乾隆甲寅三月至五月不雨六月六日大雨農喜若狂伏日無盛暑酷熱市井無裸露者七月苗秀長七八寸豐年可卜矣八月之初穗頓稿折及其時一望如雪自節以下青且澤節之旁有小穴黑滲外浸折之有蟲黔首皓軀古書所云食節者蠶也災過於水旱不能與水旱同其災蝗害可捕而此蟲隱於節間不可捕書之以待格物者思所以治之也十數年前有黃蜻蜒

數萬飛繞田間遺溺苗葉則頭結而萎衆以爲社神馬嘉慶丁卯七月雨後生蟋蟀晝伏夜出食蕎麥麻豆至於再三二者亦莫知所以治之

嘉慶甲子四月湖隈生蝗農甚恐已而化爲蚊大如秋蠅齧人痛入肌膚而二麥竟免

乾隆乙巳大旱湖水涸竭民饑無食乃掘豬荸薺作屑賴以不死豬荸薺者三稜根也生湖灘圩田中高郵賈良璧有三稜賦其序云三稜者農夫所謂撒浪者也田中見之則五穀不生已未之秋郵氏大饑有闔戶自經者忽老嫗令食此物遂家傳戶曉賴以全活者數萬乃記其事而爲之賦以告後人之饑饉而無從得食者然則乙巳之食此固有所授矣

湖中三稜有兩種其一爲豬荸薺其一爲草子所謂廣陵草葛者草子所織也有家野二種家者莖高五六尺枝葉皆以三爲率湖農三月種之旣長摠起頓於一處而後分栽於畝秋刈而束之以灰漚坑中漚熟以刀刮去穢又刮之其表爲草皮用之繫物絞索其內暴乾析之成絲謂之草紗四五月紡績成布謂之草布硫黃熏之作白色以製夏衣勝於麻葛惟洗久則黑或經濕則易朽耳野者徧生湖澳間僅可絞繩不中績布嘉慶丙寅六月水退其車田稻苗潰敗者生稻孫竟秀而實其下者種晚稻多變爲稗每石相半農家分別之晚稻石得米三斗稗亦然以稗米作粥民一冬頗賴以飽書之以見黃稗不可棄

丁卯湖水涸湖隈生龍古高七八尺民刈之頗獲利龍古盡掘土中茆根以爲食沿湖日數千人僂僕如蟻余令童子掘之其狀長二三寸有毛去其浮皮白嫩甘香可烹食是物惟白茆湖有之此湖之所由名耶詩云言采其茆或卽此乎又有剛耳薺叢生如盤貧民亦采食

丁卯九月二十一日鴛鴦塘陳士連家牝彘產一象半日而瘞陳氏子持入市衆簇視之有三牙鼻長四五寸隨手伸縮謝姓者以三百錢買之保甲孫彭是日親見來語余

廟頭瞿姓者患病不能爲生理忽有大蜂帥萬餘小蜂飛繞梁間約半月成一塔高三尺徑六七寸爲七級每級有牕櫺可啟閉遠近往觀者人投一錢日釀錢數百一日蜂去瞿隨死所得

北湖小志

卷五

五

錢足供棺斂此乾隆王子事

章雞至春變爲格敦劉淵林注吳都賦云鷓鴣似鴨而雞足郭璞云一名章渠顏師古云今之水雞也然則章雞卽鷓鴣與格敦或卽鷓鴣之轉聲禮記作盍且

突黎大如鶴頸有肉囊可盛數斗口張則囊見漁人得之賣於市每日須飼魚數觔按此卽鷓也突黎正鷓之緩聲

宋家橋出瓜大者如椀小者如杯皮饒而瓢紅味甘而醇近年少遜其人力之不齊與

書金石第四

桑營之農濬塘得一頭骨大如斗有二石農得其一而以頭骨爲燈檠余族人訓蒙其地者偶見之令埋其骨索石歸余以

二金買之置半九書塾中其文多殘缺首云十二年歲次乙亥
閏二月壬辰五日其下缺次行云馬軍都指揮使金紫光祿大
檢校其下缺三行云孟璠誌銘並序則撰文之人也考自漢文
帝十四年乙亥至明崇禎八年乙亥凡次乙亥者三十一惟宋
文帝元嘉十二年乙亥以此文考之非也朱梁末帝貞明元年
淮南楊渥尙稱天祐十二年是年乙亥有閏二月天祐十二年
寶八年十國春秋是年閏
二月已亥王至自衣錦軍是石十二年三字上尙存祐字之大
半族人云初出土有大唐二字爲鋤鍤所毀遂不可識容齋三
筆記鄂州興隆寺鐘題誌云大唐天祐二年三月十五日新鑄
金紫光祿大檢校尙書左僕射兼御史大陳知新銀青光祿大
檢校尙書右僕射兼御史大楊琦大字下皆當有夫字劉原道

北湖小志

卷五

六

十國紀年楊行密之父名怵與夫同音故將佐爲諱之以此相
較其例正同則爲淮南楊氏之臣信矣乃其銘云墮雁烏號斬
蛟龍鏹一帶山河盡曾開拓定難金批擒兇鐵馬孝敬奉上恩
威臨下又云君旣傷儀臣惟洒血淮北江南流傳英烈則是淮
南開國勲臣死君之難者方張顥徐溫之殺渥也其有義形於
色寧以身殉如孔父仇牧其人者乎溫旣殺顥以大逆歸之因
獎從難之人而以禮葬之耶石文殘缺莫考其人書此以俟知
者

誦芬庄掘溝得一古磚上有朱書字置水中隱約可見竹廬都
尉曾以示余上有將軍云云時酒酣目眊不能細核明早都尉
北行及其歸問之已爲佃客作磨刀用字皆磨去矣余族父九

和言此磚上有檀道濟三字都尉言無之惜未嘗細核也
仙竹顛孚佑菴一小銅鐘明洪武甲戌鑄無鑄者姓名

北方寺鐵鐘永樂十五年四月鑄鑄者姓名有李胃韓緣陳福
黃福永卜善富饒善靜張福圓閔福元口元福僧興吉

誦芬庄觀音寺鐘成化十九年鑄鑄者姓名有馬成焦原韓亮
魏誠魏福鮑宗秦福葛林陳能張龍陳四榮鮑寬陳裕陳成陳
龍王宏信李智交口春張甫段成孫富吉寬二十二人冠以信
官又吳太口間孟成王福蔣英聞忠李口鄧浩何海王貴賀春
王玘周貴李貴口口張剛張山趙名李海趙全劉能高明張林
徵正二十四人冠以信士主持北正圓口圓清募緣僧人圓勝
又信士馬仁同男馬口口主造匠石忠胡義後又鑄通州張家

北湖小志

卷五

七

灣大口關信士張福劉氏杭宗倪氏倪興仇璫彭宗施興蕭貴
倪口于能鄭能吳口口旺夏旺周廣呂慶顧謹口同許俊榮宜
口鼎口口任華莫英董成郭通康福徐政莫文樊廣王亮陳正
吳氏莊貴王氏謝敬單敬單能曹瑄曹信李寅陳俊孟亮張名
黃景文宋玘李名隔十數行又有信士盛昭王氏口口許忠邵
能王名許鎮呂斌劉剛劉信許誠許能許潤向韋梅問呂真卜
友劉通徐俊曹全楊福張原韋金衛俊劉福陳大名李泉薛仁
梁智宋名樊貴

戒壇寺鐘正德八年鑄

廟頭司徒廟有成化時鐘見范荃詩今不存

治平寺鐵鐘一口嘉靖二十九年十一月鑄鑄姓氏江鑰鑰妻

口氏桂鎰鎰妻吳氏桂字疑亦江字江洪洪弟江清江漢王希介曹鉞

鉞男曹芸曹芳孫瑤孫琪孫必捷孫必成梁萬王昇金鎮袁瓚

梁鏗毆和口口馬氏楊盛張氏吳氏寺僧明口又有石蓮花座

萬厯三十四年八月二十四日孫有威梁之升造

大帝寺鐵鑪一座萬厯二十八年十月鑄鐫字云揚州府江都

縣豐樂鄉永豐鎮各庄人氏梁承仁陳科梁孟春金賢梁承義

姜桂程有富孫敏梁承榮盧正梁口口于富梁承智劉勝梁堯

日程科梁承基聶學汪有能聶龍梁季春曾彩劉應賢聶口梁

可聘徐科梁可讓梁錦梁進科程景周遇春孫正梁仲祿劉好

梁仲鶴曾和梁子遜梁春王宣劉科王天祿金立曹義張元劉

有禮彭文梁喜保周能張應奎大帝寺久地鑪在治平寺中其

北湖小志

卷五

地為永豐鎮及孫梁諸姓尙可賴以考見

乾隆乙巳湖水涸漁人於黃子湖得一金椀醫士秦宏一以千

錢買之識者以為金甕也後被訟於縣為縣隸取去今不知

所在

書詩話第五

許師六太史獵微閣集有題棲碧山堂詩云棲碧山堂數酒尊

為尋舊跡洗苔痕半橋遠望諸村見三載題詩片石存直引水

光搖篋笥誰從花徑老兒孫何時高臥湖邊宅夜夜濤聲入夢

魂年年車控遠鄉塵老眼時逢赤岸春愁向天公占甲子喜看

人事勝庚申吹簫橋畔多遊冶賽鼓村家說鬼神獨惜故交中

壘後一椽茅屋臥湖濱謂故人劉書秀又有凌青閣及池塘生半陰處

兩詩又湖中詩云湖邊蒼鬱甚髣髴足幽棲四牖橫高樹千村
獲短隄斷橋來客少斜日落潮低最喜田家叟驚心是馬蹄四
望少烽烟湖村慣隱眠柳青纔到地水碧欲連天花鳥三春夢
樵蘇萬古緣不須餐玉法象外說神仙赤岸松風好尋芳坐草
堂細烟開窄徑老樹架危梁燕雀閒相狎山川不盡藏何堪勞
智慧窮老理濂緇小閣池邊立嶽崎石亂投雙眸橫水面一角
露牆頭草木幽人意漁樵隱者儔纖纖風月好無事夢揚州棲
碧山堂爲許氏別業在公道橋今祠堂尙存市中祠堂祀鄉賢
許仲容及念修力臣仲容名明賢念修名承宗力臣名承宜康
熙丙辰進士官至工科給事中師六名承家康熙乙丑進士官
編修承宗承宜承家皆明賢子相傳許氏明季避地北湖故湖
北湖小志

卷五

九

中有其別業及祠墓然縣志載其避地金陵則未必居湖矣今
第據師六詩記其別業於此不復爲諸許立傳別業所在不能
詳故亦不專記如誦芬庄例也師六子昌齡亦有棲碧山堂詩
見碧摩亭集

費滋衡姊嫁黃珪橋王敏士余見滋衡手書拜姊墓詩淒楚動
人今錄之驅驢古北門道途多恍惚淒風刺人眼舊事驚慘戚
雖同處鄉縣忽忽十載隔那無親弗思水陸異周折念昨壬戌
年阿姊甫出室弟來視阿姊冒雨行空寂夜半至湖村澁泥雙
脚赤吾姊隔屏呼驚喜見顏色人事不可量修短命所厄兩氏
骨肉親展轉各棄擲今來問故道但信僕夫述其日風捲塵僵
僵日色白舉策驅我驢驢瘦苦無力昔修新橋梁缺落幾甃甃

有柳七株齊心記目不識十里淮子橋衢路渺難覓回塘一曲
逕細尋亦不得道旁多穀樹秋深都結實纍若珍珠貫圓若珊
瑚赤其他雜林數一一莽蕭瑟人心懷慘怛樹木皆鬱悒半途
賈家墳結戀暫憩息逢僧問去路前林指昏黑晚至黃珏橋舍
驢步阡陌時恐改故蹊而又開新術遙望是君家門閭今轉仄
門前開方塘仍其舊垣壁忽逢一老嫗見面若仿佛開口及姓
氏擬度果不失卒道十年事迸淚沾胸臆瑣屑話生平語不厭
倉卒嗟此隣家婦猶思阿姊德前行入其門呼應主人出上堂
拜親母次第及他室王郎新娶婦兒女已歷歷見甥復呼姊歡
與悲交集譬如接枝花同根却異質婉轉留一宿中夜自悽惻
幽幽牀下蟲涼月照白壁夢覺平生事芒刺在背脊人生天地

北湖小志

卷五

十

間聚散總何益明且上姊墓逕荒迷不卽逡巡隨人行一里至
墳域野草何蕭蕭傍添新葬骨十載無封樹那求碑碣石亂草
牛觸開古竇蛇穿入招呼守墳老移時至墓側斬藤乃下拜焚
楮烟旋息平生最好勝一旦裹荆棘傷哉泉下人知今是何夕
念此驚我魂嘔逆心不懌從此別爾去再來定何日范荃清明
坐王敏士齋次作桃源憶故人詞云花光草色還如舊正是清
明時候雨過苔痕鋪繡屐齒侵香甃爲言上巳今朝又修竹茂
林前後逸少風流俊秀被襖能從否觀此敏士亦佳士也

江閩字辰六吳湖州壻也有至黃子湖訪外舅詩云扁舟四望
水漫漫天地偏從曠野寬雉兔隨時供射獵魚蝦鎮歲足盤餐
遠連暮靄村烟碧近接秋原木葉丹一事略爲筋力累風前月

下愛投竿又題外舅快堂詩云誰謂草堂隘悠然別一天小橋
斜避樹清沼暗通泉野寺荒雲外漁舟夕照邊主人幽興熟刪
訂與徵權

吳璉字馨聞號伯菴其先山西襄陵人康熙甲寅乙卯間居湖
大會賓客其柬客詩有不用鳴鑼集之句用東坡湖上宴客事
也是年東軒落成范荃題以詩云依舊平湖十里烟憑君收拾
到堂前啣杯直吸波心月倚棹空摩鏡裡天鷗鷺別尋方外侶
琴書贖結野人緣閒來一覺朝曦滿不管花堦過八磚後伯菴
城居湖上別業屋宇垣牆多爲風雨所壞伯菴偶一至湖荃復
以詩寄慨云別後愁無極空懷天地寬故人猶繼綵衰柳自闌
珊蓬鬢秋風老絺衣夜月寒東來瞻馬首長憶路漫漫伯菴以

北湖小志

卷五

七

貢生考授鹽運使運判其本末不可詳別業亦莫知其處也
康熙間湖中文酒之集最盛如孫滋九之柳庭徐又陵之坦菴
文命時之深柳堂高蒼巖之湖西別業皆饒水竹之趣高氏尤
稱清遠范荃題湖西別業詩云湖西別業高君宅十載傳經坐
此中滿沼荷香消夏日一簾柳絮撲春風人同咸籍饒真趣客
盡鄒枚有素衷最愛東軒憑眺好水雲浩蕩帶飛鴻
郭士璟廣陵舊蹟詩詠六湖云六湖舊是桃源地問著關心總
不知一自浪驚高堰後誰看雞犬入茅籬

余有寫本漪菴詩一卷得自姑夫范珉仲家卷中有隱居湖上
答友人一首云偶爲逃鷺隱一邱長卿老矣曠交遊愛陰每植
隄邊柳寄樂時投水上釣荒館圖書聊破寂閒門衣帶嬾爲修

不堪又與風塵近慚愧違時到白頭詩有懷葉博之作又有弔
梁飲光死節詩有文壇麗澤之語則生於明季矣惜名氏不傳
僅此詩集且屬蟲殘鼠嚙之餘幾不可讀錄數首于左以見其
概立秋云昨夜梧桐葉墜柯商聲颯颯枕邊過蛩號細草增詩
料露冷牀羅偪睡魔節候已經隨髮改離騷每覺到秋多火流
瞬息衣將授太息炎涼奈若何雪牕雜詠云楊柳知春色半含
霏微雨雪暗烟嵐村茅隱樹堪充書萍葉隨流且結菴地上野
蔬清餉足杯中濁酒夢魂酣貧家瑣事皆詩意叔夜疎慵我不
堪晚霽湖干夕照明雪銷牆角尚留清柳因久潤搖新綠鳥快
初晴弄巧聲樂事可攜琴作友愁城能破酒爲兵年來白放三
春去皓首風流努力爭涼秋云涼秋寂寞荒樓市遠塵囂隔

北湖小志

卷五

十一

水西兩髻雪霜成老叟一牀風雨共荆妻澆愁囊漚唯謀寢得
句思絲嬾覓題菊瘦無言陶令嘆紙窗浙浙助人淒五言云護
菊閒驅虎敲釣學釣魚樹多驚易暮亭敞覺先涼溪雲舒卷靜
野菜短長肥壁富詩成市松枯貌近禪柳浪吹帆軟谿光浸月
斜落紅憐砌冷搖綠贈窻清殘荷風欲響流水月難圓

姜雪蒼爲僧有祝髮詩今不傳錢塘潘雪帆問奇有題雪蒼祝
髮詩刻拜鵬集中云三生石上厭華簪火宅蓮花尙可尋天下
有絲都繡佛眼中何事不灰心酒旗歌扇人猶在箬笠櫻鞵路
已深禪院尙能攜我去一龕勤禮象王金

雪蒼有旣上人詩一卷范荃謂其詩才清越筆致隱秀如舟入
漳江出入石罅清瑩如鑑細草小石歷歷可指兩岸壁立萬仞

如削蒼翠欲滴其篙師舵工非長年三老則觸石立碎以故舟
中之人俯仰瞻盼應接不暇今錄數首於左歸湖云市喧難久
住旦夕思湖陰布衲出城遠春光入我深風含慈母意草挾少
年心自覺歸途直徐徐聽暖禽過范石城齋留壁云如此開軒
坐東風意若何自然來樹色忽復有禽歌天地故人少草茅元
氣多前溪將結夏莫更懶相過獨眺寄月樵云君應開戶立漠
漠野田空我亦橫襟坐茫茫水國東斜風雙鳥白細雨一花紅
咫尺春無限幽思何路通清明節云只此一枝柳年年折若何
冷祠田父酒荒塚牧兒歌白髮芟仍出青雲變已多且拈花作
供空色兩隨他林間候鶯語云黃鳥來何暮青春去已賒能無
思故柳亦恐見殘花嘖嘖燕多喜紛紛蜂自譁好音終不遠芳

北湖小志

卷五

三

樹滿天涯沙香洲茅舍落成喜修慧師遠至云數椽今始就竹
樹繞溪回我但隨緣住君能爲法來板橋支臥柳水鳥近香臺
十八賢如會白花應再開院中蝶云低昂惟有影來去各無言
不入羣蜂伍知爲異草魂風多家未定雨暗夢何存若是繞花
思安能戀水園歲暮七律云刺面風沙斷旅魂浮生只覺寡營
尊樵枝爛足三冬火野雪深封十日門有客贈梅先索偈與禽
分粒各無言何須榭榭攢頑石朝夕鐘聲到四村雪中云板橋
無蹟過荒汀玉樹橫溪倒影停縮項水禽方咄咄秃脣蔬甲漫
惺惺龕留火緒生晨爨竹作冰聲入夜聽欲乞寒花供大士北
山人去掩空庭月下與慧修山雨二師納涼云竹樹玲瓏月幾
層娟娟螢火挂疎藤三分夜氣初降暑一片秋心已化冰風便

乍聞荒寺鼓溪回斜見遠村燈坐深若問無生事今日茶香且
未能試燈夕坐如是菴感舊云殘雪千門晚乍晴居然簫鼓亂
春聲莫教商女歌瓊樹忍聽何戡唱渭城烟市夜闌燈易散竹
堦人靜月孤明開窗又是三年矣幾點寒花太瘦生答夏次功
云俯仰無聊愧衲衣敢將饑渴附歌薇風吹鳴鳥春何遠月落
空梁夢已非天下士如君尚隱山中雲笑我遲歸肯來湖曲尋
蓮社人在瀟瀟水竹圍張赤城瑤房伯仲移居橋墅云我欲成
茅君復移圖書雞犬一舟持何人於世得無累此日不貧翻可
疑講席尊嚴無道在山田磽瘠有秋遲獨憐煮水澄湖畔少却
二難來誦詩又張無違移居五言二首云不肯憐華綺翩然來
卜居聲光生畎畝風味見詩書種秫將爲酒垂綸豈在魚樵青

北湖小志

卷五

古

家自有寵錫更何如長統能全志田園可樂賓德公知遯跡妻
子亦超塵何事宜今日如君類古人南溪有鐘磬且夕引爲鄰
無違亦當時高士湖中人絕無知者賴此以見
梅衛瞻琇江都詩人也嘗往來湖中與陳浩海陸价人范石湖
呂尊舟訂詩酒之社有寄陸价人詩云故人新歲見一倍語寒
溫霜雪存肝膽江湖越夢魂承歡聊菽水養拙且柴門梅柳沙
村路春風約酒尊刻其鴻堂詩稿中又有常兆熊招集詩云會
著衝泥屐來尋大隱居柴門殘雪後蘭徑蕙風初紅縷吳江鱸
青絲楚岸蔬邀懽兼悵別把酒意躊躇

徐坦菴范石湖羅然倩爲北湖三詞家坦菴詞集久行於世石
湖嘗與徐松岑合刻諧聲集今不傳然余有其詞百餘首擬與

坦菴詞合刻別行唯然倩所著霞汀詩餘零落不多見僅得九
首備錄之以存其梗概晚坐浣溪沙云斷岸頽橋瀉水痕淡烟
濃樹倚孤村不須高手仿雲林幾點疎星行客夢一灣新月女
兒心誰家搔首怨黃昏春閨卜筭子云日午怕梳頭不擬妝成
豔才把青銅還又拋羞與儂相見強欲理瑤編著指心先倦小
語喃喃會罵人輸與梁間燕漁父畫堂春云波光遠映蔚藍天
朝來賣有魚錢瓦盆擎處荻花偏醉了重眠不管秋風叢桂寧
知春夜啼鵲妻兒團坐席帆前閒看雙鴛美人南柯子云瘦約
裙拖翠障羞扇影蕉妝成好處轉無聊手把一編深坐背花雕
無語情偏篤含嗔臉更嬌新詩幾字抵投桃試問三生石上怎
生消臨江仙云昨夜海棠開徧矣朝來幾片飛英推窗聞喚乳

北湖小志

卷五

五

鶯聲沈吟如有句殘夢未分明記得當年隄畔見流光屈指堪
驚無端暮雨與朝晴檻花迎淚眼山鳥伴愁更鷓鴣天云破壁
何堪風雨侵又兼門外水痕深持竿展畫開昏眼拾火烹茶候
嫩音敲幾字跋雲林松風熟後坐簷陰酒家未解耽清玩不質
螭頭水玉簪南鄉子云疎雨濕檐廊一片虛明在小牕睡起脩
然無箇事蒼涼幾點殘紅落硯旁何事恨偏長欲寫新詩怕愴
傷一自玉人歸去也他鄉臨水登山總斷腸蝶戀花云漏無聲
人語悄洗却胭脂一點唇兒小繡被春深寒尙峭情多只恨宵
陰少百舌頻催曉易曉握手匆匆秣馬鳴芳草幾寸衣裳寬褪
了憑誰寫去相思稿玉樓春云爲誰消瘦悲紈扇旅夢天涯尋
欲遍遠書細寫紙條兒央及梁間飛乳燕支離不穩青絲篔簹才

剔銀燈心已倦誰家乘夜搗秋砧又送新愁來小院

羅然倩詩集不可得有句云竹間偶坐尋苔跡花外間行待酒人其高致可見

葉敬白華堂詩有龐大繩直從黃子湖寄書附示近詩兼惠佳味賦謝七律一首云吾愛風流龐士元湖光千疊到柴門緘題碧簡驚長夢潑刺銀鱗佐晚飧半尺烏絲分異錦十年青鬢隔金尊何當閒夜聯吟去捕蟹篝燈入水村

范荃哭黃澹園詩云衰病催君未老年多時余已重潛然看花忽敗前春興畏藥惟宜白晝眠橋市每聞傷躑躅城闌猶憶共流連可憐竟逐東風化聊贈泉臺買醉錢君去泉臺最可傷故人星散恨茫茫閒齋不復爲懸榻野肆何堪更舉觴地下有緣

北湖小志

卷五

六

尋勝侶天涯無路問家鄉遺孤未識憑誰托辜負青樽一脉香
弔呂蓴舟云三徑曾邀二仲遊霜庭剛報木瓜收吟酣絳蠟揮
紈扇談濕青衫顧蒯緱俠氣尙留眉宇在禪心已共水雲浮故
人未及生芻奠丹旄能爲范式留哭羅然倩云極目秋江泣斷
雲蒼天何意喪斯文一春梅放傷朝雨五月榴開醉夕曛做快
尙留新政字荒山空見未成墳從今得句憑誰正破硯殘書擬
盡焚江雲秋水慘鱗鱗結得霞汀去後身草色一庭留別恨蘋
烟兩岸伴孤鄰月沈山曲添新冢風滿湖頭哭故人我欲招魂
君至否水邊花裏薦清醇訪文秋翎五律云獨步秋郊晚行行
入雁羣稻香留滯穗人影逐斜曛倚樹看紅葉臨流弄白雲醉
容真可掬強半爲愁分借郝騏生暨仲子雯生歸湖云與君攜

手去還來城市風塵倦眼開馬上何人揮錦袖甕邊有客乞殘
杯天涯莫怨同飄泊水國猶堪一溯洄歸去閉門惟教子遺經
忍令付蒿萊陪王薊城先生過孫柳庭云鞭影依依識舊遊望
中樓閣盡荒邱曾酣歌舞娛長夜却賦離騷到晚秋柳陌故人
堪問字沙汀殘照倦凝眸勞勞又欲同分手月上平湖起暮愁
雨中偕喬江樵小飲云春烟飛不起帶雨壓湖村鳥靜雲低樹
人間晝掩門問花添勝侶把酒愛清言戶外風濤滿歡顏藉此
軒午日郭葵心招集云杯酒關何事知音只幾人好花看易醉
往事聽如新世味老能諳交情久愈真無勞重天問此地有芳
鄰花下憶郭南池談子正兼送施偉男之東臺云十載看花逸
興宜花時常只繫閒思談經客負春風坐漉酒人添宿草悲兒

北湖小志

卷五

七

女漸聞徵往事髮毛應悔誤當時相逢莫厭歸途晚又聽尊前
話別離輓文成翁云先生杖履尙依依曉日湖頭坐釣磯酒熟
故人情易好雲閒孤館事全非春回喜見雙龍起老去徒傷一
雁飛指點畫圖延佇久風塵何處拂征衣諸詩可考見湖中人
物

謝鶴墅吳賓廬高東啟每集張虎臣水樓鶴墅詩云湖流遶宅
儼輕雷花逕三三爲客開季子舊盟曾我及達夫新句有誰來
擣筇擬看長空月選石應憐積翠苔底事陰陽都莫計共尋百
尺遠塵埃賓廬詩云秋菰香碧敵吳葦颯颯西風倒葛巾爲愛
烟波登峻閣得看鷗鳥盡閒人點烹舊約推鴻漸酪酏今遭讓
伯倫近水遊踪千古意入簾涼月一鉤新時又有許近三葛西

有亦詩人每宴集其宅皆不詳其本末

王暮字戩西和范荃滿江紅云爲憶當年同住在湖天深處茅屋小望衡對宇侶鷗盟鷺貫酒每從花下醉鬪題常共燈前賦正翩翩裙屐少年時相依附戩西亦湖居者也范荃有秋花雜詠一卷作於明季王暮跋其後自稱蔗堂

梁五癸之女嫁邵伯鎮龔御公御公貨殖於外梁教其子諧聲習詩古文有聲庠序御公歿諸聲奉母遷居黃珏橋市詩社文壇幾無暇日諧聲子景堂亦佳士也梁年七十六而卒病中延高郵張祿民寫真梁自題其像有憔悴形容入畫圖之句

謝良瑜字鍾山邵伯鎮人所著畦園集有重陽日集孚佑菴詩云鍊馬樓頭戰欲酣西風吹雁度晴嵐黃花黯淡開三徑古木

北湖小志

卷五

六

蕭森護一菴不識殘軀隨葉脫特來仙境覓珠探重陽此會人間少喜降羣真其指南時集者有周定陽史健陽許石陽皆道士也又有過蕪城墩訪慈旨上人詩云直向菩提訪石龕水圍木抱遂幽探僧寮流出雲千樹客履潛窺菊一潭柳市漸疎風欲勁松街耐晚雪應慚禪心已共秋情澹對此如逢覲面談又贈慈旨僧云知飯熟時都是火識琴中趣不勞弦

歐陽騫年少工文詩才敏妙有愛鳥多栽樹招山短插籬之句贈炙人口甫冠卽卒時人惜之目爲小歐九

書軼聞第六

范氏大樓在廟頭司徒廟南門裏以鍊牆有洞可置鳥槍其地當黃子湖廟灣之支流明季多盜地當其衝故爲樓以禦之先

君子云范氏饒於財明季屢被盜一日寇至家人皆避去一童被執盜拷積蓄所在童不言剖其腹血上噴壁間百餘年來其跡不滅又一日寇至家人皆避去令十數佃客守家盜明火利刃勢極凶熾一佃客云與閉門拒之不若開門禦之鼓勇率衆力鬪氣百倍盜潰棄械而遁明日視之其矛皆以枯魚縛竿首黑夜視之如刃然若童與佃客可謂能忠其主矣惜未問得姓名不克爲之立傳也康熙時有名士佳者居之士佳仕爲涼州府同知罷官後樓歸其族人德言德言於樓側種萱一畝築亭臨之花時鼓琴其中以娛樂其母旣而爲沈氏倉嘉慶甲子始拆毀今無其跡

張志雲字際五號慕槐其先鄞人也父以材武得官防禦多善

北湖小志

卷五

九

績獲罪免官來居黃珏橋市而浮海賈貨以舟溺蕭然無一物存耻見妻子不肯歸志雲少長旣締昏郭氏而歲毅然棄家出尋父幼稚不慣行路又行李困敝更閱歲欣然奉其父歸問其狀始出茫然直渡錢塘歷天台雁蕩間所攜止筆墨素紙到處見山水花樹鳥獸皆握筆摹其似漸卽所見人貌之稍異者畢收之紙上自覺此技可通於神旣得父所父曰吾老矣歸何以食志雲曰兒筆可代耕也父疑之徧訪吳越間老畫師示以所作畫幅輒太息曰此天授非人力也志雲遂以畫名亦能詩與郡中諸名士月一會爭雄長焉

裔之爲氏惟湖中有之余聞諸先君子云明功臣徐馬兒之後也馬兒坐藍黨其子孫改易姓名逃匿湖中於今蓋五百年其

先世神主內仍書徐某凡祭祀告神之文亦書徐湖中有裔家集裔家莊族甚蕃衍世以耕讀爲業今亦散處四方

湖中常氏相傳爲明開平王後在明季姓胡雍正開始復姓常改姓之由不可知也常之先賣藥於市其肆尙稱胡家藥店元末經張士誠之亂洪武定戶江都止存十八家其最著者有火郝二姓湖中火家洪郝家樓其聚族處也今二姓他徙無一存者尙稱其地爲火郝鄉相傳黃珏橋隄未築之先自陸家嘴設渡達劉家嘴名三陳家渡今稱渡船港者卽其處也渡南陳姓最富有園亭樓榭名陳家樓渡北則火郝爲巨族自渡口而東有街市人烟轉集商旅往來河淮旣合滙爲六湖市移而西是渡乃廢

北湖小志

卷五

十

前明孫梁二姓爲湖中望族有孫某與梁飲光同時爲縣令梁死難孫迎降迄今里中人有梁忠孫不忠之謠

裔翁富於財當明季河伯爲災上下河艱於疏理翁親赴邑中願輸家財以通水利於邵伯鎮北造閘一座隄之北水自上流而下隄之左右百里居民實利賴之因名裔家閘今改爲嵇家閘翁之元孫德林字子懋事見謝九成祭子懋文惜翁名字不可得

陳敬菴幼失父母事王父母以孝稱王父疾篤刲左臂肉和藥以進事見常鴻儀祭敬菴文惜本末不詳又陳儼祭范翁文言其生八歲而孤事母以孝母有疾稽顙北辰求以身代割股肉和湯藥以進母沒哀毀踰禮又言生平言笑不苟遇人無貴賤

大小一待以誠實不欺敬惜字紙合藥濟人買禽魚放生種種善行不可枚舉篤學至老不倦經史子集外佛書醫卜之類靡不究心尤長于詩詞康熙癸未秋夢異僧來迎辛丑二月初七日易簣時亦稱有佛在座歿之日里人士無不墮淚草稿中不填寫名字遂莫究何人也錄於軼聞以俟知者

湖中文學舊推鷺鷥溝張氏一門張濩字二我康熙辛酉舉人子思武字韶聞雍正丙午舉人生三子長重基字學田縣學生仲重淑字儀一乾隆丙辰舉人季重培字自申雍正己酉舉人韶聞精青烏家言嘗擇地葬其先以爲必連得科第是科已中式發榜時以對策引佛經語被黜相墓再三日誤矣亟改向果五年而得三孝廉

北湖小志

卷五

三

滿肖字青扶廟頭人少聰雋有儀容陳公宏謀守郡時極愛之曰揚州之士吾得滿謝兩生然滿以文勝不如謝以福勝謝謂少司寇溶生也滿竟以諸生終

謝余詮題裔虔翁室扁云歲丁卯其先大人寢疾虔翁徧訪醫藥繼則割股肉以進迨戊戌季夏虔翁病令女少君亦割股肉以進其爲父子足法矣閨門之間漸而鄉國風俗所由隆也虔翁名不詳

乾隆辛巳大水農人陳在甫乘舟於怒濤中鉤取器物遇其戚負一兒於背抱棟漂水中呼救陳攘其木而推戚於水所負兒遂死戚漂至金灣遇拯得活明日趨至陳家面唾而責之陳遂不齒於人陳死久矣家貲蕩盡其子爲竊賊咸以爲其父之報

也書此爲鄉人戒

鄉里有醵錢搖勝會者獲之常敘五父常翁以敘五省試無資
斧言於同會友請讓借適前搖者已有三十三點拒不肯矜甚
翁持盃仰天呼曰兒若得鄉薦將軍佩印來搖之得點三十四
凡五枚得六一枚得四俗謂之將軍印是科敘五登賢書阮丈
達陽說

余里中常翁名森南富於財如廁一白鏹在地俗以金銀之俶
露者爲不吉森南唾之曰爾無禮乃不衣冠見我耶不顧而去
已而悔之曰奈何不取然見之良久廁上不一人將他人有矣
復往視之白鏹故在已風吹一紙覆之不更俛露仍拾歸他人
竟未見信乎得失之有數一鏹且然况大於此乎

北湖小志

卷五

三

黃袞公道橋人草書入懷素之室每大書鵝字得者珍藏之
聖祖南巡袞年九十迎

鑿獻字賞大緞二疋

書賈夏老者浙江龍游人與湖上諸文人遊順治初遂居湖性
慇直不好諛佞見不平輒攘臂爭是非動引古聖賢面折之晚
年喜星家言爲人推行星命必引福善禍淫之理委曲開喻贈
貽不計多寡貧乏者不惟不取且隨力資給之既老而貧麥飯
豆粥日得再食便忻然自得非其道豪髮不肯妄干徐坦菴逝
奔赴啼哭如嬰兒范荃撰夏老傳以弔之

歐陽復旦字爽谷號晴峯公道橋人善畫妙語言嘗遊城南秋
雨菴菴僧竹溪以水請盥作禪語曰居士六根清淨請洗沐爽

谷潑其水谷曰六根既淨又焉用洗又嘗過山東青駝寺寺僧托病不起爽谷故知醫強爲之診曰此證虛須人參吾行篋中有此當持贈僧頓立起情色極恭爽谷凝視良久謂僧曰才細察爾面色非真虛參可不用矣題一詩於壁而去

書鬼神第七

族人焦建維居公道橋娶一營卒婦婦攜其前夫女來同居年十八矣嘉慶十二年女忽目直視僵臥氣絕但身溫軟不卽殮良久甦曰適對簿來前生爲王林妻林業銀匠有幕客石先生者以金五十兩銀百兩令鎔作器林利之始令妻餌以色妻不肯復與妻謀殺之妻又不肯旣而殺於某橋下埋其屍人無知者今石先生控於帝矣言已又僵而又甦如是者五日案已結

北湖小志

卷五

三

王林生六合縣富戶逮至年十五六面白如粉衣飾鮮美項下有金鎖圈一訊而服以妻不同謀釋回而林已下春磨獄始訊者有大老爺三老爺大老爺面東坐三老爺面南坐獄旣定俟五老爺成之其始過一橋危不敢獨行有一人以手援之女怒斥曰吾女子豈可受爾援其人乃接以馬策曰我爾生父陳文節也無畏當護爾於是五次皆過橋皆以策援道渴甚見甌水欲飲之陳以策擊甌碎訊時梏兩手痛甚視兩手指果青腫其大老爺與一丸藥令吞甦時尚在喉若沙石飲以湯乃下嗚呼余觀搜神還冤等記以爲儒者之寓言然狐笑之御申生灌夫之守田蚡彭彭於經史者詎皆虛論耶神道設教聖人誠有以通乎幽明之故其跡似怪其理實庸建維不諱其事而鄰里鄉

黨罔不目覩而親見之特書於此以爲後人勸閱者勿以爲荒誕而忽之也

梁姓者東庄嘴人偶腹脹以刀割之腸出又自官呼郭姓者視之言餓郭飲以粥已而稱心若絞宛轉以死或曰梁嘗盜神像

壯中物故有此報或曰有淫惡戊辰春正月事裔德宏說黃珏橋東嶽廟余既記其靈異於卷二而神之昭著非一事也廟本高氏建造高之裔有爲僧者住廟中不守戒律跡殊穢褻一日登案上爲神易衣神掌忽起擊其頰踏於地高懼甚徙他處

水災之後湖中人鬼相雜有宰姓婦居赤岸湖素愿弱且懷娠將免矣有神附之男子前導亦作神語導者躍宰婦緩步張拱

北湖小志

卷五

西

翼如每至人家宅中南面立索焚紙錠或許以血食乃去然見土神詞則拜嘗至吾友王景升家其導者望門而唾曰好大火氣少時宰婦來景升稍稍折之亦自斂退余憶一說部書中記有嶽神憑婦人者或詰之曰神正直何爲依婦人神語塞乃自白其爲鬼非真嶽神也宰婦亦其類耳又有憑以至木工家者木工持斧大呼曰不退將斫爾其人竟去

書疑義第八

劉一清祈請使行程記云德祐丙子三月初三日宿灣頭初四日過邵伯鎮徑行一堡子濶六十里北軍屯戊又有水寨屯軍甚多內有小堡子六十餘所波羅相公阿里右丞在內初五日過天長縣初六日渡天長河初七日過寶應軍按元史元兵屯

新城此言濶六十里則凡今北湖之地皆其屯所天長河蓋卽今秦蘭河是時高郵以東尙爲宋有故自邵伯鎮迂天長而至寶應軍以今地推之或由楊家渡或由湯家泮西至楊獸醫壩而北一清謂路上屍骨如山則秦蘭以南邵伯鎮以西豈尙得案堵無恐余所居之地舊名倪萬二庄相傳爲宋元舊族余族自永樂時卜居於此倪萬已不復有人則盡於前此之兵荒可想而知也嘉靖維揚志舊圖於黃珏橋之東皆標水寨蓋南宋時地邇淮泗爲兵防戒嚴之地惟黃河北流旣斷全力注淮漕隄東諸湖之水滙三十六陂而爲一昔時兵火之場悉縕於湖故明中葉以後士大夫多棲息於此府縣志稱宋元人避地北湖是未深考耳

北湖小志

卷五

五

黃珏橋北十里有土城口其北有治平寺寺後有南王墩又稱南王墓耕田者嘗於墩上得鐵繩端自土中出按元世祖封脫歡爲鎮南王出鎮揚州世襲其爵自老章及脫不花孛羅不花皆爲之此其墓耶土城蓋亦宋元間堡寨之遺

舊志言九龍山在城西南十五里豐樂鄉下接湖水按九龍山卽九龍岡當云去城北五十里若西南十五里無豐樂鄉亦無湖水也

宋真宗天禧間江淮發運使賈宗言歲漕自真陽入淮汴歷堰者五糧載煩於剝卸議開揚州古河繚城南接運渠毀龍舟新興茱萸三堰鑿近堰漕路以均水勢時王臻爲淮南轉運副使言揚州召伯堰實謝安爲之人思其功以比召伯不可廢也濬

渠亦無所益坐異議降監察御史發運司卒濬渠薛奎傳亦言奎爲江淮制置發運使疏漕河廢三堰以便餉運按五堰者北神召伯茱萸新與龍舟也賈宗建議而薛奎行之而所毀者新興龍舟茱萸三堰召伯北神尙存其後殿直王乙請自召伯埭東至瓜洲浚河百二十里以廢二埭江淮制置發運使以工大不可就止置牖召伯埭旁人以爲利然則雖置牖而埭在夢溪筆談言北神召伯諸埭相次廢革至今爲利則乙之後召伯埭終廢矣今之召伯鎮非古之召伯埭也王乙言召埭東濬河百二十里至瓜洲則當時埭在運河之西橫隔水中故有剝卸之煩且今召伯鎮至瓜洲止九十里此云一百二十里則召埭必非召鎮鎮當新城湖之東而召伯湖在鎮北二十里湖名召伯北湖小志

卷五

五

必召埭之所在竊疑湯家泮橫亘東西實界南北古之召埭或設於此是則埭在西而河在東與王乙之言合也

太平寰宇記引西征記以吳王釣臺在雷陂按今新城湖楊家渡之南有高阜阜上有松影菴土人呼爲釣魚臺相傳卽吳王釣臺此地去雷塘甚遠西征記作於戴祚其書最古所云雷陂果卽今之雷塘耶廣陵故城在府北十八里今之雷塘在府北十里當漢時且在廣陵城南而廣陵城已近北湖名相襲而方已移故書之所記與故老之所傳兩存焉可也

冢記云齊褚澄有遺書多言修養及醫藥事刻石十八片以爲柳時太清三年題曰有齊褚澄所歸後爲蕭廣所得遺命子淵復爲柳淵用石一片刻敘其上葬於廣陵城北三十五里陳源

橋久之亦被發書傳于世城北三十五里正在北湖陳源橋則不知所在

舊志鳳凰林在城北三十二里招賢鄉宋理宗紹定四年有鳳鳥至故名按今城北無鳳凰林地名惟楊獸醫壩西南有鳳子嶺疑卽此也

黃珏橋南七八里西來菴之南有耿家閘閘南有耿王墳閘北亦有一墳碑上書少司馬大中丞青藜耿公之墓康熙元年立詢之士人言數十年無省墓者郡縣志均無可考記于此以待知者

北湖小志卷六

江都焦循著

家述上

余村舊爲上下兩庄在黃珏橋西南半里許聚族而居屋瓦相接庄後種竹竹外老樹千餘株樹間有樓數里外見之人稱曰焦家樓乾隆間歲苦於水族漸他徙業旣零落丁口亦稀兩庄所存之屋十之二三而已焦氏之先或云自山左來未有徵也伯高祖明遴始創湖上焦氏譜系僅以居揚州北湖者爲斷其他遂莫可考今因之以載於篇

焦氏明初居江都東鄉八港口有祖號望武素敬事真武神最誠夢神促之行曰此地有大厄不可居乃遷於城北澗陳壩之北湖小志

卷六

西未幾靖難兵南渡八港口竟罹於難於是吾族益敬事真武神不祀者非吾族也望武生二子名字不傳分東西分東分生廣始遷下庄廣生有有生鼎鼎生遷遷有厚德舊譜云去世久遠聲名猶載口碑惜乎本末不能備也生四子長府沒於明季金溝河之役次庫幼卒次文科生四子次女舉生七子共十一房爲循高祖輩十一房生四十七房爲循曾祖輩四十七房生九十房爲循祖輩九十房生百二十房爲循父輩文科字仰湖其後爲西分文舉字少湖其後爲東分

西分四房明峻明暘明顯明德明峻生三子必茂必蕙必美必蕙生二子長復榮次亮亮嗣必茂生德潤德潤生彭壽絕明暘字震鳴循高王父也生四子長泰來次必萃次豫來次師來師

來後改名源循曾王父也泰來字廣生縣學生生三子燦焰熒
焰生鶴林嵩林鶴林生增必萃字拔之卒於順治丁亥十月娶
樊孺人年十九妊遺腹孤才兩月孺人忍痛保身明年四月孤
生名鑑孺人撫而教之既成立生子遐齡遐齡年三十而卒妻
劉未三十也苦節終其身劉生三子廕侯爵侯又早卒妻蕭苦
守十八年窮餓而死四世有三節婦惟樊孺人舉於有司樊孺
人處妯娌間和婉藹然時而正色立言則霜氣逼人毛髮莫之
敢近凡守節六十一年邑志云四十四年據舉於有司時也循
曾祖母卞孺人父卞公無子憐女不令習女紅延師教以詩畫
卞孺人遂工詩善畫山水花卉嫁時箱匱皆孺人自繪而題以
詩循幼時尚見匱上詩嫡母謝孺人每抱循手指而誦之述其

北湖小志

卷六

二

爲卞孺人作也族間諸娣見奩厚多嫉之又笑其不能鍼也
惟樊孺人相處而善若兄弟時曾祖入學爲學生索逋日迫田
租所入不足給卞孺人乃焚棄筆硯曰此豈婦人事邪盡易簪
珥衣裙以償逋課疆以力田親主爨汲每食粥飯茶蔬器重且
熱孺人一一手掣之布於案然後呼力田者歸食力田者皆喜
獲數倍孺人善治家量入爲出久而漸有贏餘向之嫉且笑者
家日落孺人時以錢穀周卹不念舊憾生二子長炳次鏡鏡字
鑑千循先大父也炳後改名沛然字星若先師事王祖修不能
售於有司復師事郭嗣齡益不售安溪李相國門人胡公督學
江南得伯祖文深奇之取爲郡學生時年已四十目短視廣面
鬚若戟胡公笑曰子之貌何不類儒伯祖厲聲曰孔子貌若俱

儒何貌也聞者肅然甘泉令張公安運將穿溝引湖繞西山而南達於江不便民里人甚懼值令至湖伯祖往謁力陳不可令恚伯祖隨至縣庭反覆陳其不便狀先是里中奸民嗾令爲此將藉爲利令惑之旣聞伯祖爭當於理自悔悟適大吏亦止之乃止伯祖樸誠不欺見義勇於爲鄉黨憚之有口角詬誶得伯祖一言卽解舉爲約正每朔望集民教之婉曲善導一時訟爲之減宣化使者涂公逢震謂伯祖曰君百里才老於鄉官屈也晚年於宅後起書屋種竹植梧吟誦其中生一子蘭蘭生三子待得徹待無子以增之子廷福爲後穆來字樂生酷好吟日可數十首每遇戚友家几案垣壁題詠殆遍頗以取厭於人已而敗棺廢槨亦書之口吟卽成句其從兄潤畫蘭每竊以詩題其

北湖小志

卷六

三

幅潤以爲汗不能改也明顯生瑞來耀來慶來慶來生鏤鏤生五子鶴永京亶雍永字聲依江都學生善詩古文循曾見族父騶手寫其古文稿及詩今求之不可得又聞有月令注一卷授其門人陳功士今亦不知所在是可惜也明德生必賈東分七房明達明道明選明遴明遇明通天植明達字雲樓子藻字霞生縣學生尤徵君璋謂其以文行稱生二子錦僕僕字衡若生子璵縣學生霞生弟晚生生二子承露承霖承露字晉筠江都學生明道萬厯乙卯科武舉人舊譜云孝友兼進和藹近人生七子必蘇必蕃必葱必榮必亮淳必亮字雲章與衡若晉筠同以詩名家有別墅與范石湖陳浩海高淡園爲文酒之交今其後人或農或賈先世遺書遂莫可問淳字穆生康熙丁

卯科武亞元時亦知名明選生賡泰賡泰生南俊南傑南吉三世皆讀書爲諸生賡泰字載歌幼聘貢生瞿之秀女未娶而城破瞿居城請於之秀曰予處子恐不及死悔晚矣遂自縊賡泰篤學能文著述甚富有滄園詩統行世南傑生二子繹祖率祖繹祖字維堂工騎射能文章個儻多才智二十遊京師爲馬公齊所知薦於康親王府中王愛其才甚器使之數十年不得歸雍正初乞歸省墓王使四人隨之訖卽促行明年卒於京師王召率祖往迎喪憫其兄將用其弟率祖臨喪卽位而哭極哀不謁王王使人導之來率祖叩頭謝曰王之恩沒世不敢忘但率祖今日爲兄來見王則不敬兄持兄喪而見王爲不敬王請以異日王聞而歎曰南人善謁秀才乃若是耶益以爲重賜金扇

北湖小志

卷六

四

扇上有王像諭曰有子弟入京持此扇來率祖再拜受卒不見率祖字履安天性誠篤承祖父之學安道守貧語默動靜未嘗稍溢規矩其迎兄喪不謁王時人或哂其迂先君子曰此徐孺子申屠子龍之風也吾族中可爲君子人矣以歲貢生選望江縣訓導卒於官生一子汝驥字鳳來爲諸生有聲南吉生三子暉祖紹祖復祖暉祖字益潢江都學生生二子汝翼汝弼明遜縣學生性嗜山水好遠遊著有南遊草湖上焦氏譜生五子悅來必英必菁必著吉生悅來縣學生生珩珩遊閩中遂卜居汀州府長汀縣小教場久不得歸思念祖墓繪揚州北湖圖自城至湖尺寸不失懸諸寢室每對之泣下在閩生子承烈康熙己亥赴京師道過揚珩以圖授之令按圖行卽達故里承烈如其

言若遊熟徑嗚呼珩之志苦矣然可爲輕去其鄉者戒也吉生縣學生生需需生步青字雲上善飲酒工文章開門受徒從學者先後數十人每酣醉文思湧發手指口說名理燦然數十菘半日而刪訂畢不醉時不能也生一子汝楫縣學生明遇生四子必芝必齡必莪必達明通縣學生生六子溥演潤潼注淳溥武學生早卒妻郭氏苦節數十年教子九如讀書爲郡學生生三子芳芬蒲芳字時若善書法多識里中故事性謹愿無虞詐先君子重其爲人念其乏設悅來米行令時若當行牙時若以公平爲糴糶不知輕重出入以巧取利商賈不集又喪子竟老病以終哀哉演生幅幅生灼甘泉學生潤字德安號仁亭江都學生爲文氏婿文命時以畫蘭之法傳之更工於竹石縱橫奇

逸幾不知下筆處性耿介非其人求之千金不許也嘗有詭構其畫者已成矣後知其人大悔於每幅蘭葉上作數驢而不署名字生三子麟士龍士遵祖潼生五子兆熊成五兆彪兆鼇慎兆熊字學時號敬齋雍正丙午科武舉人著敬齋詩一卷生繼武繼轍皆縣學生繼轍字鑿前少貿易折資改而讀書年已二十矣卒爲通人善書法工於詩與詩人張輅交所著有晚翠集蕪城雜詠仿古雜記良友贈言共若干卷生開基福基福基太學生成五字性成太學生生粲武學生善射試泰州時白袍映日放弦貫的學使者以爲異人生夢梅甘泉學生兆彪太學生生繼轍繼彭繼軒繼輻兆鼇字倫士武學生勇力絕倫鄉里畏之生煥字炳文通經學尤深於易補甘泉廩膳生好聚書多異

本皆手校之湖中學者有疑則就而問性溫恭醇遂聞父怒則跪受鄉黨宗族以孝稱年四十一而卒無子倫士公悲憤甚於樓下掘大坎然薪其中盡以所聚書投之燒三日莫敢諫止所著易注亦焚惜哉公面若虎努目而視見者却走而獨愛循每呼至其園亭看花酌酒歡笑累日未覺其可畏也嘗以一硯遺循今藏於篋煥尤深於醫手著一書名醫學指南繼輻故師事煥焚書時匿得之後遷居西山劉家集本此書治人輒效今不知其存矣天植字培之順治辛卯科副榜以文學名生七子濤瀾淇淮瀛浴湧濤字濯月瀾字漢水皆諸生濤生懌愉瀾生愔忱愔生驥忱生軒軒字進辰縣學生淇字衛水太學生未弱冠應鹺使魏公試首拔榜名下注云寸晷立就七藝精純暢達可

卜異日勲名於是文譽噪一時後去而從事貨殖家業日盛篤於倫理合族百餘家貧者養之富者教之推及姻親戚友無不各得其情久而不倦尤慷慨好施急人之難鄉鄰有口角詬誶就而質者輻輳於門骨肉夫婦之間賴公而全者不一其人或田宅貨財以增損爲齟齬公陰解囊以消息之賄累雖千金未嘗有吝色用是黃珏橋鎮四十年無一事質於公廷初有王姓者與里人訟公知之力勸其和旣和王疑公之私於彼也指門而詈公不校亦不辨久之王知公無私且訟不息害將及已於是感公甚後公樹門戟須在王屋中築一楔公戒不可王聞之趨至曰向詈公至今愧悔無以立人世幾成疾果築楔於室庶可釋吾愧而愈吾疾也公嘗獨力修黃珏橋及隄以正月初一

日卒是日湖中人不賀節不知姓名來哭於門者積香楮如邱
烟燄出檐宇幾焚其甍先是有遠方兄弟爭財者過吾里聞公
之風極愧悔歸而復合鄉鄰有鬪者惟恐公聞知村社市集愚
農酣酣怒號毆詈之際主伯不能制其奴隸父兄令不行於子
弟一聞公言闕然散去有含羞背人矢志戒飲者施棺槨掩遺
骼冬散繻袴暑給茶湯頻年水災解倉困以活饑人巡撫穆公
以扁褒其門有老翁鶴髮虬髯策蹇至公門曰吾浙人官於北
方解組者也偶遊淮南耳焦君之化耻當吾世而不識其人特
相訪耳既見公不告姓名而去公之沒也吳寅弔以詩云淒其
念載憶相從歷歷芳規實可宗賤子每蒙青眼顧仙車寧料白
雲封望廬人返思王烈作讚誰能比蔡邕曉向湖天雲黯處春

北湖小志

卷六

七

風吹淚入波浴生四子憬熹恂杰憬字逢庚號醒齋雍正癸卯
科武舉人與徐茂徐棄疾爲詞友著醒齋詩餘一卷居親喪與
兩弟廬於墓三年不宿內不一御酒肉睦嫺任卹排難解紛君
子以爲克承父德也生二子輪軾輪字蒲載軾字應瞻皆縣學
生輪生汝敷太學生以詩名軾一字憑軒又號熊符工詩古文
詞善雅謔書法人歐顏之室擘窠大字揮筆立成縱橫皆如鑄
鐵長於六書一依許氏說文時郡人知說文者尙鮮也循嘗學
詩於公爲公編詩文集爲憑軒遺筆二卷又著梅花詩謎百首
每首隱一物兩面偏肖奇作也生子汝成縣學生熹字效朱號
定齋康熙壬辰科武進士任石匣中營守備陞居庸關都司
誥授明威將軍將軍精槍法勇力敢爲不顧身命賊盜畏之如

虎軍中號曰亂神及其執筆爲小楷細若蠅頭秀韻絕俗時而吟詠則風雅過於文士有所佩刀長尺餘可削鐵陰雨時血光迸出鳴嘯有聲槍首長一尺色黑似鈍以撞物可穿木石初謁李宮保衛於京師召之食謂曰聞君善槍能爲我試乎對曰諾方擎杯置酒席間索槍試試畢復舉杯飲神色不變顧盼自如宮保極愛重之卒於官生二子駒驥駒郡學生生汝斌謹厚長者能詩驥生汝政汝徵悃字外舒太學生爲淮後幼以孝弟稱侍嗣母庄居生父母居鎮上每日定省雖風雨不輟仲兄明威將軍之卒于官也往以喪歸溽暑跋涉數千里不以爲勞其好施利物克承先德恒曰吾無他慮惟慮死無以見先人耳生子輯杰太學生生韜韜武學生瀛字右登康熙己丑武進士生北湖小志

卷六

八

五子愷魚伶忼兆麟愷生韜字麗左縣學生魚字龍門康熙丁酉科武舉人生驕字肩維旣入武學學使張公廷璐愛其文令棄武生改試文驕不可曰吾家世武不願文也善詩古文沐浴於左史漢魏中文士莫能及也兆麟武學生生志尹縣學生浴字沂水郡學生生懽字山起縣學生著有中山文稿湧字崑源縣學生

家述下

武進臧庸撰焦氏世德記云焦氏世居江都黃珏橋分縣爲甘泉人自明永樂間聚處湖濱上下庄有舊樓爲嘉靖年所構蓋以忠厚世其家已三百餘年矣有文科者掌江都刑掾未嘗妄受人一錢往往脫人於死其後積昌長房充是掾者有違先訓

子孫遂絕文科子明賜與諸弟已析產既而諸弟疑明賜之產獨厚索分之明賜曰此本先人之產也卽如所欲子之明賜子源娶於卞卞家故饒且能詩工書畫時源與諸兄同居諸婦嫉卞之奩厚迫源析產而遺以先債源與卞躬耕自給卞并鬻其釵珥以償逋久之業復舊恤其兄之子不遺力源子鏡元旦遇無賴子於塗辱之毀其冠鏡退易冠而出逾日無賴子自愧造門謝鏡念其貧厚給之娶於王明吏部納諫之元孫女生子葱王氏世以易名家吏部之曾孫明經祖修以易教授葱爲明經外孫得聞王氏易說並熟焦氏易林郭璞葬法嘗一應童子試以咯血廢業補國子監生性好施與遺田八九百畝以是中落於孤子孀婦周之尤至有謝姓者昏夜叩門曰吾逋多將售所

居以償之他人皆利子錢子獨否是以竊告幸偕往取償遲則爲他人得矣則艱然曰子奈何輕棄祖宅我豈迫人賣屋錢耶卒勿取歲歉棄產以償貨適戚有喪卽分助之曰吾尙有產可棄不可俾吾親戚無所殯有爲人行其詐者人不忍欺舉以告則權辭以答之而不明其詐並慮詐者之自愧也戒家人勿使知性和易無疾言遽色橫逆來受而不報客至雖卑幼必加禮語不及義則正色謝之相者謂兩目如蠶眠法無子久之復遇相者曰蠶化爲紅色此陰德之徵當得子已而果然自筮將終取貧者之券焚之負人者盡償之曰不可俾吾子孫失忠厚意也嘗謂曾子述顏子之行曰有若無實若虛以能問於不能以多問於寡孟子述顏子之言曰舜何人也子何人也有爲者亦

若是而孔子言慮以下人當仁不讓於師顏子語本此學顏子者貴學其虛心又貴學其立志三年之喪禮經所載儀節極詳而委曲繁重律之今人蓋未能一時行之也古人處已接物務正大光明耳語爲人鄙目語爲人疑不足立名亦不足保身矣魏胡質辭交於張遼曰古人取多知其不貪奔北知其不怯聞流言而不信故交可久武伯南身爲雅士將軍稱之不容於口今以睚眦乃爲嫌隙况質才薄豈能終好遼感其言與伯南如初交友者宜三復之張公藝九世同居力持忍字余謂骨肉當通以至誠疑則釋之俾可共見若久蓄而不化一旦發之必潰矣又曰爲善而使人不可受則厚反爲薄誠於善者必能曲達使施之無迹受之無愧陽善陽報之陰善陰報之好名名報之

世之稱君子者後或不昌稱小人者後或絀盛此其際微矣人與我爭名則自化其矜人與我爭利則自戒其貪不矜不貪將何所爭共事在能分謗已不受過而諉諸人人何以堪旣不能全已之交又不能全人之交則市道也娶於謝年三十四無子謝請曰翁之喪無孫成服吾之咎也又曰始年六十忍令不抱孫乎亟求宜子者因納殷並納陳殷生子三人長循嘉慶辛酉舉人次律國子監生次徵揚州府學生謝教子口授毛詩及古孝弟忠信事多置紙筆令學書夕則召殷共績麻桌或造鬼蠅而不作詩曰詩非婦人事也先祖姑卞孺人深於詩晚年以爲戒陳性慙且多詐嫉殷構釁或諷殷以去殷曰婦人從一而終去將安之或勸謝逐陳殷又不可曰去人留己人謂我何乃避

之宅西屏華飾習農事諳其利病而能其勞苦謝以爲賢亟迎之歸謝病殷事之惟謹謝命婢啟笥出釵服曰此先翁姑所賜命吾爲婦者今授汝殷涕泣受之越二年謝卒殷笥以向所受者爲歛曰昔者不辭重違孺人意耳今仍歸諸孺人踊哭髭麻之節不異子婦之事舅姑也循之子廷琥江都縣學生績學能紹其祖父業臧庸曰余讀里堂孝廉所撰佩士先生並謝殷兩孺人事略未嘗不肅然起敬歎令德之日昌不德之日促也上自高會上逮孫子蓋七世三百年莫不以忠厚文學世其家而又代有賢母以爲內助知其祖宗以來詒謀深而積德遠矣佩士先生家訓尤深遠明確得古聖賢精意蓋粹然有道之儒也孝廉樸學治經生家言精天文算術著羣經官室圖考里堂

學算記凡若干卷醴泉有源靈芝有根信矣孝廉不以庸爲不文手持是冊乞言者再庸深愧淺薄不足以發明其旨而竊喜焦氏之世以厚德相嬗也因列其言行之大者爲世德記並以自警其生卒年月子孫字號已詳墓表誌銘者不復贅云嘉慶十二年歲次丁卯午日武進臧庸記於廣陵城南之淮海樓